

Luke ka Te Pabe'e Jesus, Te Naa Tooa'a-witu, Numu oo Tuukwena

1 ¹⁻²Ka Te Pabe'e ka yaa teepu-kooba tamme-baa'yoona oo manepu-witu. O'no Te Pabe'e nakatzimodu ka oo poonnese ne tuukwe'e. Ewa'yoo numu mooasoo ka Te Pabe'e-witu botugu. ³Nu ka no'oko umu ooka poonnedu unnepu nenayodase besa oetu nakasopedakwadoose, meno'o e pua'a Theophilos nu u-matoo tubo'o, ⁴o'no saa'a u punno'o oo nakasopedakwadookwu mee nu tusooyugwe.

⁵Oosoo sumu'yoo wa'etse, Zachariah mee naneadu, ka mu Jew numu Abijah mee naneadu nananesootuhidu-matu^a. Oo nodukwa punno'o unu peawabe, Elizabeth mee naneadu, oo naa punno'o ka nanesootuhi papabe'e-matu uga. ⁶Umuoo uga besa'yoo numu, no'oko ka Te Naa unnepu kaaheno nakabetse'a. ⁷Umuoo oosapa gi dooamu-ga'yoo soo Elizabeth ka gi dooamudoo-wa'ne'yoona.

⁸⁻⁹Mu Jew numu nanesootuhi papabe'e nanahoosoo ka tu tumayohoyina, ka pabatsekoo Jew nanesootuhipe nobe-kwi'yoona mayohoyakwe. Umu ka nanesootuhi nobe-kwitoo meakwudu, ka besa kookwanadu kootugukwudu. Sumu tabenoosoo Zachariah nanetutze'a^b. ¹⁰Ka besa kookwanadu nakootugukwuno'o oe manepetuse, soo Zachariah ka nanesootuhi nobe-kwi egeaka. Umu numu puuwanasoo konnopunnena nanesootuhigonno. ¹¹Zachariah yise meeoo pooha tuusoobedyakooaha. Sumu'yoo umu Te Naa tutummatziwabe mu toha kakasa-ga-matu petuhoose, ka besa kookwanadu pukwikoo nakootuguna-kumaba wunupunne. ¹²Soo Zachariah yise ka Te Naa tummatziwabe poonnese suiho. ¹³Soo Te Naa tummatziwabe ka Zachariah mee netamma, "U sakwa gi suipana. Soo Te Naa tookwa u nanetsukwiya'ena naka. U nodukwa Elizabeth mee naneadu saa'a naatse toa'agakwu. U yise John mee oo neakwu. ¹⁴Ka oo nadooa'adoose, mu saa'a besa sokwamadoo, ewa'yoo numu

a 1:5 Soo Herod ka mu Jew numu-kooba katu. **b** 1:9 Umu nanetutzea tutsanoodyana ka haka ka besa kwanadu kootugukwudu, Zachariah yise makwuhoo.

saa'a punno'o oosoo. ¹⁵Soo John besa'yoo numukwu, ka gisoo oo nadooa'adoo soo Te Naa tu Besa Pooha-ma oo sootuhikwu. Soo John sakwa oosapa gi atsa tutza'emukwa baa hebepana, gi tooe hownnekoo puma tu nabaayina hebepana tuwazoo. ¹⁶⁻¹⁷Saa'a ka nana manese, soo John unusoo pooha-gakwu ka Te Naa yadoowabe Elijah mee naneadu-kwa'ne. Ka Te Pabe'e gisoo petu, saa'a u tooa, John, mu numu oo-toogoo mooe nemamakwupunnedoo. Soo John ka mu numu Te Naa oemota manepu, ka oo besa podo mu makodyukwu. Soo John ka mu naanapua'amu tu doodooamu besa soobedya mayugwedooa. Soo John saa'a ewow Jew numu ka Te Naa mu naka'oedyuku-matusoo makodyudooa."

¹⁸Soo Zachariah ka Te Naa tummatzidu toha kasa-gakoo mee netamma, "Mooasoo nu unu wa'etsena, e nodukwa punno'o unu peawabe. Hownnekoo yise nu oo sopedakwadoodoo u sumuna e nemooaka?"

¹⁹Soo Te Naa tummatzidu toha kasa-ga'yoo mee oo nanekwegea, "Gabriel mee nu nane'a. Nu Te Naa-nakwana kemmadu. Soo Te Naa-soo meeoo e netamma, nu u tuukwedooa ka besa na'unnedu.

²⁰Meno'o manakwana, u gi yadoo manekwu, u ka ume e tuukwena gi naka'oedyukuna. Pana saa'a ka u toa nawuese, u yadooasoo manedooa."

²¹No'yoona mu numu puuwanasoo konnodape ka Zachariah wutoena. "Ha'ooga manena oosoo gi yabe tseboogena?" mee umu sokwama. ²²Ka saa'a umu-matoo tseboekese, yise sukwe miyutsu'nge, gi yadoo'a. "Soo wa'etse tuusoobedyadu-kwa'ne nuumma," mee mu numu sokwama.

²³Saa'a ka tu nananesootuhi pupua'amu tutumatzimakwuse, ka nanesootuhi nobe-kwi'yoona, Zachariah nobe-kwitoosoo kodyuka. ²⁴Ka saa'a soo oo nodukwa, Elizabeth mee naneadu, kohea. Manege muha manepetuga, Elizabeth oosapa nobe-kwisoo. ²⁵Soo Elizabeth yise mee unakwe, "Soo Te Naa e tubetse sootuhipu. Meno'o manakwana numu gi e nesootzemakwu, gi dooamu-ga'yoo mee e netamma."

²⁶⁻²⁷Soo tsuadumu Mary mee naneadu, Nazareth mee naneadu-kwi nobe-ga'yoo^c. Soo Mary koomadookwuna Joseph mee naneadu saa'a oo nodukwadookwu. Soo Joseph ka umu ne Jew numu-kooba katudu, David mee naneadu-nakwana a numuhabena. Ka Elizabeth naapahe muha koheana oo manekase, soo Te Naa ka pumme tummatzidu, toha kasa-gakoo Gabriel mee naneadu ka Mary-matoo taya. ²⁸Soo Gabriel ka Mary-baa petugase meeoo oo netamma, "Soo Te Naa tubetse besa u sootuhikwu."

²⁹Soo Mary oo-ma nakasua'e, "Hemmagina netamma?" mee soonammena.

³⁰⁻³³Soo Gabriel yise mee ka Mary netamma, "Gi suipana. Soo Te Naa besa u-matoo soonammena, u sootuhikwu. Pudusoo u kohease saa'a u naatse oonga'a dooadookwu. U yise Jesus mee oo neakwu Numu Magwetzoidu mee na'unnedu. Oosoo unu pooha-gakwu, oosoo ka Te Naa-nakwana kemmakwuse. Soo Te Naa saa'a oosapa tu doodooamu-kooba

c 1:26-27 Ka Galilee mee naneadu teepu-koobatu.

tueya'e tuungudooa ka mu namooatupu David-wa'nesoo soo David puu tu nanumu nehanegatudu. Gadoo hee oo oonakwatu.”

³⁴Soo Mary yise mee ka Gabriel tubenga, “Hownekoo yise nu toa'adookwu, nu ka gi hannano'o nanano habepuna?” ³⁵Soo Gabriel yise mee oo nanekwegea, “Soo Te Naa ka tu Besa Pooha-ma oo u sootunagakwu. Ka oo Besa Pooha-toohakwi u koheakwu, oosoo tuha'yoo ka Te Naa Tooa'akwu. ³⁶Soo u hama'a Elizabeth punno'o u-kwa'nesoo besa nasootuhipu. ‘Oosoo gi dooamu-doodu mogo'ne,’ mee mu numu ka o'nosoo oo nea pana oosoo yise moosoo naapahe muha kohea. ³⁷No'yoonaa soo Te Naa unnepu togesapa manekena.”

³⁸Soo Mary meeo, “Nu Te Naa tummatziwabe. Tooe how tooe nuka Te Naa mayugwena besa'yoo.” Soo Gabriel yise meahoo.

³⁹Gi haa'no obenakwato, soo Mary namahanese, mea oona giba-matoo ka teepu Judea mee naneadu-kwitoo, ka tu hama'a Elizabeth nobenega. ⁴⁰Ka Zechariah nobe-kwi yise petugase, ka Elizabeth-no yadoo'a. ⁴¹⁻⁴²Soo Elizabeth ka Mary-no yadooadyakwe, oo wuma ka tu oonga'a yutsungahoose. Soo Elizabeth yise ka Te Naa Besa Pooha-toohakwi pumme oo wupetuhoose yadooakooha. Mee yise unnewunu, “Soo Te Naa tubetse besa u sootuhipu, u oonga'a nokosoo. ⁴³Nu besa soonamme ka yaa nu-baa u petuse, ka tamme magwetzoikwudu u kohe'a, ka Te Naa ume besa sootuha'e. ⁴⁴Ka u petuhoose nuka u yadooese, e oonga'a nu-naga'yoona yutsungahoo, ka besa soonammese. ⁴⁵Soo Te Naa tubetse besa u sootuhi u ka tubetse besa no'oko oo unnepu naka'oedyukuna.”

⁴⁶⁻⁴⁷Soo Mary tubetse besa soonammena nanesootuhikooha meeo yise, “Soo Te Naa tubetse besa'yoo, numu magwetzoidu. Nu tubetse besa oo-matoo soonamme. ⁴⁸Tooe gi e maawa'nekoo sapa soo Te Naa e soobedyana tubetse besa e sootuhi. Yaa manakwana mu numu oosapa meeo nu-kwitu wahakwu, ‘Soo Te Naa ka Mary tubetse sootuhipu.’ ⁴⁹Soo Te Naa tubetse unu pooha-ga'yoo. ⁵⁰Soo Te Naa oe manakwana te soobedyana tamme punno'o ka oo naka'oedyukuna besa nasootuhi. ⁵¹Soo Te Naa unu naduya hemma yugwedu, oosoo umu besa nasooyugwedu numu matzoekute, ⁵²mu numu-kooba aatadu nokosoo. Pana ka mu gi maawa'nekoo numu besa sootuha'e. ⁵³Soo Te Naa ka mu tutuha manedu sootuha'e, pana moosoo besa manepunne mee nasooyugwedu numu soo Te Naa tsasoopedya. ⁵⁴⁻⁵⁵O'nosoo soo Te Naa ka te namooatupu Abraham mee netamma, ‘Mu yow e nanumu besa sootuhikwu.’ Meno'o yise soo Te Naa ka moosoo meeo unnepuna yise oosapa besa te sootuha'e.”

⁵⁶Pahe muha soo Mary ka Elizabeth-baa'yoose tu nobe-kwitooosoo kodyukasoo.

⁵⁷Ka saa'a yise soo Elizabeth naatse tooa'adoo. ⁵⁸Oo nananumu-no oo nonopua'a besa sokwama ka oo nakase, soo Te Naa ka oonga'a-ma besa ooka sootuhise.

⁵⁹Sumu nasatase, umu nanesootuha'e ka Jew numu tumayohokuna soo oonga'a Jew mane, oo nakakwuse tuwazoo. Umu oo nonopua'a ka oonga'a Zachariah mee tooe neahookwu, ka oo naa-wa'nesoo, ⁶⁰pana soo Elizabeth meeo mu netamma, “Masoo John mee naneakwu.” ⁶¹Umu yise meeo

oo tubenga, “How yise John? Gi too haka u nananumu-matu John mee nane'a.” ⁶²Umu ka Zachariah mayutzengese, oo mi yadoo'ena, oo tubenga, “Ha'yoo u ka u tooa'a naneamakakwu?” ⁶³Soo Zachariah yise punno'o mu tumawahakuse pumma tu tubokwuna nekwa'e. ⁶⁴Ka pumme ooka tu gease, Zechariah yise meeoo oo-ma tubohoo, “Mooasoo masoo John mee nane'a.” O'no yise soo Zachariah tuapa nanakahoopetuhoosoo yadooase nanesootuhikooohase mee unnewunu, “Soo Te Naa tubetse besa'yoo.”

⁶⁵⁻⁶⁶“Esoo ka Te Naa umu sootuhipu. Hownne'yookwu gina esoo tuha'yoo?” mee umu oo nonopua'amu sokwama. Gi haa'no oobenakwato mu numu ka teepu Judea mee naneadu-koobatu ka oona giba-na nonobega'yoo, ka Zachariah Elizabeth-no unu moomooatupu dooa'adoose oo nanatukwena, punno'o meeosoo, “Hownne'yookwugina oosoo tuha'yoo?” Umu ka Te Naa saa'a ooka sootuhikwuna sopedakwadoo, soo tuha'yoo ka Te Naa Besa Pooha-ma tu hee-gakwu.

⁶⁷Soo Zachariah ka Te Naa pooha-toohakwi nanesootuhina mee unakwe, ⁶⁸⁻⁷³“U, Ne Naa numme Jew numu oosapa pumatoo nanesootuhidyina. U tubetse besa'yoo. U ka ne namooatupu Abraham mee naneadu meeoo netammapu u ka numme wohonedu-makoo ne magwetzoikwu mee. Meno'o yise u ka u unnepu oo-toogoo mayohogena. U mooasoo meeoo unnepu ka Ne Pabe'e numme-baa petuse, oosoo ka mu tunaka'oedyukudu David mee naneadu-nagatu tsuagetu. Oosoo Te Pabe'e unu poohagakwu ⁷⁴umu numme wohonedu tu pooha-ma matzooekukwu. Gi numme hemma-ma nasoo'u. ⁷⁵U nakabetseana kaaheno ka u besa podo meadabekwu. ⁷⁶Yise u e tooa John, ka Te Naa yadooawabe manekwu. U ka Te Pabe'e-kobenasoo meadabenokwu ka mu numu nemabetsea meakwu. ⁷⁷⁻⁷⁸U meeoo ka mu numu tuukwekwu soo Te Naa te sootuhina te magwetzoina, te tuma'emukwana soomu'wakwu soo Te Pabe'e ka tutuha te soobedyana. Soo Te Naa ka Te Pabe'e tamme-baato ta'ya ka tabatsebooege-kwa'nekoo yaa teepu-koobato petuookwu. ⁷⁹Mu numu, ka togaba-witu tuigadu oosoo mu tzapoonnekukwu ka besow po, o'no yise soo Te Naa mu magwetzoikwu.”

⁸⁰Soo John ka saa'a, ka nana manekese, ka Te Naa pooha hee-ga'yoo. Mana giba-ma nobe-ga'yoo numu-wana, ka namamakwuse mu Jew numu nanesootuhibu tunedyoekwuse.

2 ¹⁻³O'no^d yise soo mu Roman numu-kooba katudu, Augustus mee naneadu tubo mee tunetamma, “No'yoona numu sakwa tu naneana tzebotugu, ka tu nanamooatupu pukwi'yoona kemmapu-wisoo.” ⁴⁻⁵Soo Joseph ka David-ma'yoona tsuaketu tu nanamooatupu, yise ka Bethlehem numu nokatu-kwi'yoona kemmapu ka Judea mee naneadu teepu-koobatu. Soo Joseph ka Mary-no yise ka Nazareth^e mee naneadu-wi'yoona Bethlehem-witoo memekwate tu nananeana botugukwuse. Umu ka saa'a nanodukwadookwu. Mooasoo soo Mary paba kohe'a.

d 2:1-3 Mu numu natzepotugu ka nana Quirinus mee naneadu ka mu Syrian numu moohedu. e 2:4-5 Nazareth nokadu-kwi ka Galilee mee naneadu teepu-koobatu.

6-7 Umu yise Bethlehem-wi pepetugase, soo Mary yise naatse tooa'adoo. Oosoo mu oonga'a mu mooe tooa'a. Soo Mary yise wunapu-wi oo wutootase, ka pookoo tukanoo-kwi oo tzahabeku, umu ka gi hanosoo toikwuse. Mooasoo kakaa'no'yoo soo numu pukwi tooina.

8 Mu seepu takonedu-matu tu seepu tako'ne, ona sukwe puuwana. 9 Te Naa-baa'yoona mu tutakonedu-koobato pa'anakwana gootabua petuse mu gootabuakupunne, yise sumu'yoo Te Naa tummatziwabe, mu toha kakasa-gakoo-matu pa'anakwana umu-tamme wuegena. Mu tutakonedu tubetse unu sua'e. 10 Soo Te Naa tummatzidu yise meeoo mu netamma, "Mu sakwa gi suipana. Nu besa mu tuukwegena, no'obatusoo numu besa masokwamakwudu. 11 Yaa tabeno mooasoo soo Te Pabe'e nadooa'adoo, oona Bethlehem-witoo ka David pukwi'yoo kemmapu-wi'yoona. Soo Te Pabe'e mu magwetzoikwutu. 12 Mu oo sopedakwadooku nu togesapa mu tuukwe'e, mu oo mayukwu ka oonga'a wunapu-wi namabutooena, pookoo tukanoo-kwi oo natzahabekute."

13 Toge o'no, ewa'yoo mu Te Naa tutummatzidu toha kakasa-ga'yoo pa'anakwana umu-baa petugonnose nanesootuhina mee unnegonno, 14 "U pa'anakwatu Ne Naa tubetse besa'yoo. U, Ne Naa ka mu numu-matoo besa soonammena yaa teepu-koobato mu sootuhina mu magwetzoikwu."

15 Umu Te Naa tutummatzidu toha kakasa-ga'yoo yise punowsoo toogoopatoosoo kodyuhoo. Mu tutakonedu yise meeoo nananetamma, "Tamme sakwa oona Bethlehem-witoo mease, oo ponne ka Te Naa tamme tuukwena." 16 Mu tutakonedu yise yabesoo mea'ase, Mary-no Joseph mayu petuga, yise ka oonga'a ka pookoo tukanoo-kwi oo natzahabekute.

17-20 Mu tutakonedu yise punnowsoo kodyuna, nanesootuhina mee unnemena, "Ne Naa, u tubetse besa'yoo. U, Ne Naa numme sootuhipu. Numme nanasookwugi pooha namanipu poonnena ka pooha na'unnewunudu naka. No'yoona tookwa soo ume unnepu togesapa." Umu yise punowsoo meana mu numu tuukwemena, ka oonga'a tu poonnepu-witu. "Howinne'yookwugina soo oonga'a?" mee mu numu ka mu tutakonedu unnena nakadu sokwama. Soo Mary mu unnena soomayuna, yise ewa oetu soohaneyakwe.

21 Namewatsu tabe mease ka mu Jew numu ka Te Naa pumme tunetammakapu mayohoyakwe umu ka oonga'a Jew numu manena tumayohokukwu. Jesus mee oo nea, ka Te Naa tummatziwabe ka toha kasa-gakoo pumme netamma-kwa'nesoo, gisoo ka Mary kohe'a.

22-24 Soo Mary ka tu hoone manena tatukwase, yise ka Joseph-no ka tu oonga'a Jesus tzahedana ka Jerusalem mee naneadu-kwitoo memea. Ka o pepetugase, ka pabow nanesootuhi nobe-kwitoo memea, soo Mary waahoo weeho ka Te Naa tzademe, ka Te Naa tunetamma mayohona. Soo Te Naa meeoo, "Soo numu mooe tooa tooe hannano pana nugatu."

25 Sumu'yoo besa'yoo wa'etse, Simeon mee naneadu, Jerusalem-wi nobe-ga'yoo. Oosoo oosapa ka Te Naa-matoo nanesootuhina, ka tu Nanumu Magwetzoidu Te Pabe'e petukwuna wutooedu. 26 Soo Te Naa ka

Simeon ka Tu Besa Pooha-ma meeoo, tuusoobedyapu-ga'yoo, “Gisoo u ya'ena, u Nanumu Magwetzoikwudu poonnekwu.”

²⁷Soo Te Naa Besa Pooha ka nanesootuhi nobe-kwitoo ka Simeon ta'ya. O'no yise mu Mary-no Joseph ka Jesus tzahedana pepetuo, ka tumayohope mayohokwuse. ²⁸Soo Simeon ka Jesus tzahedase, tu puta-wi oo hedapunna, ka Te Naa-matoo nanesootuhiwunu mee unnewunu, ²⁹⁻³²“U, Ne Naa, tubetse besa'yoo. Nu meno'o oo poonne numme-matoo u tutayana numu magwetzoikwudu. Oosoo saa'a mu gi Jew numu togesapa u unnepu tunedyooena yise mu Jew numu sootuhidooa. Wuna'me nu oo wutoo'e, ume nakabetseana. Nu gisoo ya'ena oo poonnekwu mee u e tuukwe. Meno'o yise nu besa soomanena mesoo ya'e, nu ka moosoo oo poonnese.”

³³“Soo Simeon sumuna besa ka ne tooa-witu netamma,” mee mu Jesus naanapua'amu ka gi oo nakasopedakwadoopana besa oo nakasokwamakute. ³⁴⁻³⁵Soo Simeon yise mu nanesootuhikuse, ka Mary meeoo netamma, “U tooa'a saa'a ka mu Jew numu suda tumatuguna tzapoonnekudooa, yise ka hayoo mu tusooyugwena. Umu-matu namagwetzoikwudu. Umu-matu punno'o kadoo namayugwekwu umu ka oo nekwohonena. U punno'o unu tutuha soonammekwu ka mu numu u tooa tumoo'ookese.”

³⁶Toge o'no, tubetse unu peawabe, Anna mee naneadu, umu-baa petuhoo. Soo Anna tubetse besa'yoo numu. Besa'yoo uga kooma-gana ³⁷ka tu kooma ya'ese, unusoo besa'yoo ka wuna'me nonotsa awamooa nanesootuhiyakwe ka nanesootuhi nobe-kwi'yoona nanesootuhidyina, nonotsa yongona tuwazoo. Ewasoo gi tukapana nanesootuhiyakwe. Soo Anna Te Naa yadooawabe. ³⁸Ka Mary noko Joseph pu-baa pepetugase, Anna ka Te Naa-matoo nanesootuhi, “U, Ne Naa, tubetse besa'yoo. Yowsoo oonga'a te wutooena. Esoo tamme Jew numu magwetzoikwudu.”

³⁹Joseph-no Mary ka tumayohope mayohose, ka Te Naa pumme netamma-kwa'ne ka tu teepu Galilee mee naneadu-kwitoo punowsoo kodyuka, ka Nazareth mee naneadu-kwitoo ka Te Pabe'e-nosoo. ⁴⁰Soo Te Pabe'e Jesus mee naneadu naatse manekese, unu natzooena, unu soonamme, ka Te Naa pumme sootuha'e.

⁴¹Nonotsa sumu tomoyina soo Te Pabe'e Jesus naanapua'amu ka Jerusalem mee naneadu-kwitoo memeyakwe, nananesootuhina na'ewa tukayakwe, ka oo soomayuna, o'no mu Jew numu natzama'wu. ⁴²Soo Te Pabe'e yise ka toebetse manese, sumumano waha matsebuekudu (12) tomose, umu-no mea. ⁴³⁻⁴⁴Soo Te Pabe'e Jesus naanapua'amu yise ka hemma namamakwuse, ka Jerusalem-wi'yoona memea. “Soo Jesus ka sumuna ta nananumu noko tu pupua'amu-no kemma,” mee umu sokwama. Pana soo Te Pabe'e ka Jerusalem-wisoo mani. O'no yongona umu oo too'e kwate tu nananumu-baatu. ⁴⁵Pana umu-baatu kadoo'oo. Umu yise ka Jerusalem-witoosoo kokodyuka oo watena. ⁴⁶Pahe tabe mease, umu oo mayu, ka nanesootuhi nobe-kwikoo mu nanesootuhibu numu tunedyooedu naka katuna ka nanesootuhibu-witu



*Sumu tomo'yina soo Te pabe'e tu naanapua'amu-
no Jerusalem-witoo meayakwe (Luke 2.41)*

besasoo mu tutubengayakwe. ⁴⁷“Esoo besa oo nakasopedakwadoona mu mesoo nanekwegeayakwe, tooe togesoo naatsepana,” mee mu nanesootuhibu numu oo soobedya. ⁴⁸“How manena soo Jesus mow mu numu tunedyooedu yadooe katu?” mee oo naanapua'amu sokwama. Soo oo pea yise meeo oo netamma, “Manatu tooe numme u too'e wate. U sakwa uga gi 'yoo suda ne matugupana.” ⁴⁹Soo Te Pabe'e oo nanekwegease meeo, “How yise manena mu e too'e wate? Mu mooasoo oo sopedakwatoon nu yaa E Naa-baa oo nakabetseana.” ⁵⁰Soo Te Pabe'e naanapua'amu oo unnena gi nakasopedakwatoon.

⁵¹Umu yise ka Nazareth mee naneadu-kwitoo punowsoo kodyuka. Soo Te Pabe'e yise tu naanapua'amu besa nakabetsea. ⁵²Nanakese unu soonamme manepetu soo Te Naa besa oo soobedya, mu numu punno'o.

3 ¹⁻²Ka saa'a soo John^f ka Te Naa yadooawabe maneke, ka Tiberius^g mu Roman numu-kooba oo katu mooasoo ewasoo (15) tommokapu. ³Soo John yise ka giba-ma'yoo wuekese, ka baa hoodu Jordan mee naneadu-kumi meadabena, mu numu ma'emukwapu mu nanekwaha tuungu. "O'no soo Te Naa mu ma'emukwana soomu'wakwu," mee mu netamma. Ka mu nanekwahakese, soo John yise baa-wi mu matzakakwu. ⁴Soo John ka o'nosoo Te Naa yadooawabe Isaiiah mee naneadu pumme waha-kwa'ne manakwe. Isaiiah meeoo tubotugu.

"Mana ka gi hemma nadukadu naa-wi'yoona sumu'yoo nana ka Te Naa pooha-toohakwi mu numu tunesootabuekwu, 'Mu sakwa muusoo namabetseapunne ka Te Pabe'e pudusoo petukwuno'oto. Mu sakwa kaaheno tuusooyugwepunne, o'no mu besa oo nakabetseanokwu.' ⁵Meno'o mu numu ka unu nanakwohonedu sutakoo podo me'a. Nanekwahase, ka po kaaheno mayugwe. Soo Te Naa ka numu besa mayugwekese, mu oo nagenokwu. Soo Te Naa ka giba wuwuta'nena kaaheno mayugwese, mu tutuaga kwakwabedu kaanokukese, mu numu yise kaaheno oo podokoo besa meadabekwu. ⁶No'obatusoo numu yise oo nakasopedakwadookwu ka Te Naa tamme magwetzoa'e."

⁷Soo John ka mu numu pu-baa petudu mee netamma yakwe, "Mu unu etza'a. Saa'a soo mu tuma'emukwana mu-matoosoo kodyukwu. Mu baa-wi mumme e matzaka tuungu, pana mu gi ka mu tuma'emukwapu nematzagakwuna'e. ⁸Mu mooe'ugasoo sakwa ka suta mu manena tubetse ma'wukase, ka besa-tamme manese, o'no sakwa yise nu baa-wi mu matzakakwu. Gi besa nasooyugwena mee unnegonnopana, 'Numme yaahoo Te Naa doodooamu, numme ka Jew numuna.' Mu tookwa gi oo nakasopedakwadoo soo Te Naa tooe hownnekoo tooe tu doodooamu mu mesoo mayugwe. ⁹Mu sakwa besa tumatugu. Mu ka oosapa gi besa tumatuguna mu kadoo'oo namayugwekwu. Tooe haga tooe gi he-toogoo besa'yoo natunikwu."

¹⁰Ewa'yoo numu oo nakana oo tubengu, "Hownnekoo sakwa numme besa tumatugumo?" ¹¹Soo John mee mu nanekwegea, "Mu sakwa ka tutuha manedu tummatzi. Tamme ka waha-batu hemma hee-gana sakwa sumuoo ka numu gi hee-gakoo gea. Ka tukapu-gana tamme sakwa mu tseagoedu maka." ¹²Mu tumasumudoodu ka John-baa petuse baa-wi oo namatzaga tuunguna. "Hownnekoo sakwa numme besa tumatuguyi?" mu numu mee oo tutubengu. ¹³Soo John mu nanekwegea, "Mu ka mu tumasumutoona suu'mu haneyi." ¹⁴Mu tukwutumadu punno'o oo tutubengu, "Hownnekoo sakwa numme besa natumunagakuna suu'mu oo natubesatuka?" Soo John

f 3:1-2 Soo John naa Zechariah mee naneadu. **g 3:1-2** Tiberius numu netutzeamena nana'atakoosoo numu moohu tuunguna. Mu numu oo netutzeana pummesoo nateepu-kooba nobe-ga'yoo: Pontius Pilate Judea-witu, Herod Galilee-witu, Herod pabe'e, Philip Ituraea noko Trachonitus-witu, Lysanias Abilene-witu mu Jew numu moohedu Annas no Caiaphas mee nananeadu.

mee mu nanekwegeana, “Mu sakwa gi mu numu nesuana hemma puma mu tumuna hanepana. Mu sakwa gi mu numu nemoogana mu esayikupana.”

¹⁵Mooasoo mu Jew numu oo sopedakwatoo ka tooe hannano tooe ka Te Pabe'e nanepetuna umu yise ka John Te Pabe'e mee sooyugwe. ¹⁶Soo John ka mu sokwamapunna sopedakwadoona mee mu netamma, “Nu gi Mu Pabe'e. Nu gi oo-wa'ne unu pooha-ga'yoo. Nu baa-wi numu sukwe matzakayakwe. Soo Te Pabe'e nuga oonakwa unu pooha-ga'yoo nuga oonakwa besa'yoo. Soo Te Pabe'e ka Te Naa Besa Pooha-ma mu sootuhikwu oosoo suda mu manena mu nematzagakuse mu gi tunakabetseadu kadoo'oo namayugwekwu. ¹⁷Soo Te Pabe'e petuse ka mu numu yaa teepu-koobatu nemadabuedooa ka mu bebesow ka suta-nagakoo tzobadoo. Ka bebesow numu yise Te Naa nobe-kwi mu nabaa'yookukwu. Ka sutakoo numu gi tunaka'oedyukudu soo Te Pabe'e ka tubetse gi tokedu goso-witoo ma'anakwunikwu.” ¹⁸Meeonekoo soo John ka o'nosoo oosapa numu tunedyooe ka Te Naa besa unnepu-witu.

¹⁹⁻²²Soo John ka mu numu baa-wi matzadyakwe, soo Te Pabe'e punno'o oo-baa petugase yise baa-wi namatzaka. Ka Te Pabe'e nanesootuhiwunu, soo Te Naa Besa Pooha pa'anakwana kwe'na'a tubongo punoonooe yotsekwuge-kwa'ne yise oonaga manipetu. Soo Te Naa pa'anakwana yadooase, mee unne, “U yow E Besaa Tooa, nu-kwa'ne'yoosoo. Nu unu u soopedyana besa u-matoo soonamme.”

Ka saa'a soo mu Jew numu-kooba numu nehane katudu Herod mee naneadu gi toge'yoo nana. Tu pabe'e nodukwa, Herodias mee naneadu, oo-makoo tsakahoose oo nodukwadoo. Soo John ka Herod manena nesootu'adya'ena mee oo netamma, “U sakwa gi ewa suda tumatugupana. U sakwa gi uga ka u pabe'e nodukwa nodukwadoopana.” Soo Herod gi oo nakabetsebena nanahano'obasoo ka John wutuma tuunguna.

²³Soo Te Pabe'e ka pahemano (30) tommo manepetuse numu nanesootuhibu tunedyooe maneka. Soo Te Pabe'e ka Joseph toa mee mu numu-matu unakwe.

Soo Joseph naa Heli mee nane'a. ²⁴Soo Heli naa Matthat mee nane'a. Soo Matthat naa Levi mee nane'a. Soo Levi naa Melchi mee nane'a. Soo Melchi naa Jannai mee nane'a. Soo Jannai naa Joseph mee nane'a. ²⁵Soo Joseph naa Mattathias mee nane'a. Soo Mattathias naa Amos mee nane'a. Soo Amos naa Nahum mee nane'a. Soo Nahum naa Esli mee nane'a. Soo Esli naa Naggai mee nane'a. ²⁶Soo Naggai naa Maath mee nane'a. Soo Maath naa Mattathias mee nane'a. Soo Mattathias naa Semein mee nane'a. Soo Semein naa Josech mee nane'a. Soo Josech naa Joda mee nane'a. ²⁷Soo Joda naa Joanan mee nane'a. Soo Joanan naa Rhesa mee nane'a. Soo Rhesa naa Zerubbabel mee nane'a. Soo Zerubbabel naa Shealtiel mee nane'a. Soo Shealtiel naa Neri mee nane'a. ²⁸Soo Neri naa Melchi mee nane'a. Soo Melchi naa Addi mee nane'a. Soo Addi naa Cosam mee nane'a. Soo Cosam naa Elmadam mee nane'a. Soo Elmadam naa Er mee nane'a. ²⁹Soo Er naa Joshua mee nane'a. Soo Joshua naa Eliezer mee nane'a. Soo Eliezer naa Jorim mee nane'a. Soo Jorim naa Matthat mee nane'a. Soo

Matthat naa Levi mee nane'a. ³⁰Soo Levi naa Simeon mee nane'a. Soo Simeon naa Judah mee nane'a. Soo Judah naa Joseph mee nane'a. Soo Joseph naa Jonam mee nane'a. Soo Jonam naa Eliakim mee nane'a. ³¹Soo Eliakim naa Melea mee nane'a. Soo Melea naa Menna mee nane'a. Soo Menna naa Mattatha mee nane'a. Soo Mattatha naa Nathan mee nane'a. Soo Nathan naa David mee nane'a. ³²Soo David naa Jesse mee nane'a. Soo Jesse naa Obed mee nane'a. Soo Obed naa Boaz mee nane'a. Soo Boaz naa Salmon mee nane'a. Soo Salmon naa Nahshon mee nane'a. ³³Soo Nahshon naa Amminadab mee nane'a. Soo Amminadab naa Ram mee nane'a. Soo Ram naa Hezron mee nane'a. Soo Hezron naa Perez mee nane'a. Soo Perez naa Judah mee nane'a. ³⁴Soo Judah naa Jacob mee nane'a. Soo Jacob naa Isaac mee nane'a. Soo Isaac naa Abraham mee nane'a. Soo Abraham naa Terah mee nane'a. Soo Terah naa Nahor mee nane'a. ³⁵Soo Nahor naa Serug mee nane'a. Soo Serug naa Reu mee nane'a. Soo Reu naa Peleg mee nane'a. Soo Peleg naa Eber mee nane'a. Soo Eber naa Shelah mee nane'a. ³⁶Soo Shelah naa Cainan mee nane'a. Soo Cainan naa Arphaxad mee nane'a. Soo Arphaxad naa Shem mee nane'a. Soo Shem naa Noah mee nane'a. Soo Noah naa Lamech mee nane'a. ³⁷Soo Lamech naa Methuselah mee nane'a. Soo Methuselah naa Enoch mee nane'a. Soo Enoch naa Jared mee nane'a. Soo Jared naa Mahalaleel mee nane'a. Soo Mahalaleel naa Cainan mee nane'a. ³⁸Soo Cainan naa Enos mee nane'a. Soo Enos naa Seth mee nane'a. Soo Seth naa Adam mee naneadu. Ka Adam yise soo Te Naa manumudoopu.

4 ¹Ka Te Naa Besa Pooha-toohakwi'yoona Te Pabe'e ka Jordan hooodu-kumaba'yoona mea. Soo Te Naa Besa Pooha numu-wanattoo oo tayana oo nanesootuhi tuunguna. ²⁻³Saa'a yise soo suta'yoo ka Te Pabe'e meeo netamma, "U sakwa nanamanena nasootza'me ka Te Naa Tooa'ana. U sakwa eka tupe tukaba mayugwe, o'no u oo mesoo tuka."

⁴Soo Te Pabe'e gi oo nakabetseana, mee unakwe, "Soo Te Naa meeo, 'Tukapu nadukana suu'mu gi numu magwetzoi-wa'ne'yoo.' Soo Te Naa unnepu suu'mu numu magwetzoi."

⁵Soo Suta'yoo yise pa'atoo ka Te Pabe'e bikase, oo tzapoonnekute no'yoona nana'ata'yooosoo numu ka teepu-koobatu. ⁶Soo Suta'yoo yise meeo tuwazoo ka Te Pabe'e netamma, "O'nosoo nuka mu numu yaa teepu-koobatu e moohe tuungu, umu yise no'yoona e nakabetseakwu. ⁷U ka nu-matoo nanesootuhina, nu ume mu nakabetsea tuungukwu." ⁸Soo Te Pabe'e meeo ka Sutakoo netamma, "Nu gi u-matoo nanesootuhi-wa'ne'yoo. Soo Te Naa unnepu mee mooasoo nabotugu, 'Tamme sakwa ka Te Naa-matoo suu'mu nanesootuhi, ookow suu'mu nakabetsea.'"

⁹Soo Suta'yoo yise ka Te Pabe'e ka Jerusalem mee naneadu-witoo bika. Pa'atse'e ka pabow nanesootuhi nobe-kooba oo wunu tuunguse, ka Te Pabe'e mee netamma, "U sakwa nanamanena u ka Te Naa



Soo te Pabe'e numu-wanatoo mease nanesootuni (Luke 4.2-3)

Tooa'ana. U sakwa ma-kooba'yoona nadawunihoo. ¹⁰ O'no soo Te Naa u magwetzoikwu oosoo ka meeoo nabotuguna,

'Soo Te Naa umu pumme tummatzidu u mabetsea tuungu. ¹¹ U gi tupe-ma tukwutza'nge-wa'ne'yoo, umu ka u tsipunnena.'

¹² Soo Te Pabe'e yise ka Sutakoo meeoo netamma, "Nu gi umu unnena nakabetsea-wa'ne'yoo, oosoo ka meeoo nabotuguna. 'Tamme gi ka Te Naa mapoonne, ha'oo sakwa oosoo mani mee sokwamana.'" ¹³ Soo Suta'yoo yise ka Te Pabe'e-baa'yoona meahoo. "Sumuna penakwasoo nu ka Mu Pabe'e makwuhookwu," mee soonammena.

¹⁴⁻¹⁵ Soo Te Pabe'e yise punowsoo kodyuka ka pummesoo teepu Galilee mee naneadu-witoo. Soo Te Pabe'e yise ka meadabena ka Te Naa Besa Pooha-toohakwi ka Te Naa unnepu numu tunedyooe mea ka Jew numu nanesootuhi nobe-wi'yoona tuwow. No'yoona ka teepu-koobatu mu numu oo nanatuukwe'e yise mee nana'unakwe'e, "Soo Te Pabe'e Jesus tubetse unu besow pooha-ga'yoo."

¹⁶ Soo Te Pabe'e ka Nazareth pukwi tu namananana-wisoo petuga. Ka nanesootuhi tabeba oe manepetuse, soo Te Pabe'e numu-baa nanesootuhi petuga ka oosapa maneyina. ¹⁷ Soo Te Pabe'e yise natunea tuungu. Oosoo yise wunuooohoo. Umu ka o'nosoo Te Naa yadooawabe Isaiah mee naneadu tubona nakea. Oo tsakwunowse oo-toogoo tu poonnemese ka oo mayuse ooka mu neakutu mee na'unnedu.

¹⁸ "Soo Te Naa Tu Besa Pooha-matu-ma e sootuhipu ka umu tutuha manedu gi how mane-wa'ne manepunnedu numu tu unnepu e

tuukwe tuunguna. Ka Te Naa Pesa Pooaha-ma ka mu nanasuda tu tumatugumasoo tzangedu umuoo suda tumatuguna soomu'wakwu mu sootuhina mu magwetzoikwu. Mu gi tutubootabuedu-kwa'ne manepunnedu nu sootuhina mu magwetzoikwu. Yise mu numu mukwapunnedu numu nanasuda namatugudu, ¹⁹nu besa tuukwekwu. 'Meno'o soo Te Naa mu magwetzoikwu.'

²⁰Soo Te Pabe'e yise oo neamakwuse o ka pumatoo a natubona mabutooese punowsoo ka tu tummatzidu geasoo yise ka numu tunedyooodu katunoo-wi katuhoo. No'yoona numu yise oo nakapunne.

²¹Soo Te Pabe'e yise meeoo mu netamma, "Yow meno'o soo o'nosoo a unnepu oo-toogoo manekena. Mu muusoo namakoo a poonne."

²²"Soo Jesus nanabesa yadooapana masoo tamme-matusoo, masoo Joseph tooa. Ha'oo yise masoo besa yadoo'a?" Mee'e no'yoona mu tunakapunnedu nananetamma.

²³Soo Te Pabe'e mee mu netamma, "Mu sumuna meeoo e netammakwu, 'Mooasoo numme oo naka u ewow numu magwetzoikena ka Capernaum mee naneadu wi'yoona. U sakwa yaanona ka umesoo numu mabetsea,' mee sumuna mu e netammakwu.

²⁴Nu mu tuukwekwu mu wakwawa'a Te Naa yadooawabe etzaga naka'oedyuku pana mu oogowsoo nanumu oo nopua'amu-no gi oo naka'oedyuku-wa'ne'yoo. ²⁵Ka tubetse o'nosoo oo namanepu-wa'ne, wuna'me (3 ½) tomopu gi tu pow'ma, ewa'yoo Jew numu natseagoe. Ewa'yoo mu Jew pepeawabe tu koomamu tui pu punno'o tseagoe ²⁶pana soo Te Naa gi mu maka. Soo Te Naa ka wawa'a peawabe^h ka Elijah makayidu suu'mu makana oo sootuha'e. ²⁷Ewa'yoo Jew numu unu tookoo pehe'uagoedu pana soo Te Naa gi ka Elisha umuoo mabesaku tuungu. Soo Te Naa ka Elisha ka wawa'a tookoo pehe uayidu Naaman mee naneadu mabesaku tuungu. Soo Te Naa ka umu wakwawa'a etzaga tunaka'oedyukudu sootuhikwu, gi mumme gi tutunaka'oedyukudu."

²⁸⁻²⁹Mu numu ka meeoo oo unakwe oo sutakuse yise ka nanesootuhi nobe-wikoo oo tayahoo. Yise oona wuta'ne-matoo oo tzakakase ka oo batsowkwuse. ³⁰Pana soo Te Pabe'e mu tasegeyidoo meahoose mu namatsatsepooe, yise kokodyuka.

³¹Soo Te Pabe'e Jesus yise ka Capernaum mee naneadu-wi petuga. Toge, o'no mu nanesootuhigonno tabeno umu-baa petuga. Soo Te Pabe'e petugase, ka besowsoo ka Te Naa-witu mu numu tunedyoowunu. ³²Mu numu yise oo nesookwuga'e oosoo tubetse besa ka Te Naa unnepu-witu wahamena, "Yow tookwa esoo Te Pabe'e," mee'e mu numu.

³³Sumu'yoo nana tsoapayidu oe. Soo tsoapa wa'agena ewa unnewunu ka Te Pabe'e meeoo netammabodote. ³⁴"Uda! U haa'a kadoo e mayugwekwu? U sakwa ne tsasoopeya. Nu u sopedakwatoo, u Jesus, ka No'oko Hemma

Manumudoopu Besaa Tooa'a." ³⁵Soo Te Pabe'e ka tsoapa nematzagakwunihoo meeo oo netamma, "Gi unnepana, managa'yoona tzebooegea." Soo tsoapa ka oo-naga'yoona tsebooegease, ka nana wunapowkase sapa oosoo gi namanayaha. ³⁶Mu numu yise mee nana'unnegonno, "Uune'yoo! Tamme ha'yoo gi hannano'o besa mownneko poohabe poonnedu. Esoo Te Pabe'e puu ka tsoapa nematzagakwunihoo, sukwe yadooase sapa." ³⁷Mu numu otuoo yise ka Te Pabe'e manipu poonnedu nanatuukwekooha ka saa'a yise ewa'yoo numu otuoo nanakwingadu oo nanatuukwegonno.

³⁸Soo Te Pabe'e yise ka mu nanesootuhimakwuse oe'yoona mease, ka Simon Peter-baa petuga. Soo Simon Peter yahe peawabe unu tuoeya'ena oo tookoo unu udutuna onahoo hape. Umu o nobe-witu ka Te Pabe'e oetu tuukwe'e. ³⁹Soo Te Pabe'e yise oo-baa wunu petugase meeo oo netamma, "U mooasoo besa mani." Oosoo peawabe yise yotseoose, mu tugoomahanekuhoose, mu tuka tuunguhoo.

⁴⁰Oogowsoo yongona tu taba egowse, mu numu nana'atakoosoo tutu'oe-ga'yoo ka Te Pabe'e-baa natzato petudyakwe. Soo Te Pabe'e yise umu-ma pooha matugumena mu mabesakumena ⁴¹mu tsoapagoedu nokosoo. Mu tsoapa yise mee unnegayakwe, "U yaahoo ka No'okosoo Hemma Manumudoopu Tooa'a." Soo Te Pabe'e yise mu tsoapa tayayakwe. Soo Te Pabe'e gi ooka mu wahakwuna petzape, ka pumme mu sopedakwatoona. Ka mu tsoapa tsebooegeayakwe, mu tsoapagoedu numu yise besa maniyakwe.

⁴²Oogow moo'a awamooa soo Te Pabe'e yise oona numu-wanaroo mea. Saa'a mu numu yise oo watena, oo mayuse, oo too'e nabaay'oo tuungu. ⁴³Pana soo Te Pabe'e mee mu sukwe netamma, "Mu numu manarooe nonobe-gakoo, nu ka Te Naa tamme mabetseakwuna-witu mu tuukwekwu. Soo Te Naa Besa Pooha meeo e netamma, 'Manatutooe mu numu ekow nanesootuhibu tunedyooe.' " ⁴⁴Soo Te Pabe'e yise oona ka teepu Judea mee naneadu-wi'yoona ka mu numu tuukwe'emena, yise mu nanesootuhi-wi'yoona tuwazoo.

5 ¹Soo Te Pabe'e yise ka banunadu Gennesaret mee naneadu-kumaba wununa, ewow numu Te Naa unnepu tunedyoedyakwe. Ewa'yoo numu oo na'oonnakwi manepunne ka Te Naa unnepu soonakana.

²Waha'yoo sake o. Mooasoo soo mu tuukwidu Simon mee naneadu-no ka sake-wi'yoona tsebooeese, ka puma tu tuukwina tzabazagadyakwe. ³Soo Te Pabe'e ka Simon sake-wi tsebooeese, oo natzemange tuungu sagwane ka bakumanaroo. O'no oweoo ka sake-wi soo Te Pabe'e katuna ka Te Naa unnepu numu tunedyooe.

⁴Ka mu numu yadooemakwuse, soo Te Pabe'e ka Simon mee netamma, "U sakwa ma tookapu baa-ga-witoo natsenooyooe ka puma mu tuukwina ka baa-witoo tzasawekuse, mama tuukwina tutzakadukooha." ⁵Soo Simon yise ka Te Pabe'e meeo netamma, "Nu u nakabetseakwu tooe mooasoo numme togawano too'e tuukwise sapa gi hemma tzaku'a." Umu yise ka Te Pabe'e netamma-kwitu wukwihoo. ⁶Tubetse ewa'yoo pakwe yise natzakadu, soo puma mu tuukwina

yise natakebu'e. ⁷Umu ka mu tu pupua'amu James noko Johnⁱ mee nananeadu ka sumuoo sake-witu namatoo bise, mu natummatzi tuungu. Mu James-no John ka umu-baa pepetuoogase umu namekoosoo ka mu sake kaanokuhoose, mu sake yise nano too'e patatsopedihoo. ⁸⁻¹⁰Soo Simon Peter ka tu pupua'amu James, John-no yise, o'no oo pudu sopedakwatoo ka Te Pabe'e unu pooha-gana, umu ka ewow pakwe mu tuukwina poonnese, soo Peter yise ka Te Pabe'e-matoo nanesootuhikooha mee unnewunu, "Uda! Nu oosapa tuma'emukwanummedu. U tubetse besa'yoo. U sakwa gi nu tzage'e manepana." Soo Te Pabe'e yise meeoo ka Peter netamma, "Gi nu-ma suipana. Wuna'me u pakwe-ganummedu. U sakwa nu-ma tsabegase ka Te Naa besa unnepu mu numu tunedyooemea e tummatzina." ¹¹Umu yise no'yoona ka bakumana petuse, Simon, James yise John no'oko ka tu hemma matusookwunise ka Te Pabe'e nakatzimodu mane.

¹²Umu yise ka Te Pabe'e-no meana ka numu nogadu-kwi petuga. Sumu'yoo nana unu tookoo uayidu onona, ka Te Pabe'e-baa petugase oo nanetsagwayina meeoo oo netamma, "U sakwa e mabesaku ka meeoo soonammena." ¹³Soo Te Pabe'e Jesus yise oo-ma pooha matuguse mee oo netamma, "Nu u mabesakukwu, u besa manekwu. ¹⁴Ka besa manese. U sakwa ka mu Jew numu nanesootuhiwabe natzapoonnekuse ka Moses tamme tunetamma-kwa'nesoo ka Te Naa tuwuniku ka te tookoo uayina namabesaku-kwitoo. Gi saa'a mu numu tuukwepana ka ume e mabesakuna." ¹⁵Ooonne'yoopana soo nana ka besa manise ka mu numu tuukwekooha ka Te Pabe'e-witu, yise ewa'yoo numu tuoegoedu oo takoona petu ka besa tu manekwuna sookwina.

¹⁶Soo Te Pabe'e yise kwinga'a numu-wanatoo mease nanesootuha'e.

¹⁷Saa'a soo Te Pabe'e ka mu numu tunedyooedyina ka Te Naa-witu. Susumudu naana ka mu numu Jew tumayohona numu tunedyooedu, susumudu yise mu nanesootuhibu tunedyooedu-nagatu Pharisee mee nananeadu mana kwinga'akwitu' too'e petugase oonow aata'a. Soo Te Pabe'e Jesus ka Te Naa Besa Pooha-ma numu mabesakudyakwe.

¹⁸Huu'yoo nanana kapa-wikoo ka gi yutsungadu numu tzakwuhuna petuga. Umu ka Te Pabe'e-matoo napoohameapana, ¹⁹ewow numu ka nobe-wikoo umu gi hownnekoo oe tzoono'o'a. Umu yise ka nobe-kooba tupoyase oo-koobatu tzatawagase ka kapa-nokosoo tobongo ka tuoeyaedu tzakweku ka Te Pabe'e-kobenatoo. ²⁰Soo Te Pabe'e oo sopedakwatoo ka mu nanana puu-ma unu nasoonatza'e yise ka gi yutsungadu nana meeoo netamma, "E pua'a, nu ka u tuma'emukwana soomu'wakwu." ²¹Umu Jew numu tunedyooedu mu Pharisee mee nananeadu-no o aatadu mee tusooyugwe manepunne, "Esoo hayoo suda na'unnedu unni. Masoogina Te Naa mee nasooyugwe. Soo Te Naa suu'mu ka numu tuma'emukwana soomu'wa." ²²⁻²³Soo Te Pabe'e yise oo sopedakwatoo ka mu tusooyugwena, yise meeoo mu netamma, "Mu gi

i 5:7 Mu James noko John naa Zebedee mee nane'a. j 5:17 Ka teepu Galilee noko Judea mee naneadu-witu kemmadu ka Jerusalem mee naneadu tuwazoo.

e naka'oedyukute ka mu numu tuma'emukwana e soomu'wa pana mu oo poonnekwu ka eka nana e mabasakuse. ²⁴Mu yise oo sopedakwadookwu nu eka teepu-kooba ookow poohabe hee-ga'yoo ka mu numu tuma'emukwana e soomu'wana." Soo Te Pabe'e yise ka nana gi yotsungadu meeoo netamma, "Wunuoose ka u kapa nobe-witoo tzakwuka." ²⁵Soo nana ka tu kapa tzakwuhuna nobe-kwitooosoo meana, oosapa meeoo unneno'o, "Te Naa tubetse besa'yoo." ²⁶No'yoona mu numu oo soo'oedyukuna meeoo punno'o, "Te Naa tubetse besa'yoo. Numme nanabesa namanedu yaa tabeno poonne. Numme gi hannano'o yoonnekoo poohabe poonedu."

²⁷Sumu'yoo nana Levi mee naneadu ka oonow putoogoo numu tzoonoodyakwe mu numu tunekwina tumasumudodyakwe. Soo Te Pabe'e ka oetoo meana ka o oo katu oo poonnese yise meeoo oo netamma, "U sakwa umu-no nu-no manenumme." ²⁸Soo Levi yotseoose, oo-no tzabeka.

²⁹Ka Levi nobe-wi'yoona paba natabetuka yise saa'a soo Te Pabe'e ka Levi nobe-witoo oo-no mea mu Pharisee mee nananeadu tuka. Ewa'yoo numu tumasumudoodu o, tuma'emukwadu mee nananeadu umu-no tuka. ³⁰Mu Pharisee ka Te Pabe'e umu-no tuka oo poonnese, ka umu oo nakatzimodu nesootzemana meeoo mu netamma, "Umu gi toge manakwe umu-no tuka, umu tumasumudoodu mu nanumu suda dyugwedu."

³¹⁻³²Soo Te Pabe'e ka oo unnena nakase, meeoo yise unakwe, "Nu yaa ka teepu-kooba namanumudoopu ka mu tuma'emukwadu Te Naa-witu tuukwekwuse. Ka mumme moosoo besa nasooyugwedu numu nu gi hownnekoo mu tummatzi-wa'ne'yoo."

³³Umu Pharisee nanesootuhidu naana yise ka Te Pabe'e meeoo netamma, "Umu John nakatzimodu ka numme Pharisee-no gi tukapana nanesootuhiyakwe. How yise umu ume nakatzimodu gi punno'o oosoo tumatugu?" ³⁴Soo Te Pabe'e mee mu nanekwegea, "Nu togesoo umu-no'yoona, pudu nodukwadoodu-kwa'ne umu puu ka nanano'yoona besa sokwama. ³⁵Pana pudusoo nu gi umu-no'yookwu, o'no yise saa'a umu e nakatzimodu gi tukapana nanesootuhikwu."

³⁶Soo Te Pabe'e ka mu tunedyoena mee tuwazoo mu tuukwe, "Ka oohoo a manepunne mu gi hownnekoo ka mu numu pudu tumayohope no'oko ka mumme putoogoo mooa tumayohope-noko mayua-wa'ne'yoo. U pudu wanapu ka mooa wanapu-ma dotsanase, oosoo gi toge tubuakwu.

³⁷⁻³⁸Mu gi hownnekoo eka mumme pudu natunetammakuna ka mooa tumayohope noko mayua-wa'ne'yoo. ³⁹Pana mu numu ka mumme e pudu tumayoho tuunguna gi nakabetzape. Mu ka mummiesoo mooa tumayohona soonoyugwena. Mu ka mooatupu atsa tutza'emukwa baa hebedu numu-wa'ne'yoo. Oosoo puu gi pudu atsa tutza'emukwa baa petzape oosoo meeoo, 'Soo mooatupu atsa tutza'emukwa baa besa kamma.' "

6 ¹Ka tu nanesootuhi tabeba-wi soo Te Pabe'e yise umu pumme nakatzimodu-no oona tubewabe-too meana unu tseagoena ka tumasuape-matu mabokamena oo mahangena o tukamena esoo moosoo natumayohodu. ²Mu Jew

numu nananesootuhidu, Pharisee mee nananeadu, mu poonnena, ka Te Pabe'e meeoo netamma, “Umu u nakatzimodu ka te Jew tumayohona gi heesoobedya. Umu ka tumasuape mahanegenena oo tukana esoo nanesootuhi tabeba gi numu hemma how yukweno'o. Esoo tamme Jew numu mooa tumayohona, o'no nanesootuhi tabeno gi numu hemma how yukweno'o 'yoo manakwe.”

³Soo Te Pabe'e yise punno'o meeoo mu netamma, “Mu sakwa uga oo nea ka o'nosoo soo besa tamme-kooba katukwudu, David mee naneadu, punno'o ka te Jew tumayohona takopapu tu pupau'amu-no ka tseagoena. ⁴Soo David ka Te Naa nanesootuhi nobe-wi petugase, ka tu pupua'amu-no ka pooha tukaba tuka, umu nanesootuibu numu tunedyooedu suu'mu tukana. Oosoo ka Te Naa-nakwana gi hownne'yoo.” ⁵Soo Te Pabe'e meeoo mu netamma, “Nu yow Mu Pabe'e. Nu no'oko hemma ka mu nanesootuhi tabeba-wi mu nemadabuekwu.”

⁶Ka tu nanesootuhi tabeno soo Te Pabe'e ka mu nanesootuhidubaa petugase Te Naa-witu mu numu tunedyoo'e. Sumu'yoo nana tumadinakwatu tu mi pasatopo'nepu gi mayutsungadu oe numu-no. ⁷Umu Pharisee nanesootuhibu numu tunedyooedu, mu Jew nanana Pharisee mee naneadu-no ka Te Pabe'e besa eya'epunne oo sookwaha'yoo howga saa'a ekow nana oo mabesakudooa. O'no tabeno gi hemma how nuugweno'o, ooka saa'a how kadoo'oo oo mayugwekudooa. ⁸Soo Te Pabe'e oo tusooyugwena sopedakwato. Soo Te Pabe'e meeoo ka nana netamma, “Yaato kemma.” Soo nana ka Te Pabe'e-baato meahoo. ⁹Soo Te Pabe'e ka umu pumme poonnepunnetu meeoo netamma, “Ka pabow tabeba-wi gi hemma how nuugweno, o'no haa'a suta'yoo? Yise o'no tabeba haa'a mu gi ha'yoo oo sooyukwe o'no haa'a mu gi namabesakupana gi hownne'yoo? O'no haa'a ka pabow mu tabebano'o, ya'e pana gi hownne'yoo?” ¹⁰Soo Te Pabe'e yise mu poohwise yise ka gi mayutsungadu meeoo netamma, “Matuhe.” Oosoo yise matuhe oo mi namabesakuhoopu.

¹¹Umu tunesootzemadu suta'a yise nanano mee tune hane, “Tamme sakwa ka Jesus batsa.” mee'e.

¹²Soo Te Pabe'e yise oona giba-matoo mease togawano nanesootuha'e ka Te Naa-matoo. ¹³Ookow mooa awamooa soo Te Pabe'e ka umu pumme nakatzimodu namatoo ba'e. Sumu mano'yoona wahamatseboekudu (12) umu-nagatu netutzea tu yadooawabe manekwudu. Umu mee nanane'a:

¹⁴Simon, soo Te Pabe'e Peter mee ookow nea'a; Andrew, Peter pabe'e, James, John, Philip, Bartholomew, ¹⁵Matthew, James, oo naa Alphaeus mee naneadu, Simon, numu-no watze nagoedu mee tuwazoo naneadu, Judas ookow naa James mee nane'a, ¹⁶Soo Judas punno'o saa'a ka tukwutumadu ka Te Pabe'e-matoo nemanekukwudu.

¹⁷Soo Te Pabe'e yise ka mu pumme nakatzimodu-no ka giba-ma'yoona wuekese, oo tookanakwa yamoso-wi petugonnohoo. Ewa'yoo numu tooe

hano'yoona tooe petudyipunne ka Te Pabe'e-baa^k. ¹⁸Susumudu ka Te Pabe'e nakahooyapunnedu, susumudu tuoegoedu natzatogedu, mu tsoapagoedu punno'o oo-baa natzatodu. ¹⁹No'yoona mu tuoegoedu natzatodu ka Te Pabe'e tzamadyakwe ka oo pooha no'oko numu mabesakute.

²⁰Soo Te Pabe'e yise ka umu pumme nakatzimodu meeo netamma, "Tooe tamme ka meno'o tutuha manepana nasootuha'e, ka saa'a soo Te Naa yise unusoo te mabetseakwu. ²¹Tooe tamme ka meno'o tseagoepana nasootuha'e, saa'a tamme ka Te Naa-baa'yoona gi tutuugekwu. Tooe tamme yaano ka suda sokwamapana nasootuhikwu, saa'a tamme Te Naa-baa'yoona besa sokwamakwu.

²²Mu ka mu numu mumme gi petzabena gi too mu-no mu napua'ana, nanasuda nu-koobatoos mumme tu netamma sapa gi suda sokwamapana mu besa nasootuhikwu. ²³Mu sakwa gi oo nasoomenakwapana tooe how mumme tu yugwe, mumme suda tu netamma sapa. Mu ka saa'a Te Naa-baa petugase unusoo besa nasootuhikwu. Mu nanamooatupu puu mu Te Naa yadooawabe nanasuda matugu pana, meno'o yise umu ka Te Naa-baa'yoona besa sokwama, ka besa pumme tu sootuhise.

²⁴Pana soo tooe haga tooe ka meno'o besa manepunne ka yaa teepu-kooba'yoona ookowsoo nasootamana, gi ha'yoo sokwamana, gi hemma toge soobedyana, umuoo gi nasootuhikwu, ka mooasoo umu yaa teepu-kooba'yoona besa sokwamana. ²⁵Mu ka meno'o mu hee-gana paba sooyugwena oosoosoo mu takonepunnenana mu gi hownnekoo nasootuha'e-wa'ne'yoo. ²⁶Mu ka mu numu besa mu nemadabuena petukuna, ka saa'a mu gi nasootuhikwu. Mu numu puu oosapa ka mu yaahoo Te Naa yadooawabe mee'e mumme tu nemooaka mu besa mu sooyugwe.

²⁷Pana nu mu tuukwekwu tamme sakwa te wohomu besa soobedyana yise besa mu matugu tooe umu gi te soobedyana sapa. ²⁸Ka tamme mu nekusegea, tamme sakwa oosapa nanasootuhi besow umutoo nekwinana.

²⁹⁻³¹Nu mu tuukwekwu tooe suda tamme tu matugu sapa, tamme sakwa gi umu-no nagoepana. Ka sumunakwatu te soba namatake'ehoose, tamme sakwa oo sukwe tutzomunaku. O'no oosoo ka sumunakwatu matake'yookwu tuwazoo.

Tamme sakwa ka numu nakutzikuna gi hownnekoo oo tumanagakuna, oosoo ka te kwasu kwuse sapa, oosoo gi hownne'yoo tamme te wunagapu oo gease tuwazoo. Ka mu numu hemma tamme mu natuungu, tamme sakwa mu gea.

³²Soo Te Naa gi besa'yoo numu mee te neakwu tamme ka sukwe numu tamme besa soobedyadu besa soobedyana. Mu suta'yoo numu puu besa nanasooobedyana. ³³Tamme gi besa manakwe ka besa te matugudu suu'mu besa matuguna. Mu gi tunaka'oedyukudu pana besa mesoo nanamatugu. Tamme sakwa no'obatusoo numu unu soobedyana ka Te Naa-wa'ne'yoona.

k 6:17 Nanakwinga'akwitu ka teepu Judea mee naneadu-nakwanatu tuwazoo ka Jerusalem mee naneadu-nakwanatu tuwazoo, yise ka ba-kumana umu ka Tyre noko Sidon mee nananeadu na'oonnakwitu tooe.

³⁴Tamme sakwa ka mu numu tamme nagutzikudu suu'mu tummatzina, tamme tookwa gi besa manakwe. Mu suta'yoo numu puu nanatummatza'e ka punowsoo oo namakodyukwuna sopedakwatoona.

³⁵Tamme sakwa te wohomu besa soobedya, o'no soo Te Naa besa te sootuhikwu. Tamme ka Te Naa tamme-koobatu-wa'ne'yookwu. Soo Te Naa numu sootuhi tooe gi besa mu tumatugu sapa. ³⁶Soo Te Naa puu tutuha numu soobedya, tamme sakwa punno'o oosoo.

³⁷Gi tunesootzemapana, gi tuwazoo suda numu netammapana, o'no soo Te Naa besa te sooyugwekwu. Tamme ka mu numu suda tamme matukupu soomu'wase, soo Te Naa punno'o te tuma'emukwana soomu'wakwu.

³⁸Tamme ka mu numu tummatzina, soo Te Naa ookow punowsoo te makodyukukwu.

³⁹Tamme sakwa unu besa a nakaduguse, o'no tamme kukumma'akoosoo mesoo tunedyoo'e. Tamme ka gi hemma nakasopedakwadoopana numu too'e tunedyooena, soo numu puu gi tubootabuena kumma'akoosoo gi tubootabuedu numu tzakadukwa'ne'yookwu. Umu nanosoo a tawaga-kwitoo sawehookwu.

⁴⁰Soo numu tunedyooedu ka natunedyooedu oonakwasoo tusopedakwatoo. Pana tamme ka no'okosoo hemma natunedyooese, tamme ka numu tunedyooedu-kwa'nesoo tusopedakwadookwu.

⁴¹⁻⁴²Tamme sakwa gi te pua'a nesagwikipana, ka sagwane oo tuma'emukwase. Tamme sumuna ookow oonakwasoo tuma'emukwa. Hownnekoo yise mu ka mu pua'a pooe-wikoo tuutsekoo hemma mesoo poonne ka mummiesoo pooe-wi hemma egease sapa. Mooe'ugasoo mu sakwa mummiesoo pooe-witu tzatsebooase, o'no mu yaatu poonnena, ka mu pua'a mesoo tummatza'e. Oosoo sakwa mu ka suda mu tumatuguna yugwese, o'no mu ka mu pupua'amu mesoo tummatza'e.

⁴³No'obatusoo tumasuape tu tupooe-kwa'nekoosoo suakute. Mu tumasuape ka besa'hoo a pooe-nakwana suaketu besa'yoo. Mu sutakoo tsa'abu pooe-nakwana suaketu-kwa'ne, mu punno'o gi besa'yoo.

⁴⁴No'obatusoo tumasuape ka pummiesoo pooe-kwa'nesoo suaketu. ⁴⁵Soo numu ka tumasuape-kwa'nesoo tu mane-makoo nasopedakwadookwu, tooe ha'oo soo numu ka besa'yoona toetoo suta'yoona.

⁴⁶Mu ka 'Jesus E Pabe'e,' mee'e natubangana mu sakwa e nakabetseyi. ⁴⁷Ka besa e nakatumayohokudu nu tuukwekwu. ⁴⁸Tupe-kooba besa nobe-toodu-kwa'ne'yoo, oosoo puu ohobu gi namanabue oo matabue. Tooe baa unu hoo'oo ka teepu putoohakwitu patokwanawunu sapa gi ano'a, oosoo ka besa namadabuepuna. ⁴⁹Mu numu ka e unnena nakapana gi oo nakatumayohodu, ka nana tu nobe teepu-kooba oo sagwa matabuedu-kwa'ne'yoo. Soo oo nobe-toona ka baa unu hoo petuse kadoo'oo o patadyoomedikuoo.

7 ¹ Soo Te Pabe'e ka mu ewow numu tunedyooemakwuse, oe'yoona mease, ka Capernaum mee naneadu-wisoo kodyu petuga. ² Soo mu tukwutumadu moohedu wawa'a gi Jew numu, sumuoo ka pumme tummatzidumatu unu soobedya. Oosoo oo tummatzidu unu tuoeyina, ya'ega'a. ³ Soo wawa'a gi Jew nana ka Te Pabe'e onow pupaa petugana nakase, mu Jew numu moohedu Te Pabe'e-matoo taya, oo bina ka pumme tummatzidu oo mabesaku tuunguna. ⁴ Umu ka Te Pabe'e-baa petugase, mee oo netamma, "U sakwa eka wawa'a nana tummatzi. ⁵ Soo wawa'a nana tamme Jew numu unu soobedyana, ka te nanesootuhi nobe te matabuekupu." ⁶ Soo Te Pabe'e yise umu-no mease ka wawa'a nana nobe tzage'e mu manigase, soo tukwutumadu moohedu tu pupua'amu ka Te Pabe'e-matoo taya mee oo netamma, "Nu sukwe wawa'a. Mu Jew numu numme wakwawa'a nuutumooedu. U sakwa gi ne nobe-kwi egeapana, gi hownne'yoo. ⁷ Nu gi maawa'ne'yoona, gi u-matoo mea-wa'ne'yoo. Nu u soo'oedyukute u sukwe yadooahoose, oosoo e tummatzidu besa manekwu. ⁸ Nu punno'o ka numu nanemadunagadyina sopedakwadoo. Nu puu ka nu-koobatusoo unnetoosoo manakwe."

⁹ Soo Te Pabe'e ka meeo na'unnedu nakase, mee ka ewow numu netamma, "Yow yise soo nana tubetse tunaka'oedyukudu. Tooe gi tamme Jew numu-matu pana unu tunaka'oedyukute." ¹⁰ Ka tukwutumadu moohedu pupua'amu ka oo nobe-witoo kodyukase, soo oo tummatzidu mooasoo besa manepu.

¹¹ Oogow moo'o'a soo Te Pabe'e umu tunakatzimodu-no yise ewa'yoo numu punno'o umu-no ka Nain mee naneadu-kwitoo kemmana. ¹² Sumu'yoo toobetse ka mogo'ne penebe dooa ya'e. Soo oo pea o'nosoo tu kooma ya'ekupu. Ewa'yoo umu oo pea nonopua'amu oo-no mea ka tu tooa oo nomatugugakwuse. ¹³ Soo Te Pabe'e ka mu wegease' ka kadoo'oo manidu pea tutuha oo soobedyase mee oo netamma, "Gi yagapana." ¹⁴ Soo Te Pabe'e yise ka ya'edu tzamahoose, mu oo tzagwuudu yise konno pebu'ahoo. Soo Te Pabe'e ka ya'epu toobetse'e mee netamma, "Yotseho." ¹⁵ Soo toobetse katuhoose yadooakooaha. Soo Te Pabe'e punowsoo nobe-kwitoo mu taya. ¹⁶ Mu numu o konnopunnedu meeo nana'unnekooha, "Uune! Esoo togesapa unu pooha-ga'yoo. Soo Te Naa te sootuhina, eka unu pooha-gakoo tu yadooawabe, tamme-matoo tayapu." ¹⁷ Mu numu yise oo nanatuukwekooha ka Te Pabe'e manipu, o'no yise no'yoona numu ka teepu-koobakwitu ka Te Pabe'e-witu naka, mu numu mana tzatzage'e-witu teepu-ga'yoo tooe.

¹⁸ Mu John pupua'amu ka John tuukwe'e no'oko ka Te Pabe'e mane-kwitu. ¹⁹⁻²⁰ Waahoo pumme pupua'amu-matu soo John taya ka Te Pabe'e-matoo. Soo John mee mu netamma, "Mu sakwa ka Jesus tutubenga, 'U haa'a yow Te Pabe'e, pute soo Te Pabe'e saa'a petukwu?' " ²¹ Ka oo-baa pepetugase, soo Te Pabe'e no'obatusoo tuoegoedu numu mabesakute: tsoapagoedu, gi tubootabuedu, tooe hownneko tooe tuoebu. ²² Soo Te Pabe'e mu

nanekwegea, “Mu sakwa ka John tuukwe ka mu poonnena, mu nakana tuwazoo: ka umu gi tubootabuedu numu tubootabue manese, mu toyomodu numu besa momona, mu gi nakatawagadu numu nakatage mu manese, mu numu uagoedu besa manese, mu tuipe numu namayodase, yise ka mu tutuha manedu numu ka Te Naa besa unnepu mu tuukwe. ²³Pana mu ka oosapa e naka'oedyukuna, gi nu-ma nasookwina, mu nasootuhikwu.”

²⁴Ka mu John pupua'amu kokodyukase, soo Te Pabe'e ka John-witu mu numu tuukwe'e, “Ka o'nosoo nuga-kobenasoo, ka oona giba-ma umu uga ka John-baa petugayakwe. Soo John gi waha-tamme tusooyugwedu nana. ²⁵⁻²⁶Soo John gi nanenagadu namasoo'a. Pana umu gi oo-makoo oo-matoo me'a. Mu ka John nakapunnekwuse oo-baa petuga, soo John ka Te Naa yadooawabena. Soo John ka umu o'nosoo Te Naa yadooawabe oonakwa besa'yoo. ²⁷Soo John ka Te Naa poena'ewabe. O'nosoo ka John-witu nabotugu soo Te Naa mee e netamma,

‘U-kobenasoo ka teepu-koobatoosoo nu e poena'ewabe tayakwu, ka mu numu ume petukwu-kwitu oo tunesootabue tuunguna.’

²⁸Soo John no'oko numu oonakwa besa'yoo. Pana saa'a no'yoona numu nu-toohatu, ka John oonakwasoo nasootuhikwu.” ²⁹Ka mu numu mu tuma'emukwadu mee nananeadu-no ka Te Pabe'e John besa oo nemadabu'e, umu besa sokwama ka baa-wi pumme oo matzakadyakwe. Umu meeo, “Soo Te Naa tubetse besa'yoo.” ³⁰Pana umu nanesootuhibu numu tunedyooedu gi nanekwahana, ka John baa-wi namatzaka tuunguna, ka Te Naa pumme netamma-kwa'ne.

³¹Soo Te Pabe'e yise meeo, “Nu mu gi tunaka'oedyukudu-kwitu mu tuukwekwu. ³²Mu mu doodoake-wa'ne gi besa mu pupua'amu-no tuate'a. Mu pupua'amu sumuna mee unakwe, ‘Numme mu tunekwukukwu, mu saa'a nugagonno. Pana mu gi nuka.’ Mu pupua'amu yise mee tuwazoo mu netammakwu, ‘Numme ka suda mu sokwama, mu-no sagwikwu, pana mu gi sagwa'e.’ ³³Soo John ka petuse, gi tuka, gi tuwazoo atsa baa hepe. ‘Soo John numu sukwe poohadu,’ mee mu.

³⁴Ka nuka mu-baa petugase, nu tukana, hepe, mu yise e nesootzema mee unnena, ‘Oosoo nana ewa tukana, sukwe baayina, umu tuma'emukwadu pupua'amu-gana.’ ³⁵Umu sokwamadu numu ka Te Naa unnepu nakasopedakwadoona, ‘Besa'yoo,’ mee unnekwu.”

³⁶⁻³⁷Soo nana Simon mee naneadu ka umu Pharisee mee nananeadu nanesootuhidu-nagatu, ka Te Pabe'e-nabatoosoo ba'e, oo tuka tuunguna. Sumu'yoo otuosoosoo mogo'ne gi toge tumatugudu sapa tooe ka Te Pabe'e ka Simon nobe-wi'yoona ka mu ewa tukana naka. Soo mogo'ne yise besa kwanadu nakwanana tupe-ma namadabuepu osa-wi nakedadu hanena, ka Te Pabe'e-baa petuhooga. Soo Te Pabe'e o sekedabena tukadape, soo mogo'ne oo pepa wunuhoosoo petu.

³⁸Soo mogo'ne yise yagana, ka oo kuku-koobatoosoo yaga pasawehoo. Yise meatzedose tu tzopuhu-ma oo mabasakuse, oo kuku mootuhikwuna'e, yise ka besa kwanadu nakwana'a oo kuku-koobatoosoo totsakwatase oo mawo'nge.

³⁹Soo Simon ka mogo'ne yoo ka Te Pabe'e sootu'nagana poonnena oo sootu'adyina meeoo oo soobedya, "Esoo Jesus tookwa gi ka Te Naa pooha hee-ga'yoo. Masoo sakwa ka Te Naa pooha uga hee-gana soo oo pooha oo sopedakwadooku, ka mogo'ne suta'yoono, o'no masoo sakwa uga gi ka mogo'ne natzamakupana."

⁴⁰Soo Te Pabe'e yise ka Simon soonammena pooha sopedakwadoo, meeoo yise oo netamma, "Nu besasoo u tuukwekwu." Soo Simon yise ka Te Pabe'e mee netamma, "Ha'yoo u e tuukwekwu?" ⁴¹Soo Te Pabe'e oo nanekwegease meeoo, "Waha'yoo numu puu ka sumuoo numu nakutzikute. Sumu'yoo ewatse'e oo nakutzikute, sumu'yoo punno'o huutse'e oo nakutzikute. ⁴²Umu waha'yoo yise gi hownnekoo oo tumanagakute. Soo mu kutzidu yise mee mu netamma, 'Nu ka nuka mu nakutzikuna soomu'wakwu.' Hanotu umu-matu yise unu oo soobedyakwu ka besa pumme oo sootunagase?" ⁴³Soo Simon yise ka Te Pabe'e meeoo nanekwegea'a, "Soo ewa oo nakutzikudu, mee tuwa nu." ⁴⁴Soo Te Pabe'e ka mogo'ne-tamme nakwumunase, ka Simon meeoo netamma, "Nu ka u-baa petuse, u puu gi ka pukwi e tabatsagakwuna e bawununakute. Esoo mogo'ne puu ka e kuku tu yagapu-ma pakedyase yise ka tu tzopuhu-ma a mabasakute. ⁴⁵Esoo mogo'ne puu ka besa nu-matoo soonammese e kuku mootuhikwuna'e, u puu gi e mootuhi ka ha'oo besa nu-matoo soonammena ka e petuse. ⁴⁶Ka besa kwanadu nakwanana e kuku-koobatoosatsakwate e kuku onokoo mawonge u puu yoohoo-ma sapa gi e tzopuhu mahane. ⁴⁷Tooe masoo mogo'ne ewa tuma'emukwakepana, nu yise ka oo tuma'emukwapu soomu'wakwu, masoo ka unu e soobedyana. Nu ka mu numu tuma'emukwadu tuma'emukwana soomu'wa. Susumudu numu ka sagwane tuma'emukwana mee nasooyugwena gi unu e heesoobedya." ⁴⁸Soo Te Pabe'e yise ka mogo'ne meeoo netamma, "Nu no'oko ume tuma'emukwana soomu'wa." ⁴⁹"Haga esoo numu tuma'emukwana soomu'wadu mee naneyugwedu?" mee mu numu tuka aatadu nanatubengu. ⁵⁰Soo Te Pabe'e yise ka mogo'ne meeoo netamma, "U ka nuka naka'oedyukuse u namagwetzoikwu. Besa sapa manena mea."

8 ¹Ka saa'a yise soo Te Pabe'e mana tooe hanotoo tooe ka teepu tanamooanumme ka Te Naa besa unnepu mu numu tunedyooena, mu oo nakatzimodu oosapa oo-nosoo; ²mu momoko'ne punno'o umuno. Sumu'yoo mogo'ne Mary Magdalene mee naneadu oo-nagakoo soo Te Pabe'e uga natakwatsukwuhoo (7) tsoapa tayakwunipu ³yise ewa'yoo soo momoko'ne^m unu besa mamane punnedu ka Te Pabe'e umu oo nakatzimodu nokosoo hemma mu sookwina mu tumukuna mu tummatzidu.

⁴Ewa'yoo numu mana'yoono tooe ka Te Pabe'e-baa petudyakwe yise soo Te Pabe'e mu yadooena, mu natugwengayakwe mee unnena, ⁵"Soo nana tumasua-ga. Yise susumudu soo oo pooe tumasua-matu ka a nadapodo-witoo sawe mea, yise

ka puuwana mu kwakwape mu numu umu-koobakwi mona mu tatuikuna umu gi na'a. Mu hootseba'a yise punno'o mu sukwe soo'a. ⁶Susumudu soo oo poee punno'o unu tupe-gakwitoo sawena, yabe naahookese, yise yabe tagwazuoo ka gi baa-gana. ⁷Susumudu a poee punno'o tsaabu-nagatoo sawehoose, soo tsa'abu yise umu-no naana mu tatzatsebooahoo. ⁸Susumudu besow teepu-koobattoo sawehoose, yise besa na'a, nana'ewa poeedoo'a. Mu sakwa besa e nakapunne.”

⁹Umu Te Pabe'e nakatzimodu yise oo tubenga, “Ha'yoo oosoo unakwe?” ¹⁰Soo Te Pabe'e mee unakwe, “Nu ka Te Naa tuwatzetuguna mu tuukwekwu, mu moosoo oo nakasopedakwadoona nasootuhipu; pana susumudu numu gisoo ookow nasootuha'e, oonne'yoona nu meeo mu natuugwengakute. Tooe mu numu e poonnepana, umu gi e posopedakwadoo. Tooe umu e nakapana, gi e nakasopedakwattoo.

¹¹Soo mu nanatugwengana meeo, soo a poee ka Te Naa yadoo-kwa'ne'yoo. ¹²Susumudu ka Te Naa besa unnepu nakapana gi oo 'oedyukuna, soo gi toge'yoo yise mu tza'emukwana, mu natza'emukwadu yise ka po-koobattoo saweopu-kwa'ne'yoo, yise gi namagwetzo. ¹³Susumudu ka tupe-nagatoo saweopu-kwa'ne'yoo. A poee besa oo-matoo soonamme, tamme yise tuwazoo gi tunaga-kwa'ne'yoo ka nanewohonena, tamme yabesoo tunaka'oedyukumakwu. ¹⁴Tamme ka a poee mu tsa'abu-naga naadu-kwa'ne'yoo, susumudu ka Te Naa unnepu nakase, ewa tu hee towana petukute, yise gi tunaka'oedyukute. ¹⁵Pana tamme ka a poee besow teepuna namasuadu-kwa'ne'yoo. Tamme yise ka besow na'unnedu nakatuguna oo naka'oedyukute.

¹⁶Tamme ka tugootabuagunoo kootabuakuse hekooba oo wunakwu numu ooka poonne-kwi. Gi puu tamme hee-tooha oo watzetugu-wa'ne'yoo. ¹⁷Tugootabuagunoo-wa'nesoo sakwa tamme mu numu ka Te Naa unnena tuukwe. Tamme sakwa ka ooka mu naka'oedyukukwuna petsabena gi mu numu-makoo oo nekwatzetugu.

¹⁸Tamme sakwa ka Te Naa unnena besakoo nakow'ya. Tamme ka sagwane oo nakasopedakwadoona saa'a unusoo oo nakasopedakwadoo manepetugakwu. Tamme yise ka gi oo nakatuguna no'oko te natuukwepu soomu'wakwu.”

¹⁹Soo Te Pabe'e pea oo wanga'amu-no petugonnose yise gi hownnekoo oo tzege'e mane-wa'ne'yoo ka mu numu tubetse ewow. ²⁰Soo Te Pabe'e yise meeo natuukwe'e, “U pea-no u wanga'amu-no mabe puuwana konnopunne, u ba'e.” ²¹Pana soo Te Pabe'e mu numu meeo netamma, “Umu sakwa tooe tuutoepunne, soo Te Naa tunetamma noko hemma oonakwatu. Nu saa'a ka tunemamakwuoose, o'no saa'a nu mu tuukwedooa. Ka mu Te Naa unnepu nakabetseadu nu tubetse nanumu-ga'yoo.”

²²Sumu tabeno soo Te Pabe'e umu pumme nakatzimodu-no sake-wi kuaka. “Tamme sakwa oonakwattoo ka banunadu natsemangega,” mee soo Te Pabe'e mu netamma. ²³Ka togesoo mu me'a soo Te Pabe'e uwehooka. Unu hukwabetu. Soo sake bakaanoga'a umu sumuna patatsopedihookwu. ²⁴Umu Te Pabe'e nakatzimodu unu suihoose, oo netupoonne, mee oo netamma,

“Tamme batatuihookwu.” Soo Te Pabe'e yise tupoonnese, ka hukwapa meeoo netamma, “Gi hukwapana,” ka baa tuwazoo meeoo, “Gi yutsungapana.” Umu yise gi yutsungahoo. Soo Te Pabe'e yise umu pumme nakatzimodu nesagwikute, ²⁵“Mu sakwa uga e naka'oedyuku.” Umu yise meeoo, “Uune! Yow esoo Te Pabe'e, unu pooha-ga'yoo. Soo hukwapa ka baa-no a nakabets'e'a.”

²⁶Soo Te Pabe'e ka mu tu nakatzimodu-no yise natsemangega, ka Galilee pa'oenapa petuga, ka teepu Gerasenes mee naneadu-wi petu. ²⁷Soo Te Pabe'e ka oho bakumana petugase ka sake-wi'yoona tseboese ka sumuoo nana tsoapayidu oo tapoegea. Wuna'me manekapu soo nana gi kwaseana nummenumme. Ka po'woa-ma taage-wi mu numu nakoo-naga nobe-ga'yoo. ²⁸⁻²⁹Mu tsoapa unu natzooe oo mayugwe. Mu numu wehepu namadabue-ma oo too'e tzakunayipana oosoo oo mesoo wuka'akayina natzepoekuyakwe. Soo tsoapayidu nana Te Pabe'e poonnese oo-baa petuse, oo-kobena meatzedopetu. Soo Te Pabe'e ka tsoapa oo-nagakoo tayakwunikwuse soo tsoapa yise ka Te Pabe'e mee netamma, “U sakwa e tsasoopeya. U Jesus, No'oko Hemma Manumudoopu Tooa'a. U sakwa gi e wohonepana.” ³⁰Soo Te Pabe'e yise ka tsoapa tubenga, “Ha'yoo u nane'a?” Oosoo yise mee oo nanekwegea, “Ewa'yoo mee numme nanane'a, numme ka tubetse ewa'yoona.” ³¹Umu tsotsopa yise ka Te Pabe'e meeoo netamma, “Gi ka



Soo te Pabe'e ka tsoapuya'edu nana tapoegea (Luke 8.27)

goso oosapa nidabedu-witoo ne tayapana.”³² Ewa'yoo hogu oona wuta'nedu pedakwana to'o. “U sakwa umuoo hogu-matoo ne tayase numme umu-naga manikwu,” mee mu tsotsoapa ka Te Pabe'e netamma.³³ Soo Te Pabe'e yise mee mu netamma, “Muusoo too'e.” Mu tsotsoapa yise ka mu hogu-naga mani. Mu hogu yise tatanomanegase ka pagadudu-wi padatuihoo.

³⁴⁻³⁶ Mu hogu tatogudu tatanomanegase ka oo hemma manina poonnese no'oko mu numu tuukweyimo'o. Mu numu ka ooka nakowse ka Te Pabe'e-baa petugonno, soo nana ugasoo tsoapayidu besa manepu ka Te Pabe'e-kobena katu besa namasooapu-gana. Mu numu yise oo tu namanena nadugwengagonno.³⁷ Mu numu otuoo ka Te Pabe'e-ma nasooisue oo ta'ya. Soo Te Pabe'e mease yise ka sake-wisoo tsebooe.

³⁸ Soo nana ugasoo tsoapayidu ka Te Pabe'e-no too'e neme'a, pana soo Te Pabe'e mee oo netamma,³⁹ “U sakwa u nobe-kwitoo mease u nanumu tuukwe ka Te Naa ume mabesakuse.” Soo Te Pabe'e yise punowsoo natsemangega. Soo nana ka pumme tu mabesakuse ka Te Pabe'e-witu no'oko numu tuukwe'e.

⁴⁰ Ka Te Pabe'e kodyu petuse mu numu ewa'yoo besa sokwama.⁴¹ Oona yise nana kemma, Jairus mee naneadu, mu nananesootuhidu nematugudu ka Te Pabe'e-kobena meatzedo petugase oo-matoo nanesootuhikooha yise tu nobe-witoo oo pa'e.⁴² Soo Jairus oo penebe padu pudu tsuadumu ya'egana. Soo Te Pabe'e yise Jairus-no mea, mu numu mu takoo'namena.

⁴³ Sumu'yoo mogo'ne hoone tuoeya'ena sumumano wahamatsebooe kudu (12) tomoo petuga too'e natzatonu mu poopooha-ga'yoo mee naneyugwedu, gi besa oo mayugwe.⁴⁴ Oosoo mogo'ne yise ka Te Pabe'e oonakwi kemmahoose, ka oo kwasu pekwiu tzammahoo yise oosoo oo puuhana yoihoo.⁴⁵ Soo Te Pabe'e yise meeo, “Haga oosoo e tzamahoo?” Ka no'oko umu numu ooka gi nesopedakwato, Peter yise meeo, “Ne Pabe'e, ewa'yoo numu u na'oonakwi u takoo'nagena!”

⁴⁶ Pana soo Te Pabe'e yise meeoosoo tuwow, “Haga e tzamahoo? Nu oo wuma ka e pooha tumabesakuhoose.”⁴⁷ Soo mogo'ne yise ka Te Pabe'e pumme sopedakwatoose su'ise, kwebewunu, yise ka Te Pabe'e-kobena meatzedose oo nanekwahakute no'oko mu numu nakana, ka yabesoo besa tu manina.

⁴⁸ Soo Te Pabe'e mee oo netamma, “U besa mani, ka e naka'oedyukuna. Mow yise ka besa manese nummenumme.”

⁴⁹ Soo Te Pabe'e togesoo ka mogo'ne yadoo'adyakwe, soo nana ka Jairus nobe-wi'yoona kemmadu ka Jairus meeo tuukwe petu, “U padu mooasoo ya'eo. Gi ka Jesus u nobe-witoo bipana, nagutza saa'asoo.”⁵⁰ Soo Te Pabe'e oo nakatzama'yu ka Jairus meeo oo tuukwewunu yise ka Jairus meeo netamma, “Gi suda oo soonammekupana, e naka'oedyuku, u padu besasoo manekwu.”

⁵¹ Soo Te Pabe'e yise ka Jairus-no nobe-witoo mea ka pepetugase gi haga tuwazoo oetoo nemeakute, mu Peter, James yise John suu'mu yise ka tsuatuma naanapua'amu-no oe tzoonoohoo.⁵² Umu numu oo na'oona-kwi manepunnena sakwigonno, soo Te Pabe'e meeo mu netamma, “Gi sakwipana; esoo tsua'a gi ya'e, esoo tuusootaboekwu.”

⁵³Umu oo-ma'yoona naneko'e, ka oo sopedakwatoona ka tsua'a ya'epu.
⁵⁴Pana Te Pabe'e oo mi-ma tzakaduse, yise meeoo oo netamma, "Yotseoo."

⁵⁵Soo tsua'a yise tuponnese, yotseoo. Soo Te Pabe'e ka oo naanapua'amu meeoo netamma, "Hemma ka tsua'a manatu maka, esooga tzeaya'e." ⁵⁶Soo tsua'a naanapua'amu oo poo'ne bebu'ahoo ka tu padu yotseoose. Soo Te Pabe'e yise mee mu netamma, "Gi haka tuukwepana ka e manena."

9 ¹Soo Te Pabe'e ka umu sumumano'yoona wahamatsebookudu (12) pumme nakatzimodu nesumuse, yise meeoo mu netamma, "Nu yise nanesootuhibu mu numu mu tunedyooe tayakwu. Mu pooha-gana tsoapa nematzakwunikwu, noko tuoegoedu mabesakukwu tuwazoo, ²yise meadabena mu numu tuukwe, 'Pudusoo soo Te Naa besa te nemadabuekwu.'" ³Soo Te Pabe'e tuwazoo meeoo mu netamma, "Gi mu hemma hanegapana, mu kwasu, gi hemma puma mu tumukwuna tuwazoo, yise gi nadukadu. ⁴Ka sumuoo nobe-kwi petugase gi meapana mu sakwa ononasoo kumma'a-kwitoosoo meadooda. ⁵Ka mu numu besa na'unnepu gi mu naka'oedyukute, ka umu-baa'yoona meana, ka koosebu mu moko-makoo tata'neka. Ka 'yoo mu manena oo sopedakwadookwu umu suda manakwe ka gi mu nakapunnena. ⁶Mu yise meana nanesootuhibu mu numu tunedyooena yise ka tuoegoedu mabesaku mea'a tuwazoo." ⁷⁻⁹Ewa'yoo mu numu ka Te Pabe'e nesoobedyana, yise umu-matu meeoo, "Ha'oogina masoo Elijah?" umu-matu meeoo. "Oosoo Jesus ka umu Te Naa o'nosoo tuukwewabe-kwa'ne'yoo." Mu Jew numu pabe'e Herod mee naneadu ka Jesus-witu nakase, yise meeoo, "Nu ka mu tukwutumadu ka John batsa tuungu. Oosoo John yise sumuna tuusootabuepu." Soo Herod yise ka Te Pabe'e nepoonne.

¹⁰Soo Te Pabe'e ka mu tunakatzimodu-no numu-wanaroo mea ka Bethsaida mee naneadu-tamme. ¹¹Mu numu ka mu meana nakase mu nageka. Oosoo Te Pabe'e Jesus yise besa soonammese ka Te Naa besa unnepu mu tunedyoo'e ka mu tuoegoedu mabesakuna.

¹²Ka tu taba ekowgase, mu wahamatsebookudu (12) tunakatzimodu meeoo ka Te Pabe'e netamma, "Soo yaatu numu kwinga'yoona, kadoo'oo hee. U sakwa mu numu taya umu mana mease tu tukakwuna hanedooakwu." ¹³Pana soo Te Pabe'e Jesus meeoo mu netamma, "Hemma sakwa tamme mu maka?" Mu oo nakatzimodu yise meeoo ka Te Pabe'e netamma, "Numme manegeoo tukaba-ga'yoo yise waahoo pakwe-ga'yoo. Pute sakwa numme mease mu ewow numu tukapu tumukudooa?" ¹⁴Tubetse ewa'yoo (5000) nanana o. O'no yise soo Te Pabe'e mu tunakatzimodu meeoo netamma, "Mu numu sakwa ka poohegea-kooba sapa aata'apunne."

¹⁵Umu Te Pabe'e nakatzimodu yise pumme oo netamma-kwa'ne manese yise no'yoona aatahoo. ¹⁶Soo Te Pabe'e yise ka mu aatahoose ka tukaba noko pakwe hemahoose togoopatu poonnese, nanesootuhikooha. O'no yise ka tukaba noko pakwe tzabokase, mu ewow numu ka umu pumme nakatzimodu maka tuungu. ¹⁷Mu numu no'yoona yise ewa

tukase, wutzu'me. Ka mu numu wutzu'mese mu Te Pabe'e nakatzimodu ka a nagupenina tunoka wahamatsebookudu (12) kawona kaanoku.

¹⁸ Soo Te Pabe'e ka Te Naa-matoo nanesootuhi mu nakatzimodu oo-no. Soo Te Pabe'e ka umu tunakatzimodu meeoo tubenga, "Hownne'yoo oosoo nana mee mu numu nu-kwitu netamma?"

¹⁹ Umu tunakatzimodu yise meeoo ka Te Pabe'e nanekwegea, "Susumudu numu, 'Ume ka numu baa-wi matzakadu John' mee netamma. Susumudu numu yise meeoo, 'Soo Jesus Te Naa yadooawabe Elijah mee naneadu.' Susumudu numu punno'o meeoo, 'Ka mu Te Naa yadooawabe-matu.' mee u-kwitu netamma." ²⁰ Soo Te Pabe'e ka tu nakatzimodu meeoo netamma, "Ha'yoo mu puu e soobedya?" Soo Peter oo nekwegea, "U yow Ne Pabe'e ka Te Naa numme-matoo tutayana." ²¹⁻²² Soo Te Pabe'e meeoo mu netamma, "Gi meno'o numu tuukwepana, nu yow Mu Pabe'e. Mu Jew numu yadooakudu gi e petzape, unu e kusekase, e batsase yise waha tooise saa'a nu tusootaboekwu."

²³ Soo Te Pabe'e yise no'oko mu numu, ka umu tunakatzimodu-nokosoo mee mu netamma, "Tooe haga tooe nu-wi tunaka'oedyukudu sakwa mee unne oosoo gi hownne'yoo, tooe mu ka nu-koobatoobatsase sapa, mu e nagenokwu. ²⁴ Tamme ka tammesoo too'e namagwetzoina tamme kadoo'oo namayugwekwu, mu ka nu-koobatoobatsase kadoo'oo mesoo namayugwena mu namagwetzoikwu. ²⁵ Tamme ka teepu-kooba'yoonaa ewow hee-ga'yoo pana ka te ya'ese oosoo gi te magwetzoikwu-wa'ne'yoo. ²⁶ Gi oosoo te gwetzoina tumu-wa'ne'yoo. Tooe haga tooe nu-ma nasookwina, no'oko e unnepu tuwazoo, nu yise punno'o, saa'a mu-ma nasookwikwu ka Te Naa pooha-toohakwi e petuse, ka togoopatu e tutummatziwabe mu toha kakasa-ga-no. ²⁷ Nu togesapa mu tuukwepu susumudu mu yaa konnodu gisoo tuina e pooha-gana poonnekwu."

²⁸ Sumu nasatase, soo Te Pabe'e ka umu tu pupua'amu tuukwe, mu Peter yise James noko John nano mu mea tuunguna, oona giba-matoo nanesootuhigakwuse. ²⁹ Togesoo oo nanesootuha'e oo koba atasoo tabuaga'a, yise pukwi oo namasooana tohawiya'negase patakwetseapunne.

³⁰ Yise waha'yoo nanana o'nosoo Te Naa yadooawabe Moses-no Elijah mee nananeadu oo-baa tabua petu. Umu punno'o patakwetseapunne.

³¹ Nanano apegeadyakwe ka Te Pabe'e besa manekwuna ka Jerusalem-wi'yoonaa tamme-koobatoobatsase. Soo Te Pabe'e yise te magwetzoikwu. ³² Soo Peter tu pupua'amu-no usumeadyakwe umu ka tupoonnese umu ka mu pihoo o konnodu patagwetseapunne mu poonne. ³³ Mu Moses-no Elijah memeahookwuse, soo Peter gi ha'yoo unne-wa'ne'yoo, ka Te Pabe'e mee netamma, "Besa numme ka kemmase. Numme pihoo mu tatza nobe-dookukwu, u sumuoo mu Moses-no Elijah punno'o namesusu'mu." ³⁴ Togesoo oo yadooadyakwe, soo koomeba mu haba-gakuhoo petu, umu-koobakwi manikese, mu tunakatzimodu sua'e. ³⁵ Soo Te Naa yise koomeba naga'yoonaa mu yadooee mee mu netamma, "Esoo yow E Besaa Tooa, nu a netutzea. Mu sakwa a nakabetsea." ³⁶ Soo Te Pabe'e suu'mu yise umu-baa mani. Ka o'no umu gi haga tuukwe'e ka a namanina.

³⁷Ka giba-ma'yoona mu sawekese ewa'yoo mu numu yise mu takwi. ³⁸Umu naga'yoona sumu'yoo nana yise ka Te Pabe'e meeoo netamma, "E tooa sakwa u mabesaku, oosoo tsoapayina gi besa manakwe. Oosoo e besaa tooa. ³⁹Tooe hano'yoona tooe soo tsoapa oo-ma tabua'ana soo e tooa ya'eookayakwe, oobenakwatoosoo unu nuummaba wumayakwe. ⁴⁰Nu umu ume nakatzimodu too'e nematzagakwuni tuungu umu yise gi oo mabu'a." ⁴¹Soo Te Pabe'e yise meeoo mu netamma, "Mu gi e nakabets'e'a tooe nu wuna'me yaa mu-baa'yoona mu gi e naka'oedyukute. Ka naatse yaatoo tzakowke." ⁴²Soo naatse ka Te Pabe'e poonnese ya'eooka.

O'no soo Te Pabe'e ka tsoapa nematzagakwunise ka naatse magwetzo'i ka tsoapa-makoo. Soo na'atse ka besa manise soo Te Pabe'e oo naa-matoo oo nemawunihoo. ⁴³Mu numu yise ka Te Naa nesookwugi.

Mu numu yise mee nananetamma, "Soo Te Pabe'e ka unu pooha-gana nanasookwugi tumadabue." Soo Te Pabe'e ka umu pumme nakatzimodu mee netamma, ⁴⁴"Mu sakwa a tubetse soomayu ekow na'unnepu nu saa'a nakwutumakwu." ⁴⁵Umu oo nakatzimodu gi oo nakasopedakwadoo ka meeoo oo unakwe. A nawatzetugu-kwa'ne umu oo nakasoobedyana ooka tu tubengukwuna nasoogwa'e ka meeoo oo unakwe.

⁴⁶Umu Te Pabe'e nakatzimodu puusoo gi nanatoge'yookute ka noo'yoo meeoo tusooyugwena, "Nu yow oo oonakwatusoo." ⁴⁷Soo Te Pabe'e oo sopedakwatoosoo ka mu tusooyugwena, oosoo yise sumuoo ka tuha'akoo nabaa tzakwunukuna ⁴⁸umu pumme nakatzimodu mee netamma, "Sumuna mu no'yoona mee soonamme nu sakwa mu moohe. Soo sumu'yoo mu-matu gi maawa'ne nanasoobedyadu gi yoo tuha'a-kwa'ne saa'a mu moohedooa. Ka tuha'akoo tummatzina nu-koobatoo, ka nugatuna nuka tummatzidu-kwa'nesoo manepunne ka E Naa tuwow tummatzipunnesoo."

⁴⁹Yise soo John ka Te Pabe'e meeoo tuukwe'e, "Numme sumuoo nana poonne, ume pooha tooha-kwi tsoapa tayakwunidu. Numme yise meeoo oo netamma, 'U sakwa gi mu tsoapa tayakwunipana ka Ne Pabe'e pooha-ma, ka gi numme tunakatzimodu-matuna.'" ⁵⁰Soo Te Pabe'e yise meeoo oo netamma, "Mu sakwa uga gi meeoo ka nana netammapana. Tooe haga tooe e nanea-ma ka tsoapa nematzagakwunidu tookwa te tummatzidu, oosoo ka gi te wohonena." ⁵¹Soo Te Pabe'e oo sopedakwatoosoo Te Naa pudusoo namatasoo oo bikwu. Soo Te Pabe'e yise meeoo tusooyugwe, "Nu sakwa ka Jerusalem-witoo mease mu numu-no nanesootuhi." ⁵²Susumudu tu pupua'amu-matu mooe taya ka mu wakwawa'a Samaritan mee nananeadu numu-matoo mu tutubenga tuunguna umu-baa tooikwu mee tusooyugwena. ⁵³Mu Samaritan numu gi Jew numu toge'yookute ka Jerusalem-wi'yoona mu paba nananesootuha'yoo. Mu oo tutayana oo wegeatooase yise meeoo oo tuukwe, "Umu wakwawa'a gi u nenabaa'yookute." ⁵⁴Waha'yoo umu Te Pabe'e nakatzimodu-matu James-no John mee nananeadu mu nakase mee ka Te Pabe'e netamma, "Tamme sakwa ka Te Naa-matoo nanesootuhi umu wakwawa'a numu sakwa natuni."

⁵⁵ Soo Te Pabe'e yise umu-tamme nakwumunase mee mu netamma, “Gi suda unnepana.” ⁵⁶ Umu yise kumma'abasoo numu-baa tooikwu.

⁵⁷ Ka podo-toogoo mu meadape soo nana ka Te Pabe'e meeoo netamma, “Nu tooe hano tooe u mea nu u nagenummekwu.” ⁵⁸ Soo Te Pabe'e yise meeoo oo netamma, “U ka nu-no'yoona gi nobe-gakwu. Mu etza'a puu ka teepu-naga to-ga'yoo, mu hootsebaa'a punno'o sunngabe-ma nonobe-ga'yoo, pana nu yise gi nobe-ga'yoo.”

⁵⁹ Soo Te Pabe'e ka sumuoo nana meeoo netamma, “U sakwa nu-no maneka.” Soo nana yise ka Te Pabe'e meeoo nanekwegea, “Nu sakwa e naa-no nummenummese, ka oo ya'ese oo tuguse, saa'a u-no tzabekadooa.”

⁶⁰ Soo Te Pabe'e meeoo oo netamma, “Meno'osoo nu-no maneka. Mu-matusoo gi tunaka'oedyukudu saa'a ka mu naa mabetseadooa.”

⁶¹ Kumma'yoosoo nana punno'o meeoo, “E Pabe'e, nu sakwa punno'o u-no manenumme; pana mooe'ugasoo nu mu e nobe-kwitusoo mu mooe tuukwekase nu u-no tzabekadooa.” ⁶² Te Pabe'e yise meeoo oo netamma, “Soo tooe haga tooe e naka'oedyukudu sakwa gi punowsoo kodyupana.”

10 ¹ Soo Te Pabe'e ka ewahoo (70) numu tutunedyoemodu meeoo netamma, “Nu mu numu-matoo wakwaha-kwikoo mu tayamena ka pukwi e petugakwuna, ka Te Naa besa unnepu mu tuukwena. ² Gi haga ka Te Naa besa po-witu mu tuukwe. Ewa'yoo mu numu ka Te Naa besa unnepu nakasoogwidu. Pana hu'yoosoo ka Te Naa unnepu mu numu tunedyoedu. Tamme sakwa ka Te Naa-matoo nanesootuhi mee unnena, ‘U sakwa ewowsoo numu netutzea ka besa u unnepu wahakwudu. O'no yise ewa'yoo numu u-kwitu nakana, u naka'oedyukukwu.’

³ Mana mea, nu mu tayakwu mu sutahoo numu-nagatoo.

⁴ Gi hemma hanegapana, gi nobenepana, gi mago'o, gi mu moko, yise gi numu yadooepana ka meana. ⁵ Ka tooe hanotu nobe-kwi pudu egea-kakwuse besow mu numu oe nobe-gakoo mooe nekwiku. ⁶ Ka nanesootuhidu oo nobe-gakoo oo nanesootuhiku, oosoo besa'yookwu. Umu ka suta'yoona soo besow umu mu nekwipu mu-matooosoo namakodyukukwu. ⁷ Tooe hano tooe mu-baa'yoona osoo saa'a tukana, hebena tuwazoo. Gi oo nasookwipana o mu natummatzina gi nana'atakoosoo nobe-toogoo me'a. ⁸ Ka mana tooe hano tooe petugase, ka u namakana tuka, gi oo nabeatsegapana. ⁹ Mu tuoegoedu nanesootuhikuna mu mabesakuna ka no'oko mu numu meeoo netamma, ‘Pudusoo soo Te Naa te nemadunagakwu.’ ¹⁰ Ka tooe hano tooe petugase ka mu numu gi mumme toge'yookute, gi umu-baa'yoopana. ¹¹ Mu tsasoopedya, oe'yoona mea mu tunesootabue ka gi toge mu manena umu-matooosoo kodyukwu ka gi te oedyukuna. ¹² Nu yise mu tuukwe saa'a ka Te Naa mu numu nemadabuekwu, soo suda mu tumatugupu umu-matooosoo kodyukwu, ka o'nosoo tu namane-kwa'nesoo, soo suta'yoo puu ka Sodom mee naneadumatoosoo namakodyukuse, umu nakootzasooa.”

¹³⁻¹⁴Soo Te Pabe'e tuwow mee, “Mu numu ka mu Chorazin noko Bethsaida mee nananeadu-wi nonobe-ga'yoo tooe umu nana'ewasoo e besa pooha manekena poonnepana umu gi e oedyukute. Sumuna soo mu tuma'emukwana umu-matoosoo kodyukwu, nu ka oo too'e wahana, umu gi oo naka'oedyukuna. Mu numu ka Tyre noko Sidon-wi nonobe-ga'yoo ka o'nosoo sakwa ka mumme poonnena e oedyukuna gi uga nagoekwu. Ka Te Naa numu nemadabuekwuse mumme manena umu manepu oonakwa suta'yoo.

¹⁵Mu numu ka Capernaum-witu nonobe-ga'yoo punno'o gisoo besa'yoo. Mumme ma'emukwana sumuna punno'o mu-matoosoo kodyukwu ka gi e oedyukuna punno'o.

¹⁶Soo tooe haga tooe unu e naka'oedyukute Te Naa naka'oedyukudu tuwazoo. Soo tooe haga tooe punno'o nuka gi toge'yookudu, Te Naa tuwazoo gi toge'yookute. Soo Te Naa yaatoo mu-matoo e taya.”

¹⁷Saa'a mu ewa'yoo nanana Te Pabe'e tutuyana oo-baasoo petugase mee oo netamma, “Numme u pooha-ma ka mu tsotsoapa nematzagakwunina, umu mea'ayakwe.” Soo Te Pabe'e yise mee mu netamma, ¹⁸“Meno'o yise soo e wohonedu soo suta'yoo namatzoekuhoo. ¹⁹Nu mu besa pooha-makapu o'no soo suta'yoo gi hownnekoo mu matzoekute. Gi hee mu matzama-wa'ne'yoo. Tooe mu togogwa-kooba tatukuse sapa oosoo gi how mu yugwe-wa'ne'yoo. ²⁰Ka mumme e pooha-maka gi ookow madumotseagapunne, pana soo gwtzoiibu yise Te Naa mumme sootuhipu, o yisetu.” ²¹Soo Te Pabe'e punno'o tubetse besa soonammena meeo nanesootuhi, “Ne Naa u no'okosoo hemma ka teepu-koobatu yise ne pa'anakwitu tuwazoo nemadabue. U tubetse besa'yoo u ka umu u dooamu ka besa etzaga u unnepu nakasopedakwadookwuna mu sootuhipuna, tooe gi unu mu natunedyooepu sapa. Umu unu natunedyooepu, gi gea u unnepu nakasopedakwadoo. Yoonnekoo u tusooyugwepu-kwa'ne.” ²²Soo Te Pabe'e yise ka mu numu mee netamma tuwow, “Soo E Naa no'okosoo hemma e sopedakwatoona e sootuhipu. Oosoo suu'mu e sopedakwatoona. Nu punno'o ka E Naa sopedakwatoona nu ka numu oetu nakasopedakwadookwuna mu mesoo tuukwe.” ²³⁻²⁴Soo Te Pabe'e yise ka umu pumme nakatzimodu mee netamma, “Soo Te Naa tubetse besa ka besa e unnepu nakasookwina. Pana umu te nanamooatupu gi ooka nasootuhi. Meno'o yise mu e poonnena ka besa e unnepu nakasopedakwatoona.”

²⁵Ewa'yoo numu ka Te Pabe'e naka aata'a. Sumu'yoo nana ka mu Jew tumayohope numu tunedyooedu ka Te Pabe'e too'e nekwesekuna wunuoose mee oo tubenga, “Ha'oo besa sakwa saa'a nu manese ka ya'ese, ka Te Naa-baatoo mea?” ²⁶Soo Te Pabe'e oo nanekwegea, “U ka te tumayohope nea, hayoo puu oosoo oetu na'unakwe?” ²⁷Soo nana ka Te Pabe'e nanekwegea punno'o meeo yise, “Tamme sakwa ka Te Naa unu soobedya, no'oko te sokwama-ma ka hemma how te yugwena tuwazoo. Tamme sakwa te pupua'amu tuwow besa soobedya, tammesoo nasobedya-kwa'ne.” ²⁸Soo

Te Pabe'e yise meeoo oo netamma, “U togekoo e nanekwegea. U ka ekow unnepu nakabetseana, saa'a u oosapa ka Te Naa-baa nobe-gakwu, ka ya'ese.”

²⁹Soo nana yise tu tumatu'adyina sopedakwatoona ka Te Pabe'e mee tubenga, “Haga yise nuga pua'a?”

³⁰Soo Te Pabe'e yise meeoo tuwow mu natugwengakooha, “Sumu'yoo Jew nana ka Jerusalem mee naneadu-wi'yoona tubongo meana ka Jericho mee naneadu-kwitoo. Umu tuduhadu oo moodyugwese no'oko hemma oo-makoo hanehoo oo too'e batsahoo ka po-kumaba oo ma'wuhooka.

³¹Ka saa'a oosoo Jew nanesootuhidu o kemmana, oosoo ka unu namooedyugwepu nana onoko poonnese ka po oo tookana-kwi oo-moopa meahoo. ³²Saa'a yise punno'o oosoo Jew nanesootuhidu tummatzidu o kemmana ka nana poonne oosoo yise punno'o oo-moopa meahoo.

³³Sumu'yoo numu mu Jew gi petzabedu saa'a punno'o o kemma. Oosoo ka unu namooedyugwepu nana poonne, tutuha oo soobedyana tooe ka nana Jew sapa.

³⁴Oosoo yise oo-matu meahoose natusooa-ma oo mahanese, ooka oo wupagakute. Ka tu pookoo-kooba o tzatseboose ka numu tooi nobe-witu oo hanehoogase onanoko oo mabetsea.

³⁵Awamooa yise ka tooi nobe hee-gakoo nana tumanagakuse mee oo netamma, ‘Ka namooedyugwepu e mabetseaku. U ka ewowsoo tzasooase, nu saa'a ooka u tumanagakudooasoo, nu ka kodyupetuse.’

³⁶Ha'oo yise, hanotu umu-matu ka nana unu namooedyugwepu pua'a?” ³⁷Soo nana ka Te Pabe'e nanekwegea, “Esoo nana oo tummatzise oo pua'a mane.” Soo Te Pabe'e yise ka nana mee netamma, “U sakwa punno'o no'obatusoo numu soobedya, no'obatusoo pupua'amu-ga.”

³⁸Mu Te Pabe'e yise ka mu pumme nakatzimodu-no oosapa meadabena ka numu nokadu-kwi petugonno. Sumu'yoo mogo'ne Martha mee naneadu yise naba mu tuka tuungu. ³⁹Soo Martha punne'e Mary mee naneadu oosapa ka Te Pabe'e-kumaba katuna, oo nakakatu oo yadooadyakwe. ⁴⁰Soo Martha gi namadamawunu, ka tukapu mu mahanekuwununa. Soo Martha yise ka Te Pabe'e mee netammadoo, “Nu ka tukapu gi namadamawunu, u sakwa ka Mary nuka tummatzi tuungu.” ⁴¹Soo Te Pabe'e ka Martha meeoo netamma, “Gi ka tukapu-witu suda nasooyugwewunupana. ⁴²Soo e unnekatuna ka te tukakwuna oonakwa'yoopunne. Soo Mary soo besa e nakasoobedyana. Oonne'yoona gi nu a tayahoo.”

11 ¹Soo Te Pabe'e ka mana tooe hano'yoona tooe nanesootuhidyina tunemamakwuse soo sumu'yoo oo nakatzimodu meeoo oo netamma, “Ne Pabe'e, ne nanesootuhi tunedyoee, ka John umu tu nakatzimodu tunedyoee-kwa'nesoo.” ²Soo Te Pabe'e yise meeoo mu netamma, “Ka nanesootuhina mee unneyi, Ne Naa ne pa'anakwatu, u tubetse besa'yoo. U no'oko numme-kooba pooha katudu. Numme no'oko numu yaa teepu-koobatu ume mu nakabetseana soogwa'e, ka u-baatu-kwa'nesoo. ³Nonotsa tu tabe mea-kwi tukapu gi ne namatuugekwuna. ⁴Ka ne tuma'emukwana soomu'wana



Soo te Pabe'e ka Mary Te Naa-witu tuukwe (Luke 10.39)

numme puu oo soomu'wa ka mu numu suda numme matugu. Ne matzino kaaheno ne mayugwe. O'no numme besa-kwitoo tsebooe petugakwu.”

⁵Soo Te Pabe'e yise umu pumme nakatzimodu meeoo netamma, “Tamme sakwa oosapa nanetsagwayidi. Mu numu nanetsagwayina 'yoo manepunne. How sakwa puu tamme ka togabeno ka tu pua'a nobe-witoo mease ka oo yadoo petugase mee unnena, ⁶E pua'a mana kwinga'atu pudu petuhoose, nu gi hemma oo maka-wa'ne manepunne. U sakwa pihoo tukaba nano'hona e hemepunne?’ ⁷Sumuna soo u pua'a gi u tutzakwonakwu-wa'ne'yoo ka mooasoo habena, umu oo doodoamu tuwa mooasoo bokwa, oosoo yise gi yotsese u maka-wa'ne'yoo. ⁸Pana saa'a pumme u nenoyukwe oosoo yotsese ka natzakwona tzakwuna, yise u makakwu. Tamme nanesootuhidyina o'nosoo soo Te Naa te sootuhise ka natzakwona tzakwonase, te makakwu.

⁹⁻¹⁰Nu yise meeoo mu netammakwu, tutubenguse u nageakwu, oo watena u oo mayukwu, tutokangese u natutzakwonakukwu. Soo tooe haga tooe tutubengadu oo nageakwu, soo tuwatedu oo mayukwu, soo tutokangedu oo natsakwonakukwu. ¹¹⁻¹²U puu ka u tooa'a ka pakwe nekwa'e gi togogwa oo gea-wa'ne'yoo. ¹³Tooe tamme gi totoge'yoopana puu te dooamu besa matugu, soo Te Naa yise tamme besa matugukwu Tu Besa Pooha-matu-ma te sootuhikwu.”

¹⁴Soo Te Pabe'e ka tsoapayidu nana gi besa yadooadu nanesootuhikuse, yise ka oo namabesakuhoose soo tsoapayidu nana besa manese, yadooawunu. Mu numu

ka Te Pabe'e ka nana namabesakuse oo poonnena oo nesookwuga'e. ¹⁵Susumudu mu numu ka oo nakana yise meeoo nana'unakwe, "Esoo nana Jesus ka tsoapa nematzagakwunihoo. Oosoo ka umuoosoo pooha-ma oo mu yugwewunu."

¹⁶Susumudu yise ka oo manena poonnena gi oo soo'oedyukuna unusoo oo pooha manikwuna nepoonne. ¹⁷Soo Te Pabe'e ka mooasoo pumme mu sooyugwena sopedakwadoona, mee mu netamma, "Mu numu ka pumme moohedu gi nakabetseana nanano nananepetukana, soo mu moohedu gi mu numu moohe-wa'ne tabu'a, mu numu yise kadoo'oo sukwe namayugwekwu. ¹⁸Mu gi toge unakwe mu ka, 'Numu poohadu,' mee e netammama. Soo numu poohadu gi hownnkoo nanesootuhina ka tsoapa numu-nagakoo nematzagakwuni-wa'ne'yoo. Soo suta'yoo gi ka tsoapa numu-nagakoo nanematzagakwunina petzape, umu tsoapa ka oo tutummatzina. ¹⁹Mu Jew numu moohedu puu ka mu tsoapa numu-nagakoo nanesootuhikuna mu nematzagakwuna'e. Mu puu gi numu poohadu mee mu ne'a. Mu sakwa gi nuka meeoo soobedyapana. ²⁰Ka Te Naa Besa Pooha-toohakwi nu nanesootuhina mu tsoapa nematzagakwuni, mu sakwa meno'o oo sopedakwadoo soo Te Naa no'oko numu sootuha'e. ²¹Nu ka mu susutakoo moohedu oonakwasoo unu pooha-gana nuga pooha oosapa oo matzoekute. Soo natzooedu nana puu ka tu hemma besa takonena gi hee oo matzoekute, ²²pana ka numu tzakunase o'no yise oo hemma hanekwu. ²³Yooosoo nu ka sutakoo yugwese o'no nu mu numu magwetzoikwu ka suta-makoo. ²⁴Soo tsoapa ka numu-nagakoo natayase, kumma'akoosoo puma tu kaduookwunu wate, pana gi tuma'yu, yise ka gi tuma'yuna meeoo unakwe, 'Nu punowsoo kodyukakwu.' ²⁵Ka numu punaga'yoo tumeahoopu mayuse, oosoo numuna sumuna gisoo ka Te Naa Besa Pooha-ma nasoonatza'ena. ²⁶O'no yise soo tsoapa natakwatsukwu (7) kukumma'akoosoo tsotsoapa pumme oonakwa unu susutakoosoo bise ka punaga'yoona tumeapu-nagatoosoo kodyukakwu. Soo nana yise unusoo suda namanatzayakwu."

²⁷Sumu'yoo mogo'ne oonow numu-naga wunudu ka oo nakase meeoo oo netamma, "U pea sakwa nasootuhi ka u dooa'adoose yise ka u petzekuse tuwazoo." ²⁸Pana soo Te Pabe'e meeoo oo netamma, "Oo mu numu ka Te Naa unnepu nakana, ka oo oedyukuna umu unu nasootuhikwu," mee.

²⁹Ka mu numu ewasoo manemena soo Te Pabe'e yise meeoo mu netamma, "Mu suta'yoo numu gi e naka'oedyukudu ka nanasookwugi besa e manena poonnese e naka'oedyukukwu suu'mu, mee mu tusooyugwe. Ka o'nosoo Te Naa yadooawabe, Jonah mee naneadu ³⁰ka mu wakwawa'a numu Te Naa unnepu tuukwena mu oo naka'oedyukute. Nu yise yow Mu Pabe'e mu-baa petuse pana mu gi e naka'oedyukute. ³¹O'nosoo soo mogo'ne mana mu taba mea-nakwatu numu nehane katudu, puu kwinga'a kemma ka mu Jew numu-kooba katudu Solomon mee naneadu oo tunetammama nakakwuse, 'Ka unu oo sopedakwadoo,' mee neyugwena. Tooe nu ka Solomon oonakwa unu tusopedakwadoopana mu gi e nakabetse'a. ³²Ka numu paba nanehaneno'o mu

wakwawa'a ka Jonah naka'oedyukupu sakwa mu nemadabue ka mu meno'o gi nuka naka'oedyukudu, tooe nu ka Jonah oonnakwa pooha-gakooapa.

³³ Soo besa e unnepu tukootabuakunoo kootabua-kwa'ne. Tamme puu ka oo kootabuakuse paa'a hee-kooba oo wuna. O'no soo tooe haga tooe petudu no'oko hemma mesoo poonne. Gi tamme puu kawona-tooha oo watzetugu.

³⁴ Soo te poee puu tukootabuakunoo-kwa'ne'yoo. Tamme ka besow poonnena suu'mu tamme besa'yookwu, pana tamme ka sutakoo poonnena suta tusooyugwekwu. ³⁵ Tamme ka besow nakasopedakwatoo, ³⁶ tamme besa'yookwu.”

³⁷ Ka Te Pabe'e yadooawunu, sumu'yoo nana nasootuhidu Pharisee mee nananedu-nagatu punno'o oo tuka tuungu. Oosoo yise oo-no tuka kaduhoo.

³⁸ Mu Jew numu tu mi moee bakomase tuka, ka oo tumatuguna. Soo Jew nana yise meeoo soonamme, “How manena soo Jesus tuka gisoo tu mi bakomana?” ³⁹ Te Pabe'e yise mee ka nana netamma, “Mu Jew numu tumatuguna, puu besa ka mu tookoomatsu'a, pana soo mu soonammena togesoo totsa'a, ka numu mooa-gana mu suta'yoo. Ka tseda-kumitu suu'mu matsuaana soo oetu togesoo totsa'a. ⁴⁰ Te Naa namekoo mu mi noko mu soonammena matabuepu. Te Naa yise namekoo gi mu totsana sookwa'e. ⁴¹ U ka mu tutuha manedu numu makana u besa'yoo.

⁴² Mu Pharisee nananesootuhidu tooe gi haanoko hemma hanepana mu ka Te Naa tosamakayakwe. Mu besa manakwe ka oo tosamakana. Mu gi ka Te Naa besa unnepu nakabetsea ka Te Naa unu soobedyanaka kukumma'akoosoo numu besa matuguna, mee na'unnena. ⁴³ Mu Pharisee nananesootuhidu mu ka tu na'ewa tuka besa-kwi moee aatahooyakwe, ka tu nananesootuha'e mu tuwazoo oosoo. Mu kukumma'akoosoo numu, ‘Oosoo besa nananesootuhidu,’ mee mumme mu netamma soobedy. Mu tuma'emukwana saa'a mu maatoosoo kodyukwu. ⁴⁴ Mu suda manakwe ka kukumma'akoosoo numu ne'emukwana ka Te Naa besa po oemota mu moohena.”

⁴⁵ Sumu'yoo ka nananesootuhibu tunedyoedu-matu ka Te Pabe'e mee netamma, “U suda numme-witu waha tuwazoo.” ⁴⁶ Soo Te Pabe'e yise mee oo netamma, “Mu nananesootuhibu numu tunedyoedu punno'o mu tuma'emukwadu mu-matoosoo kodyukwu. Mu ka mu kukumma'akoosoo numu unu namanedu tumayohope nage tuungu pana mu gi hownnekoo ooka mu mayoho tummatzi-wa'ne'yoo.

⁴⁷ Mu puu ka o'nosoo Te Naa yadooawabe besa nanomatuoo'na, ka umu mu nanamooatupu tugoena besa matabuena. ⁴⁸ Mu tookwa ka mu nanamooatupu tugoena toge'yookute, o'no mu ka mu nanomatuoonana besa matabu'e. ⁴⁹ Soo Te Naa gi hemma watzekudu mee unakwe, ‘Tooe nu ka umu e yadooawabe umu-matoo tayase sapa umu mu kusegana mu ko'ehookwu.’ ⁵⁰⁻⁵¹ Mu oe naneyukwe ka no'oko Te Naa yadooawabe goese.

⁵² Mu nananesootuhibu tunedyoedu ka puusoo gi ka Te Naa nakabetseana gi hownnekoo ka Te Naa nakabetsea-kwitu mu numu tunedyoee-wa'ne'yoo.” ⁵³ Ka Te Pabe'e meahookwuse mu Pharisee unu oo sutakuna oo tooe nemasutana, ⁵⁴ o'no oosoo suda unnise umu ookow oe neyugwekwu mee too'e sokwamana.

12 ¹Ewa'yoo mu numu ka Te Pabe'e-baato kemmana, ka tubetse ewa'yoona ka Te Pabe'e takoo'na, nanakwukutzu'nena ka wogo manepunnena. Soo Te Pabe'e yise ka mu nakatzimodu tu tunedyoohookwuna pedukwunu meeoo yise, ²“Mu sakwa gi suipana ka besa e unnepu mu numu tuukwe. ³Ka mu nawatze natuukwena sapa waha, ha'oo puu soo togano-kwitu puu ka tu tabua-kwitu waha. ⁴E pupua'amu, nu mu tuukwe gi ka te tookoo batsakwudu-ma suipana, umu ka te tookoo suu'mu batsakwu gi ka te moogooa. Soo te moogooa gi hownnekoo nabatsa-wa'ne'yoo. ⁵Pana nu mu tuukwe ka yise pumma mu sui-wa'ne'yoo, oosoo Te Naa. Soo Te Naa suu'mu ka te tookoo noko te moogooa kadoo mesoo ma'yugwe. ⁶Mu hootseba'a puu gi haa'no nanenaka pana soo Te Naa mu soopediyana mu mabetse'a. ⁷Soo Te Naa puu gi te watzekute, ka te tzopuhutooe tatzengana ka te wo-matu. Gi suipana, tamme mu hootseba'a oonakwasoo nadatze'nga.

⁸Mu ka mu numu tuukwena, ‘Soo Jesus E Pabe'e,’ nu saa'a ka E Naa tamme-koobatu, ‘Mu nugatu,’ mee tuukwedooa. ⁹Mu ka ‘Jesus E Pabe'e,’ mee mu unne-ma nasookwina, nu saa'a ka E Naa tamme-koobatu, ‘Mu gi nugatu,’ mee oo tuukwedoo'a. ¹⁰No'yoona numu yise ka Te Naa suda netamma oosoo nasoomu'wakwu, pana mu ka Te Naa Besa Pooha suda netamma oosoo gi nasoomu'wa-wa'ne'yoo.

¹¹Ka nakwutumuna ka nanehanena mu nanesootuhidu noko numu moohedu-kobena'yoona, gi ka mu unnekwuna suda soonammekupana. ¹²Soo Te Naa Besa Pooha ka mu unnekwuna mu tuukwekwu.”

¹³Sumu'yoo umu Te Pabe'e nakapunnedu-matu mee oo netammadooa, “U sakwa ka e pabe'e mee netamma oosoo ka ne naa hemma nu-no nowmoo.” ¹⁴Soo Te Pabe'e yise ka nana mee netamma, “Mu gi nuga nehanena.” ¹⁵Soo Te Pabe'e yise ka mu numu tuwow meeoo netamma, “Tamme sakwa gi moomoogoobupana. Tooe tamme how ewow hee-gapana oosoo gi numu magwetzo'i-wa'ne'yoo.”

¹⁶Soo Te Pabe'e yise mu numu mee natugwengakooa, “Soo ewow hee-ga'yoo nana tubewabe-gana ewow besa hemma suaku. ¹⁷Oosoo mee soonamme, ‘Ha'oo sakwa nu mane? Nagutza ewa'yoo soo e tumasuana, gi toge e tubane nobe-kwi no'yoona nahane-wa'ne'yoo. ¹⁸Nu sakwa umu e tubane nobe tzadyoometase papabowsoo matabue. ¹⁹O'no nu saa'a besa soonammekwu ka no'oko tumasuana oe hanese. Meeoo nu soonamme, nu ewa tubanese wuna'metoo mesoo meawunukwu. Nu gi hemma how yugwena sukwe tukana, hebena, besa soonammekwu.’ ²⁰Soo nana tu ya'eookwuna gi sopedakwadoo. O'no togano soo nana ya'ehoo. No'yoona oo tumasuape kumma'yooosoo nahaneku. ²¹Tamme ka yaa teepu-kooba'yoona ewow hee-ga'yoo ka oo-mahoo nasoonatzina ka Te Naa gi nakabetseana tamme matu'adyipunne.”

²²Soo Te Pabe'e umu tunakatzimodu meeoo netamma, “Gi suda oo sokwamakupana ka tukapu sumudooe tuugena, yise too ka pukwi mu namasooana. ²³Soo numu gwetzooina ka tukapu oonakwatu, ka pukwi numu namasooana oonakwatu tuwow. ²⁴Mu ka mu hootseba'a ponne,

umu puu tooe gi tumasua pana mesoo tuka, soo Te Naa mu mabetsea. Soo Te Naa puu mu hootseba'a oonakwasoo te soobedya. ²⁵Tamme gi hownnekoo tammesoo kwinga'atoo te momokwuna mada'e, tamme sakwa yise gi ka te tuka-witu suda soonammekupana. ²⁶Mu yise ka yoonnekoo tututsekoo gi soomadi how yise ka a pabana suda soonammekute.

²⁷Ka mu tonegeadu puu soo Te Naa mabetse'a ka umu puu gi tuusoogwi tatabu'a. Umu ka Jew numu-kooba katudu, Solomon mee naneadu unu nananenagadu oo nemasoo'apu oo oonakwa besa tatabu'a. ²⁸Soo Te Naa umuoo tonegea'adu puu besa matabue. Tooe umuoo yabesoo takwasugwuuse sapa, oosoo Te Naa yise oosoo ka pukwi te namasooana gi te namatuugekwuna ka oo nakabetseana. ²⁹Tamme sakwa yise gi suda sokwamapana ka te tukakwuna, ka te hebekwuna kadoo'ookoo. ³⁰Mooasoo soo Te Naa te pa'ankwatu oo sopedakwadoo, gi nawatzekudu. Umu gi tunaka'oedyukudu oonnekoo yaa'a teepu-koobatu ka tukapu, ka pukwi tu namasooana oosapa ookow oonakwa sooyugwe. ³¹Tamme sakwa yise ka Te Naa nakabetseanona oosoo gi hemma te namatuugekukwu. ³²Gi suda oo sokwamakapana, oosoo Te Naa besa te sootunaga'a. ³³No'oko mu hemma-ma tumuse mu tutuha manedu haneku, soo Te Naa te pa'ankwatu yise besakoo mu sootuhikwu. Soo Te Naa besasoo mu sootuhikwu, o'no ookow sakwa mu gi soomu'wapana. ³⁴Tooe hee tooe mu tusoodyahana o mu manepunnekwu.

³⁵Mu sakwa oosapa namamakwupunne ka yaa teepu-koobasoo e kodyu petukwuse. ³⁶Mu sakwa umu-wa'nesoo ka mu tuutooedu nehanedu petukwuse besa sokwama. ³⁷Ka togesoo mu tubonne oosoo kodyu petuse umu nasootuhikwu. Oosoo puusoo tukapu mu makakwu. ³⁸Ka tooesoo mu tubonne petuse tooe togabeno tooetoo tabua-tamme tunehanedu ka utuina besa sokwama. ³⁹⁻⁴⁰Nu gi nuka meeoo mu soobedyano'o mu-kooba o petukwu. Oonne'yoo mu sakwa yise namabetzapapunne." ⁴¹Soo Peter yise mee ka Te Pabe'e tubenga, "U haa'a no'oko numu netamma, pute numme tunakatzimodu suu'mu?" ⁴²Soo Te Pabe'e meeoo ka Peter nekwegea, "Soo nuga poena'ewabe netutzeana sakwa unu soonammena besa numu tummatzi. Umu yise ka nuka naka'oedyukudu mabetseana mu makakwu ka tukapu mu sookwa'e. ⁴³Nu ka kodyu petuse umu e poena'ewabe ka umu nuka naka'oedyukudu besa mu mabetse'a mu mayu petuse, nu mu sootuhikwu. ⁴⁴Nu besasoo mu sootuhikwu, no'oko hemma nemadabuekwu.

⁴⁵Sumuna soo numu nanesootuhi moohedu ka meeoo tusooyugwena, 'Gi soo Te Pabe'e yabesoo kodyu petukwu. Nu meno'o tooe how ka umu ooka naka'oedyukudu suu'mu suda matuguna ka ewa puusoo namakoo tusoohanena mesoo baaya'e.' ⁴⁶Nu yise ka kodyu petuse tooe hano tooe petukwu gi nuka meeoo mu soobedyano'o. O'no nu yise ka umu gi tunaka'oedyukudu-noko mu nanesootuhibu moohedu mu meeoo sooyugwe. ⁴⁷Soo numu gi nuka nakabetseadu tooe oo sopedakwadoopana ka pumme e tuukwe'e soo suda mu tumatuguna umu-matoosoo kodyukwu. ⁴⁸Soo numu gi oo nakasopedakwatoodu ka suta'yoona sagwane sapa nanekusekakwu.

⁴⁹⁻⁵⁰Nu meno'o gi oo nasoomanekute ka nu-tamme kemmadu, ka nabatsakwuse. Nu sukwa tooe yabe soo oo tatukwahoo mee'e nu sooname. O'no nu saa'a ka teepu nemadabuekwu. Meno'o sakwa moosoo oe manepetu mee nu soonamme. ⁵¹Mu sumuna mee sokwama meno'o ka Te Pabe'e petuse no'yoona numu nanapua'akwu. Pana gi oo manepunne. Umu gi tunaka'oedyukudu ka mu tunaka'oedyukudu tumoo'ookwu toetoo tu nananumu sapa. ⁵²⁻⁵³Esoo nana gi nuka heesoobedyadu sumuna pummesoo tooa, toetoo tu naa tumoo'ookwu. Soo mogo'ne gi nuka heesoobedyadu sumuna punno'o ka tu padu, tu pea, toetoo tu yahepeawabe tumoo'ookwu. Sumuna manege'yoo nananosoo nobe-ga'yoo nanatumuoo'ookwu, waha'yoo umu-matu pihoo tumoo'ookwu, toetoo pahe'yoo ka umu waahoo nu-matoo nananesootuhidu tumoo'ookwu."

⁵⁴Soo Te Pabe'e yise ka mu ewow numu mee netamma, "Mu puu oo sopedakwatoo ka tu powmakwuse soo taba egea-tammetu unu koomeapunnekwu. ⁵⁵Mu tuwazoo oo sopedakwatoo ka unu tu na'udutukwuse ka taba meanakwana hukwakwu. ⁵⁶Pana mu gi e naka'oedyukute ka suda tumatuguna. ⁵⁷Mu gi etzaga muusoo besa nanemadabue-wa'ne'yoo ka suda mu tumatugu-kwitu. Mu sakwa tuwazoo oo naka'oedyukuna mu sakwa kaaheno tumatugu.

⁵⁸Mu sakwa yise ka mumme nehanekwudu-kobenatoo nabikwuse, tamme sakwa oo pua'adoo togesoo meadabena. Tamme ka gi oo pua'agana, ka tunehanepe-wi petugase oosoo tamme-witu suda nemadabuekwu. Soo numu nehanedu yise ka mu tukwutumadu tamme wutuma tuungukwu. ⁵⁹Tamme yise nakwutumatumugukwu, ka tamme tu tunekwina tumanagase suu'mu mee nu mu tuukwe'e."

13 ¹Mu numu-matu ka Te Pabe'e meeoo tuukwe'e, "Mu numu-matu Galilee-wi'yoona kemmadu umu ka Jerusalem-witoo nanesootehimidu. Soo mu Roman numu moohedu Pilate mee naneadu mu numu goehoo." ²Soo Te Pabe'e yise ka mu numu mee netamma, "Mu ka sumuna mee sokwama umuoo numu Galilee-wi'yoona kemmadu tookwa ka mu Galilee numu oonakwa unu tuma'emukwadu ooonne'yoona soo suta'yoo umu-matoosoo kodyukwu. ³Pana gi, soo suta'yoo mu-matusoo kodyukwu ka gi mu nanekwuha. ⁴Mu sumuna meeoo sokwama, 'Umu numu nagoehoodu soo tukwutumadu nobe umu-koobato aanoohoo, umuoo tookwa hanobasoo suta'yoo numu ka mu Jerusalem-wi nonobe-gadu hanobasoo.' ⁵Pana gi, mu ka gi mu tuma'emukwana wahana mu-tammesoo kodyuse kadoo mu mayugwekwu."

⁶Soo Te Pabe'e yise mee mu tuukwe, "Sumu'yoo numu puu pogobesa tu tubewabe-wi masua. Saa'a meno'o soo pogobesa kwasu mee soonammena oetoo e petugayakwe pana gi pooedoo'a. ⁷Ka pumme tummatzidu yise mee netamma, 'Pahe tomokapu, gisoo pooedooana. Masoo pogobesa gi he-toogoo besa'yoo numu sukwe kapamooaka. U sakwa a tuhewekwuni.'

⁸Soo tummatzidu yise meeoo oo netamma, 'Nu a na'oonnakwitu hewese pookoo kwedana ma-kooba hanese sumu tomoba-wi a mabetseakwu.

⁹Yise ka sumu tomoba-wi a poe-dooase, oosoo besa'yookwu. Pana ka

sumu tomoba-wi gi a pooe-tooase, o'no saa'a nu a tuhewekwunikwu.' Yoonnekoosoo soo Te Naa ka mu Jew numu oetu tunenagakute, ka gi mu ma'emukwana mu waha, mu tuma'emukwana mu-matoosoo kodyukwu."

¹⁰ Sumu tu nananesootuha'e nasumu'u soo Te Pabe'e mu numu tunedyoedyakwe. ¹¹ Soo sumu'yoo mogo'ne wuna'me (18) tomopu manena tookoo tootzadyamedu. ¹² Soo Te Pabe'e ka mogo'ne tutuha manedu mee oo netamma, "Yaatoosoo kemmase nu u mabesakukwu." ¹³ Soo Te Pabe'e na'enakwa oo-ma matuoonahoosoo soo mogo'ne yise kaaheno nakwuma'ese mee unnetooe, "Soo Te Naa tubetse besa'yoo."

¹⁴ Soo nananesootuhibu nehanedu ka Te Pabe'e sutakuoo ka nananesootuhi tabebuno ka mogo'ne oo mabesakuhooose yise ka nehanedu-umu meeoo netamma, "Tamme Jew numu naapahe tabeno natzato'o, mu umuoo tabeba-wi mesoo nemabesakute. Pana ka te nananesootuhi tabeba-wi gi hee how nuukwu. O'no mu gi natzato'o-wa'ne'yoo."

¹⁵ Soo Te Pabe'e mee oo netamma, "U umesoo unnena takopadyakwe. Ka nananesootuhi tabeno mu puu ka mu pookoo tzadopayina oo bamagayakwe. ¹⁶ Soo mogo'ne ka u pookoo-wa'ne soo suta'yoo wuna'me a tuoe tzatobotoo, nu yise o tzadopase ka gwetzoibu-ma oo sootuhise esoo yise besa mane, u yise e toge'yookuhoo, ka maka e mabetsakuoosoo ka nananesootuhi tabeba-wi." ¹⁷ Soo Te Pabe'e nesootzemadu gi hownnekoo oo nekwegea pana ewa'yoo numu oo besa'yookute ka Te Pabe'e besa manina.

¹⁸ Soo Te Pabe'e mu numu natugwengasoo tuwazoo, "Nu mu tuukwekwu, ha'oo soo numu manekwu ka e naka'oedyukuna. Meno'o mu huutse'yoo nuka naka'oedyukudu pudusoo mu ewasoo manekwu. ¹⁹ Ka wuyupe sua-kwa'ne. Oosoo puu tuutsekoo a pooe-nakwana suake, oo soo tunadooakese, naakese, nana'emota ma'nadoo petugakwu. Ka suube-kwa'ne'yoo mu hootseba'a puu ka oo ma'na-ma mesoo aata'a. Oosoo mu manekwu ka e nananesootuhinona.

²⁰⁻²¹ Ka mogo'ne tukabadoo-kwa'ne. Oosoo puu ka tumayu'a ka hongobe noko mooe mayu'a. Soo tumayu'a saa'a noko ka oo tugoohanetoo mani, soo tukaba yise pa'atse'e posehoo. Yooosoo yise soo numu ka e naka'oedyukuna."

²² Soo Te Pabe'e yise ka Jerusalem-tamme meano no'oko mu numu nokadutoo tu meana nananesootuhibu numu tunedyoemena. ²³ Sumu'yoo numu ka Te Pabe'e meeoo oo tubenga, "Hutse'yooosoo numu haa'a namagwetzo?" Soo Te Pabe'e mee oo nanekwegea, ²⁴ "Huutse'yoo mu tubetse tu'oedyukudu suu'mu namagwetzoikwu ka 'yoo a manepunne mu sakwa unu o petukuno ka mu namagwetzoikwuna. ²⁵ Ewa'yoo numu meno'o gi e nakaheesoobedyadu nu yise yotsese ka natzakwuna'a mu-nakwi tzatumowkwu mu puuwana'yoona oo too'e wa'agekwu mee unnena, 'E Pabe'e e tutsakwonaku nu mi egeahookwu.' Nu yise meeoo unnekwu, nu gi u sopedakwatoosoo. U tookwa gi besa tumatugupu. ²⁶ Mu yise mee e netammakwu, 'U ne sopedakwadoo. Numme u-no ewa tukayakwe, u yise ne nobe-wi'yoona nananesootuhibu numu tunedyoedyakwe.'

²⁷Nu yise mee mu netammakwu, mu gi nu-notu ka suda mu manena manoyugwena, mu sakwa mea. Nu gi mu sopedakwadoo. ²⁸Mu Jew numu gi tunaka'oedyukudu mu nanatuganena sakwikwu umu ka te nanamooatupu no'oko Te Naa nanayadooawabe Te Naa-baakoo. ²⁹No'obatusoo numu Te Naa naka'oedyukudu ka eka teepu-koobatu ka Te Naa-baa petugakwu yise oosapa oo-no'yookwu. ³⁰Susumudu numu meno'o gi meeoo nanasoobedyadu mooe nasootuhidu, mu yise meeoo nanasoobedyadu numu-nagwi manekwu.”

³¹Susumudu numu ka mu nanesooutuhi-nagadu ka mu Pharisee mee nananeadu ka Te Pabe'e-baa petuse mee oo netamma, “U sakwa yaanona mea soo mu numu-kooba katudu Herod mee naneadu u nebatsayagate.” ³²Soo Te Pabe'e yise mee mu netamma, “Mu sakwa ookow etza'a mee tuukwe, ‘Gi haa'notoo nu yaanopunnekwu mu toegadu mabasakuna, mu magwetzoina, mu tsoapa nematzagakwunikwu ka E Naa nuka tunetammakupu nu mamakwuhoogena. ³³Pudusoo nu Jerusalem-witoosoo kodyukwu mu numu Jerusalem-witu suu'mu nono'otsa ka Te Naa yadooawabe goeyakwe, otoo nu numu-koobatoob nabatsekwi ka E Naa tunetamma nu mamakwuookwu.’

³⁴⁻³⁵Nu wuna'me mumme Jerusalem-witu tutuha soobedyu ka hootze tu dooamu ka tu kasa-tooha tuwatzetugu-kwa'ne. Pana mu gi oo mu namatuguna petzape. Mu no'oko umu Te Naa yadooawabe sukwe tagoehoo, tupe-ma. Pudusoo mu kadoo namayugwese mu nobe-kwitu, hee kadoo'yookwu. Saa'a ka mu-baasoo e petuse mu mee unnekwi, ‘Yow soo Te Pabe'e Te Naa pooha-toohakwi petu.’ ”

14 ¹Tu nanesooutuhi tabeba-wi mu Pharisee nanesooutuhidu moohedu ka Te Pabe'e tuka bi. Soo Te Pabe'e yise umu-no tuka, mu Pharisee oo e ya'epunne ka Te Pabe'e nesootzemakwuse.

²Sumu'yoo nana tookoo pawadu oo numu-no. ³Soo Te Pabe'e oo poonne ka umu Pharisee yoo Jew tumayohope sopedakwadoodu tubenga, ‘Ha'yoo soo mumme tumayohope? Besa'yoo, gi hownne'yoo haa'a ka nanesooutuhi tabeno soo numu namabasakuna?’”

⁴Pana umu gi oo nanekwegea. Soo Te Pabe'e yise ka tookoo pawadu nana tzamahoose oo mabasakuse oo nobe-kwitoo oo ta'ya. ⁵Ka mu Pharisee yise mee netamma, “Ka nanesooutuhi tabeno mu dooa tawagakwitoo wuehoose, toetoo mu kootsoo, ka gi hownnekoo oo tzeboo'e, mu puu oo tummatzikwu. Mu sakwa yise gi e nesootzemapana ka nana e tummatza'e.” ⁶Umu Pharisee gi hanotoosoo ha'yoo unne-wa'ne'yoo.

⁷Soo Te Pabe'e mu poonne ka susumudu mu numu nadukabidu besa nasooyugwena ka besow kadunoo-kwitu mooe ohomanakwe, oosoo yise mee mu netamma, ⁸“Tamme ka na'ewa tuka-kwitoo tamme tubise, tamme sakwa gi besa nasooyugwena besa-kwitoo mooe ohomanepana. Tamme ka besow kadunoo-kwi mooe kaduhoose sumuna saa'a tamme oonakwa besa'yoo oe petuhookwu. ⁹Soo numu oetoo te tuka bidu yise mee te netammakwu, ‘Yaa e besa pua'a petuhoo. U sakwa ookow kadunoo maka.’ Tamme yise sumuna gi besa oo nakwumakukwu ka oekoo tamme tu tayahoose.

¹⁰Ka tamme tubise, tamme sakwa gi ka hemma besa-kwitoo mooe ohomanepana. Soo numu te tuka bidu te manena poonnena sumuna mee te netammakwu, 'U e besa pua'a yaa ka besa kadunoo-kwi katuse ka e pupua'a-baa, umu-no tuka.' 'Oosoo besa'yoo numu,' mee umu numu oo manepunnedu, te sootubetseyina. ¹¹Tamme ka tammesoo besa nasooyugwena, saa'a namanasookwikudooa. Tamme ka gi besa nasooyugwena saa'a, 'Oosoo besa'yoo,' mee nanetammakwu."

¹²⁻¹⁴Soo Te Pabe'e yise ka nana pumme tuka bidu meeo netamma, "Tamme ka na'ewa tukana, tamme sakwa tutuha manedu, mu gi yutsungadu numu oetu bi tuungu. Umuoo gi hownnekoo ooonnekoo soo te tumakodyuku-wa'ne'yoo. Saa'a yise ka Te Naa te ya'e-wikoo tamme oo mayodase, te tumakodyuku-kwi tamme nasootuhikwu. Pana tamme ka tu pupua'amu te nananumu, yise ka besa manepunnedu te nanumu suu'mu tuka bise, umu saa'a punno'o te tuka bikwu, umuoo yise moosoo te tumakodyukukute. Saa'a soo Te Naa gi oonekwitoo te sootuhi-wa'ne'yoo."

¹⁵Sumu'yoo numu ka Te Pabe'e-no tukana meeo, "Mu numu ka Te Naa-no'yoona ewa besa nasootuhikwu mu ewa tukadu besa sokwamakwu." ¹⁶Soo Te Pabe'e ka Te Naa paba ewa tuka-kwitu yise ka nana natukwenguna, "Sumu'yoo numu tu pupua'amu makakwuse mee soonammena, ¹⁷ewa yongo saa tuungu, ewow tu pupua'amu oetoo bi. ¹⁸Pana mu oo pupua'amu mee oo sooyugwena sukwe nanemaweakooha sumu'yoo oo pua'a mee oo netamma, 'Nu ka tubewabe heetoo'ase, nu oo tasootzemahookwu.' ¹⁹Sumu'yoo punno'o meeo, 'Nu sumumano (10) kootsoo tumuhoose, nu umuoo poopoonnegakwu.' ²⁰Oosoo sumu'yoo punno'o meeo, 'Nu gi kemma-wa'ne meno'o manepunne, nu pudu nodukwadoohoose.' ²¹Soo oo tayana ka kodyu petuse, 'Umu gi kemmow-wa'ne meno'o manepunne,' meeo oo tuukwe. Soo nana suda oo nakwumaku ka ewa tukooma hane tuunguse tu pupua'amu gi kemma. Ka pumme tummatzidu yise mee netamma, 'Manatutoe mu numu nemasumudoodooa, tooe hownnekoo tooe, mu tutuha manedu, mu gi unu besa mamanemodu nokosoo gi tutubootabuedu, tooe hownnekoo tooe umu ewa tukoohane, umu nu-no tukakwu.' ²²Saa'a mu numu oo bi petuse mee oo netamma, 'Nu moosoo nuka u netamma-kwa'ne manese sapa, ewowsoo tamme soogwa'e. Gisoo u nobe kaa'no.' ²³Soo nana yise ka pumme tummatzidu tayasoo too meeo netamma, 'U sakwa manatutoe mu numu masumudoo, yise e nobe kaanohookwu. ²⁴Pana umu numu mooe'ugasoo e too'e bina umu gi nu-baatu yongo tuka-wa'ne'yoo.' "

²⁵Ewa'yoo numu ka Te Pabe'e-nakwi meadape. Soo Te Pabe'e yooihoose umu-tamme nakwumunase mee mu netamma, ²⁶"Mu nuka no'okosoo hemma-oonakwa unu soowabega. Mu sakwa ka mu naa, mu pea, mu nodukwa noko mu doodooamu, mu samoomu, muusoo sapa tuwow nuka mu-oonakwa unu soowabega, o'no mu ka E Naa besa podo meadabekwu.

²⁷Mu nu-koobatoosoo nasoomawunise tooe mu nabatsase sapa, o'no mu nu-no'yookwu. ²⁸Moee'ugasoo gisoo ka Te Naa besa podo meana, tamme

sakwa oetu soohane, tamme haa'a tooe oo mane-wa'ne'yoo? ²⁹Soo numu puu ka nobe-tookwuse ka gi oo nanenagakwuna mooe soohanena sukwe nobe-tookohase, ona manikese, tukwumehoe petugase yise oto oo matusookwuni. O'no yise mu numu oo-ma'yoona nanekoe. ³⁰'Ma how manedu masoo? Masoo sakwa uga mitu soohanese, o'no yise uga nobe-too.'

³¹Tamme sakwa nakobenatusoo soohanena ka na'akwebu moohedu-wa'ne, oosoo tu manikwuna puu mooe soohanese numu-no nagoekwu. ³²Oosoo ka mu tubetse ewow, ka gi mu matzooeku-wa'ne manepunnena, oosoo yise umu-no oetu nehanese mu tu pupua'amu-doose sumusoo nanano besa meadabekwu.

³³Mu ka nu-no'yookwuse mu no'oko mu hee-gana matusookwunikwu, o'no gi hee mu tsitugukwu.

³⁴Ongabe puu besa'yoo ka ongakamana. Ka gi ongakama manese, tamme gi hownnekoo oo madi-wa'ne'yoo. ³⁵Oosoo gi he-toogoo besa'yoo ka gi kamana, tamme oo totsakwatekwuna'e. Oosoo tamme ka Te Naa besa podo meadabena, ka te kammama kadoo manepetugase, Te Naa te totsakwatekwuna'e. Mu sakwa e nakapunne, o'no mu gi nasootuaganedooa."

15 ¹Ewa'yoo umu tumasumudoodu-no kumma'akoosoo numu tuma'emukwadu ka Te Pabe'e yadooadyakwe oo-baa petuse oo nakapunne. ²Umu Pharisee nanesootuhibu numu tunedyooedu mee naneyugwedu ka Te Pabe'e nesootzemana mee unakwe, "Oosoo Jesus ka mu tuma'emukwadu pupua'amu-ga'yoo umu-no tukayakwe."

³Soo Te Pabe'e yise meeo mu natugwengayakwe. ⁴"Tamme puu ka ewow seepu-gana sumuoo nawatsekuse ka mu ewow seepu ka giba-masoo ma'wukese ka sumuoo seepu nawatzekudu watehookakwu. ⁵Ka nawatzekudu seepu mayuse, tamme ka besa soonammena nobe-kwitoo oo tzanogakwu. ⁶Mee yise tamme ka te pupua'amu tuukwekwu, 'Mu sakwa nu-no besa sokwamapunne, nu ka seepu nawatzekuse oo mayusoo.' ⁷Ka umu Te Naa tutummatzidu mu toha kakasa-ga'yoo puu besa sokwamayakwe ka sumuoo numu tuma'emukwadu nanekwahayakwe, pana mu numu kaaheno meadu mee sukwe naneyugwedu mu toha kakasa-ga'yoo suda oo sokwamakute ka gi kaaheno mu nanekwaha.

⁸Soo mog'o'ne puu sumumano (10) ese tupe-ma namadabuedu hee-ga'yoo yise sumuoo watzekuse toogootabuakuse tu nobe-kwitu wutzoo'nekwu oo watena. ⁹Ka oo mayuse besa soonammena mee tu pupua'amu-noko tu nopua'amu tuukwe'e, 'Nu besa soonamme ka e tuwatzekuna mayuse.' ¹⁰Oosoo umu Te Naa tutummatzidu mu toha kakasa-ga'yoo besa sokwamakwu ka sumuoo tuma'emukwadu namayuse ka Te Naa besa podo meno'o meakwu."

¹¹Soo Te Pabe'e yise meeo natugwe'nga, "Sumu'yoo nana waahoo dooamu-ga'yoo. ¹²Soo oo penage ka tu naa meeo netamma, 'U sakwa ka hemma saa'a u ya'ese nuka u hanekukwuna meno'osoo e haneku.' Soo mu naa yise tu hemmatu oo haneku. ¹³Saa'a yise soo oo tooa ka pumme tu hee-maga-ma tumuse yise kwinga'a-too mea. Ewa nanasuda manena yabesoo ka pumme tu hemma-gana pumatu tu tumupu tzasoo'ow. ¹⁴Ka

saa'a ka tukapu unu natugeno'o, oosoo tsuayina ka tu hemma tzasooase gi hownnekoosoo ka tukapu tumu-wa'ne manepetu.

¹⁵Sumu'yoo nana oonow tabewa-ga'yoo hogu-ga'yoo oo nedya'we ka tu hogu oo maka tuunguna. ¹⁶Oosoo ka unu tsuayina ka 'Umu hogu namakana sakwa nu tuka,' mee soonamme ka gi hownnekoo ka nadukadu tamamayuna. ¹⁷Oowetu soohanese mee tusooyugwe, 'Meno'o nu tsuaya'ega'a. Pana umu e naa tummatzidu puu besa namakayakwe ewa natugapeniyakwe. ¹⁸Nu sakwa nobe-kwitoo kodyuse ka e naa mee netamma, "Nu tubetse suda u masoonammekute, ka Te Naa tuwazoo. ¹⁹U sakwa gi e natubangapana, nu ka suta'yoona, u sakwa e sukwe nedya'we." '

²⁰Oosoo yise nobe-kwitoo kodyuka gisoo pumme oo wupetuga'a soo oo naa ona o kemma o posopedakwudoose tutuha oo poosopedyase oo-matoo tanomanese, oo masootuhi petuga. ²¹Soo oo tooa yise meeoo oo netamma, 'Nu tubetse suda mu manuuma ka Te Naa tuwazoo. Mu sakwa gi e natubangapana, nu ka suta'yoona.' ²²Pana soo oo naa ka umu pumme tummatzidu mee netamma, 'Yabesoo ka e dooa besa namasooapu hanekuooke, ma'negea'a tuwow, moko pukwi oo namadabuekwuna oo hanekuooke. ²³Ka unu yoohoopu te tubatsakwuna kootsoo hanehoodoa oo batsahoose oo koomahanekooaha. Tamme ewa tukase besa sokwamakwu. ²⁴Oosoo ka yoo manepunnena nu ka e dooa watzekutu-kwa'ne mane ka oo petuse tooe nanasuda oo manenumme sapa, nu besa soonamme ka oo petuse. Umu yise ewa tukana too nuka.' ²⁵Saa'a soo oo pabe'e oona tubewabe-kwi'yoona kemmana, ka mu tunekwu'u mu nakana, ²⁶ka sumuoo umu tu naa tummatzidu-matu meeoo tubenga, 'How manena umu nugadu-kwa'ne nanaka?' ²⁷Soo tutummatzidu yise meeoo oo tuukwe, 'U wannga'a petuosesoo, u naa ka unu yoohoopu kootsoo oo batsaku. U naa ka oo-matoo besa soonamme ka oo petuhoosesoo.'

²⁸Soo oo pabe'e sutahoose gi ka nobe-kwi eka. Soo oo naa oo-matoo tseboekese oo too'e ba'e. ²⁹Pana oosoo ka tu naa meeoo netamma, 'Nu tubetse wuna'me oosapa u nakabetseanumme. Pana u gi hannano'o hemma e geadu. Gi moosooe sepu tooa'a sapa, ewa e pupua'amu-no e tukakwuna e batsakute. ³⁰Pana u tooa ka pumme u hemena ka mu sutakoo momoko'ne-matoo sukwe tzasoo'a, meno'o kodyu petuse u yise ka unu yoohoopu kootsoo oo batsakukwu.' ³¹Soo oo naa yise mee oo nanekwegeadooda, 'U e besaa tooa oosapa nu-baatu. No'yoona soo nuga hee umetu-kwa'nesoo manepunne. ³²Besa'yoo te ewa tukana ka besa ta sokwama. Yoo soo manepunne, soo u wannga'a uga nawatsekupu-kwa'ne manese, meno'o yise ka petuse tamme besa sokwama oo-matoo.'

Yooosoo soo Te Naa ka manatooe how tooe te manemose ka te kodyu petuse besa tamme-matoo soonammekwu."

16 ¹Soo Te Pabe'e yise ka umu pumme nakatzimodu mee natugwenga, "Sumu'yoo nana hee-ga'yoo kumma'akoosoo numu tu hemma mabetsea tuungu. Saa'a yise mee oo naka, gi besa oo hemma meakute.

²Oosoo yise nabaatoo oo bise mee oo netamma, 'U ka e hemma sukwe tzasoo'a mee nu u naka. Ka no'oko hemma e tumadabue tuunguna nu-matoosoo haneke, u gi hemma e mabetseakukwu yaa manakwana.' ³Soo oo mameakudu mee soonamme, 'Howga nu manekwu? Nu ka umu hemma how nuugwewununa gi mapu'ana gi mu numu e nedya'we-wa'ne'yoo. Nu mu numu hemma e natuunguna nasookwikute. ⁴Nu sakwa ka numu hemma sukwe hanekwu, o'no umu saa'a ka e nadayahoose e makadoo.'

⁵Oosoo yise no'oko mu numu ka pumme nedya'weduu nagutzikudu nabaatoo bi. Ka mooe'ugasootu mee tubenga, 'Haa'noko u ka e nedya'weduu nakutzikute?' ⁶Oosoo meeo oo nanekwege'a, 'Ewatsekoo yoo'hoo, nu oo nakutzikute.' Oosoo yise mee oo netamma, 'Yaasoo u tumadabuepu. U sakwa oo naamookwitusoo ma-ma botugu.' ⁷Ka sumuoo yise too meeo tubenga, 'U punno'o haa'noko oo nakutzikute?' Oosoo meeo oo nanekwegea, 'Ewatsekoo weeda nu oo nakutzikute.' Mee yise oo netamma, 'Yaa punno'o ume tumadabuena huutsekoo mi botugu.' ⁸Saa'a soo oo nedya'weduu yise ka tu hemma mameakudu manena naka, mee yise oo netamma, 'U tubetse unu soonamme. U ka nawitu poohina.' ⁹Ka yaa teepu-kooba'yoona mu gi tunaka'oedyukudu oosapa nawitu poohi ka umu tunaka'oedyukudu soonamme. Tamme sakwa punno'o nawitu soohane. Tamme sakwa ka yaa teepu-kooba'yoona te hee-matu numu hanekuna, besa mu matuguna ewa pupua'amu-ga. O'no ka saa'a tamme ka Te Naa-baa petugase, soo Te Naa te sootuhikwu ka besa te tumatugu-koobattoo.

¹⁰Tamme ka gi unu nanenagadu he-koobattoo esagoena, tamme ka unu nanenagadu he-koobattoo esagoekwu tuwazoo. ¹¹Yoo manepunne tamme ka yaa teepu-kooba'yoona ka gi te hemma kaaheno mabetseana, saa'a ka Te Naa-baa manepetugase tamme gi ka tubetse nasootuhipe nageakwu, tamme ka gi kaaheno mu tumatuguna mabetseana.

¹²Ka yaa teepu-kooba'yoona ka gi kaaheno hemma mabetseana saa'a ka Te Naa-baa petugase, tamme gi tammesoo hownnekoo nasootuhipe nageakwu. ¹³Tamme gi hownnekoo waahoo soowabega-wa'ne'yoo. Sumuna tamme sumuoo besa soobedyana besa oo nakabetseakwu. Tamme gi namekoosoo soogwi-wa'ne'yoo ka Te Naa noko ka hemma ewow te hee-gana."

¹⁴Mu Jew nanesootuhidu numu Pharisee mee nananeadu oosapa tu natumanakakuna soogwipunnedu. Umu yise ka Te Pabe'e unnepu nakase gi oo nakaheesoobedyana oo-ma'yoona sukwe naneko'e. ¹⁵Soo Te Pabe'e yise mee mu netamma, "Mu ka mu numu mee tuukweyakwe, 'Soo Te Naa besa ne sootuhise ewow ne heemaka numme ka besa'yoo numuna.' Pana soo Te Naa gi mu watzekupunne ka yow teepu-kooba'yoona besa namanekwuna. Ka mu numu yaa teepu-kooba'yoona besa mee mu nasooyugweduu, saa'a ka Te Naa-baa petugase, 'Gi hee,' mee oosoo mu netammadoo. ¹⁶Ka John gisoo petu-kwitoo tooe mu oosapa mu mooa tumayohope nageno'o. Pana meno'o numme ka Te Naa besa unnepu numu tunedyooena no'obatusoo numu tookwa etzaga eka mee soonamme.

¹⁷Pana soo Te Naa unnepu gi yise atasoo nuugwe-wa'ne'yoo, oosapa manepunne. ¹⁸Mu yise meeoo, 'Oosoo numu ka tu nodukwa poonnekwunise kumma'akoosoo mogo'ne nodukwadoose te tumayoho-kwi oosoo gi hownne'yoo,' pana ka Te Naa tamme poonne-kwi mu ma'emukwa. Yise ka napoonnekwunina mogo'ne nodukwadoose, mu too tuma'emukwasoo esoo togesoo Te Naa unnepu.'

¹⁹Mee yise soo Te Pabe'e mu natugwenga tuwazoo, "Soo ewow hee-ga'yoo nana oosapa unu nanenagadu namasooadu. Nonotsa tabeno besa tukayakwe. ²⁰Nonotsa tabeno oo nobe-kumaba soo tutuha manedu nana unu uayidu, Lazarus mee naneadu habeyakwe. ²¹Ka ewow hee-gakoo nana tugutsa'abu natuunguyakwe. Mu sadu'u yise punno'o oosapa oo ua-witu ekosebayakwe. ²²Saa'a yise soo Lazarus ya'e. Umu toha kakasa-ga'yoo Te Naa tutummatzidu ka oo moogooa Te Naa-baatoos bika. Oobeoo petuoogase ka besow te namooatupu Abraham mee naneadu-kumaba katuse oo-no tuka. Soo ewow hee-ga'yoo nana punno'o ya'ese nakoo. ²³Ka goso gi tookedu-wi petuga. Toogooatu poonnese nakwinga'atoo ka Abraham poonne ka Lazarus oo-baa katu. ²⁴Ka Abraham wa'agese meeoo netamma, 'E pua'a, u sakwa tutuha e soobedyase ka baa-wi Lazarus mamooogoo oo tsetzaka tuungu soo Lazarus sakwa ka e ego-koobatoos ooka oo pasaweku tuungu, esoo goso nuummabu e wumakute.' ²⁵Soo Abraham yise meeoo oo netamma, 'Uga tooe oo sooma'yuu ka togesoo ka teepu-kooba nummenummena, u uga oosapa ewow hee-gana, oo-ma nasoonatzina, meno'o yise oosoo gi u magwetzo'i gi hemma nesoobedyaa tooe ka Lazarus tutuha manenumme sapa u gi oo tummatza'e. Meno'o Lazarus yise besa hee-gana u yise nuummaba wuma. ²⁶Numme gi hownnekoo u tummatzi-wa'ne'yoo ka pabow tukapa ta naamookwi hape.'

²⁷⁻²⁸Soo uga ewow hee-ga'yoo nana yise ka Abraham mee oo netamma, 'U sakwa umu manegeoo (5) e wanga'amumatoos ka Lazarus taya, oosoo mu tuukwe ka e namanatzayina. O'no saa'a umu gi nu-kwa'nesoo manedooa.' ²⁹Soo Abraham yise meeoo oo netamma, 'Umu haa'a gi mu Te Naa yadooawabe tubona neadu?' ³⁰Oosoo yise ka Abraham meeoo netamma, 'Umu gi ka Te Naa nayadooawabe nakaheesoobedyadu pana mu ka Lazarus ya'epu oo sopedakwadoona ka pu-baasoo oo petugase, o'no umu oo oedyukukwu.' ³¹Soo Abraham yise meeoo oo netamma, 'Umu ka moosoo gi Te Naa unnepu naka'oedyukuna tooe umu numu ya'ekwikoo namayoda pu-baa petuga sapa, umu gi oo naka'oedyuku-wa'ne'yoo.'

17 ¹Soo Te Pabe'e yise pumme nakatzimodu mee netamma, "Oosapa ewa'yoo numu oonne'yoo, ka suta-kwitoo numu mesoo kwase nokayakwe. Soo suta'yoo umu-matoosoo kodyukwu.

²Umu ka sumuoo Te Naa tooa-matu kwase nokase, soo mu manena hanoba'yoonasoo umu-matoosoo kodyukwu.

³Tamme sakwa oosapa ka te pua'a besa matuguna mu tummatzi yise ka te pua'a tamme suda matugu tamme sakwa oo tuukwe. Oosoo ka suda tu manena nemakodyuse tamme sakwa oo soomu'wakwuni. ⁴Tooe

hano sapa oo matuadyigena yise ka ooka oo nemakodyukuyakwe tamme sakwa oosapa punno'o oo soomu'wano."

⁵Umu Te Pabe'e nakatzimodu oo-matu kemmase meeoo netamma, "Unusoo besa ne tu'oedyukukwuna ne sootuhi." ⁶Soo Te Pabe'e yise meeoo mu netamma, "Tooe tamme tuutse te pewu katzookwanatuma tu'oedyukuna, ka sunngabe ooweoo baa-witoo anoa tuunguse oosoo yise te tunetammatusoo manekwu. ⁷Gi sakwa tamme pabow oo neyugwena Te Naa unnepu mayohonona, moosoo tamme tu tunepohabekuna mayohodyina. Ka tummatzidu-kwa'ne oosoo puu ka puuwanatu mamakwuse nobe-kwi petu. ⁸Oosoo puu gi katuhoopetuse tukakoohakwu. Mooe'ugasoo oosoo ka pumme nedya'wedu tukakwuna mooe haneoose, ⁹yise saa'a ka pumme nedya'wedu tukamakwuse, o'no yise punno'o tukakwu. Oosoo gi ha'yoo oo sooyugwe, 'Nu ka moosoo oo tu tunepohabekuna mayohodyina.' ¹⁰Tamme ka Te Naa tunepohabekuna mayohodyina, gi sakwa tamme papaba oo sooyugwepana o te nagekwuna yaa manakwana."

¹¹Soo Te Pabe'e ka Jerusalem-witoo meana, ka umu Jew numu noko wakwawa'a numu tubewabe Samaria mee naneadu-kumi mea. ¹²Toge ka Samaria-wi oo egeakakwuse sumumano'yoo (10) nanana uagoedu oo wegeahoo. Umu gi oo tzage'e nuuyugwena, ¹³mee oo sukwe netamma, "U Ne Pabe'e Jesus, u sakwa ne sootuhi." ¹⁴Soo Te Pabe'e yise mee mu netamma, "Ka mu Jew numu nanesoottuhiwabe tzapoonneku mu moosoo namabesakuhoo." Ka tooesoo mu meaga'a mu ua besa manika. ¹⁵Sumu'yoo wawa'a nana suu'mu ka tu ua namabesakuse besa soonammese ka Te Pabe'e-matoosoo kodyuhoodoa mee unneno'o, "Soo Te Naa tubetse besa'yoo."

¹⁶⁻¹⁷Ka Te Pabe'e-kobena petugase mee oo netamma, "U besa e sootuhi ka e mabesakuse." Soo Te Pabe'e yise meeoo unakwe, "Nu sumumanoko (10) nanana mabesaku pana sumu'yoosoo umu-matu kodyutoo ka Te Naa besa pumme tumatugukupu waha. Umu sumu kadoopu (9) Jew nanana gi kodyu petu, umu sumuna oosapa meaga'a. ¹⁸Esoo sumu'yoosoo wawa'a nana yise kodyu petu yise mu uagoedu e nanumu gi e heesoobedya tooe pumme e mabesakuse sapa." ¹⁹Soo Te Pabe'e yise ka wawa'a meeoo netamma, "Tooe u wawa'a pana, u ka tunaka'oedyukuna namabesaku, meno'o yise u nobe-kwitoo mesoo kodyu."

²⁰Mu numu ka umu nananesootuhidu-nagatu Pharisee mee nananeadu ka Te Pabe'e mee tubenga, "Hannano'o soo Te Naa te nemadabuedoakwu?" Soo Te Pabe'e mee mu nanekwegea, "Gi tamme oo poonne-wa'ne'yoo ka tamme oo nemadabuekoohase. ²¹Numu gi meeoo unne-wa'ne'yoo, 'Meno'o soo Te Naa te nemadabue,' soo Te Naa ka moosoo tamme-nagakwitoo nemadabuena."

²²⁻²⁵Soo Te Pabe'e yise ka pumme nakatzimodu meeoo netamma, "Moee'ugasoo mu Jew numu meno'o yaa teepu-kooba gwetzoimodu, gi e naka'oedyukute. Umu e batsakwu. Saa'a mu sakwa e poonne mee tooe

sokwamapana mu gi e poonne-wa'ne'yoo. Mu susumudu mu nemoagakwu mee mu netammakwu, 'Soo Te Pabe'e moosoo watze petuse oonowsoo numme-baa.' Mu sakwa gi mu nakabetseapana. Nu tooe hano'yoono tooe mesoo napoonnekwu ka petuhoose tukwukwutzeba-kwa'ne. ²⁶Ka gisoo e petu mu numu gi e nakaheesoobedyadu tooe how tooe ma'na'wekwu. Ka o'nosoo tu mane-kwa'nesoo ka nana Noah mee naneadu togesoo ka yaa teepu-kooba gwetzoi nummenumme. ²⁷Umu puu gi oo nakaheesoobedyadu tooe pumme oo tooe tuukwe sapa tukana, hebena, tooe how tooe manakwe. Ka o'no tabeno ka Noah ka sake-wi tseboose, powma petuse soo teepu patatsopowse mu numu ka teepu-koobatu no'yoono batatuihoo. ²⁸Ka o'nosoo ka namanepu tuwow ka Lot togesoo eka teepu-kooba gwetzoinumme^e, mu numu puu tukana hebena, hemma tumuna, tumasuana, nobe-toodyakwe atasoo. ²⁹Pana ka Lot ka Sodom-wi'yoono namame'a soo goso pa'anakwana powmadu-kwa'ne sawewunuse no'oko mu kootuikuoo. ³⁰Oosoo mu meno'o numu ma'na'wekwu, ka saa'a e kodyu petuse. ³¹Mu puu ka nobe-kobena'yoono toetoo ona tubewabe-kwi'yoono, mu sakwa gi mu nobekwitoosoo kodyupana tooe ka mu hemma soomayupana. ³²Mu sakwa ka Lot nodukwa manepu soomayu. Oosoo puu ka namameahoose wesabetugase, ongabe mani. ³³Tamme ka tammesoo tooe namagwetzoina, tamme kadoo nuugwekwu, pana 'Ka gi hownne'yoo tooe nu ka Te Pabe'e-koobato nabatsase sapa,' mee unnena tamme namagwetzoikwu. ³⁴Ka yaa teepu-koobasoo e petuse sumuna waha'yoo numu kapa-wi utuikwabekwu, sumu'yoo tunaka'oedyukudu nu-no manegakwu sumu'yoo gi e nakaheesoobedyadu umu natzapenihookwu. ³⁵Sumuna waha'yoo momoko'ne oona'yoono toosoono, sumu'yoo tunaka'oedyukudu nu-no manekakwu sumu'yoo gi e nakaheesoobedyadu oosoo natzapenihookwu."

³⁶Sumu'yoo mu Te Pabe'e nakatzimodu-matu mee oo tubenga, "Hano'yoono oo namanekwu?" ³⁷Soo Te Pabe'e mee mu nanekwegea, "Tooe hano'yoo tooe mu kwe'na'a puu ka hemma nabatsa-kwi sumuhookwu. O oosoo puu oo sopedakwadoo tabu'a."

18 ¹Soo Te Pabe'e ka mu numu mee tunedyooe, "Tamme sakwa oosapa nanetzakwiyino gi oo nasoomukwapana tooe gi yabesoo tamme tu nekwegea sapa." Soo Te Pabe'e ka mu numu meeoo natugwe'nga, ²"Sumu'yoo suta'yoo nana gi ka Te Naa-wi tunaka'oedyukudu, gi numu tutuha soobedyadu, mu numu-nehanelu. ³Nonotsa tabeno sumu'yoo peawabe oo-baa petuyina mee oo netammayakwe, 'Oosoo e wohonedu suda e matugu. U sakwa e tummatzi.' ⁴Wuna'me soo numu-koobatu nehanelu gi oo nakabetsea pana saa'a mee soonamme, "Tooe nu gi ka Te Naa-wi tunaka'oedyukuna gi mu numu tutuha soobedyapana, nu sakwa ka peawabe tumayohoku. ⁵Ka nonotsa tabeno e tubenguna e nesagwa'e.'" ⁶Mee tuwazoo soo Te Pabe'e unakwe, "Soo suta'yoo nana numu-nehanelu ka peawabe oosapa pumme nanetsagwayi oo

tumayohoku. ⁷Soo Te Naa ka umu tu doodoamu nakasootuhikwu ka nonotsa tabeno mu nanetzakwiyo'no, ka nonotsa togano tuwazoo. ⁸Umu nagutza tubetse wuna'me tuutooe, soo Te Naa yabesoo mu nanekwegeahookwu. Pana ka yaa teepu-koobasoo e kodyu petuse, sumuna mu numu tu'oedyukudu kadoo'yookwu.”

⁹Susumudu numu puusoo besa nasooyugwena kukumma'akoosoo numu suta'yoo mee sooyugwe oonne'yoona soo Te Pabe'e mee mu natugwe'nga'a. ¹⁰“Waha'yoo numu-ga ka mu nanesootuhidu tune-hane-kwitoo memeakwate. Sumu'yoo ka mu nanesootuhidu Pharisee mee nananeadu-nagatu, sumu'yoo yise tuma'emukwadu.

¹¹⁻¹²Soo mu Pharisee-matu ka mu numu-wana wununa nanesootuhiwunu, ‘Ne Naa u tubetse besa'yoo. U nuka besa matabue gi ka numu-wa'nesoo. Nu oosapa nono'otsa awamooa nanesootuhina pooha tuwunikwu punno'o. Mu susumudu numu suda sukwe manena unu moomoogoobana unu nanidyapu. Soo o wunudu tuma'emukwadu puu oonne'yoo. Nu gi oo-wa'ne'yoo.’ ¹³Soo tuma'emukwadu nasookwina gi oetu poonnena sukwe nanesootuhikooa, ‘Nu tubetse ewa suda manakwe. U sakwa tutuha e soobedyana e tuma'emukwana soomu'wa.’ ¹⁴Ka mu nanesootuhimakwuse soo Te Naa mee unakwe, ‘Oosoo tuma'emukwadu besa manakwe ka tu tuma'emukwana nematzakwunina, nu yise oo sootuhikwu suda oo manepu soomu'wakwu. Soo Pharisee numu togesoo suta'yoo tu tuma'emukwana gi nematzagana, puusoo besa nasooyugwena.’ Tamme ka tammesoo besa nasooyugwena gi hee ka Te Naa-nakwana. Pana tamme ka tammesoo gi maawa'ne'yoo e mee nasooyugwena, o'no soo Te Naa te sootuhikwu.”

¹⁵Mu numu tu doodoamu tooe Te Pabe'e-baa bi petugonno umu mu nanesootuhiku tuunguna. Mu oo tunakatzimodu ka mu poonnena mu numu nesagwikute ka oo mu manegonno. ¹⁶⁻¹⁷Pana soo Te Pabe'e meeoo mu tu nakatzimodu netamma, “Gi mu numu mu dooamu hane petugonnodu nedagonnopana. Mu tututsekoo dooake nu sootuhikwu.” Soo Te Pabe'e yise meeoo unakwe, “Nu kaaheno mu tuukwekwu. Soo tuha'yoo ka ha'yoo oo tuukwe oo naka'oedyukukwu. Mu sakwa ka tuha'a-kwa'ne tunaka'oedyukuna mu ka Te Naa-baa petugakwu.”

¹⁸Sumu'yoo numu moohedu ka Te Pabe'e meeoo tubenga, “U tubetse besa'yoo nana. Ha'oo besa sakwa tuwow nu manese namagwetzo?” ¹⁹Soo Te Pabe'e yise meeoo oo nanekwegea, “U haa'a mee e netamma, ‘U besa'yoo,’ gi haga besa'yoo, Te Naa suu'mu besa'yoo. ²⁰U oo sopedakwato ka Te Naa tamme tuukwepu: gi numu batsapana, gi numu nowuakupana, gi tuduhapana, gi esayipana numu mane-witu, besa tu naa noko tu pea sooyugwena.” ²¹Soo nana yise meeoo oo netamma, “Mooasoo nu tuha'yoona meeoo na'unnedu nakabetseakena.” ²²Soo Te Pabe'e ka nana unnena nakase mee oo netamma, “U sakwa no'oko u hemma-tumuse ka u nahemena ka mu tutuha manedu hanekuse, o'no yise u ewow hee-gakwu ka Te Naa-baa'yoona. O'no u yise nuka nakatzinummekwu.”

²³Soo nana yise ka oo unnena nakase suda soonamme ka ewow hee-gana, tu hemma unu nenagana.

²⁴⁻²⁵ Soo Te Pabe'e oo poonnepunnena ka nana-witu meeoo netamma, "Oosoo ewow hee-ga'yoo tuheka-ma nasoonatzina gi puusoo namagwetzoiswa'ne'yoo." ²⁶ Mu oo tunakatzimodu ka Te Pabe'e nakase punno'o meeoo tutubenga, "Hownnekoo soo numu yise mesoo namagwetzo?" ²⁷ Soo Te Pabe'e meeoo unakwe, "Soo numu gi puusoo namagwetzoiswa'ne'yoo. Pana soo Te Naa suu'mu mu magwetzoikwu." ²⁸ Soo Peter yise meeoo oo netamma, "Mooasoo numme no'oko hemma puu ne heegana ma'wugese u-no maneke." ²⁹⁻³⁰ Soo Te Pabe'e yise mee mu netamma, "Tooe haga tooe, tu nobe ma'wukadu, tu nanumu noko hemma tu hee-gana tu doodoamu tu tubewabe, ka nuka nagen a ewowsoo besa no'obatusoo nasootuhikwu, meno'o manakwana. Mu nasootuhikwuna gi moobegwagakwu."

³¹⁻³² Soo Te Pabe'e ka Jerusalem-witoo umu tu nakatzimodu sukwesoo nesumudoose umu-no yadooana meeoo mu netamma, "Tamme ka Jerusalem-wi petugase, soo Te Naa yadooawabe o'nosoo nu-witu tubotugu oto nanemamakwu. Umu numu tutunehanedu nu-ma tzakadukwuse, ka mu tibo'o-matoo e tzamunase umu yise e batsakwu.

³³ Umu tibo'o yise e kobitoo toohegonno e wupagetana, yise e batsakwu. Pana nu yise saa'a pahe tabe mease tuusootabuedooa," mee.

³⁴ Pana mu oo nakatzimodu yise gi oo nakasopedakwatoosoo yise meeoo nana'unakwe, "Ha'yoo na'unnedu tamme gi nakasopedakwatoosoo?"

³⁵ Ka Jericho tzage'e ka Jesus manekena sumu'yoo gi tubootabuedu nana oonow po-kumaba katuna ka mu numu natummatzi tuunguyakwe. ³⁶ Esoo gi tubootabuedu nana ka mu ewow numu pukumi meadu meeoo tubenga, "Ha'oo haa'a namanewunu?" mee. ³⁷ Mu numu yise meeoo oo netamma, "Soo Jesus yaa kemma." ³⁸ Soo gi tubootabuedu yise meeoo ka Te Pabe'e netamma, "E Pabe'e e sootuhi." ³⁹ Ewa'yoo mu numu oo-na'oonnakwitu yise oo nedayakwe. "Gi unnepana," mee oo netammayakwe. Pana soo gi tubootabuedu yise pabasoo ka Te Pabe'e yadooadyakwe, "U E Pabe'e, u sakwa e sootuhi." ⁴⁰ Soo Te Pabe'e yise yoo'ipetu ka mu numu ka gi tubootabuedu tsaka tuungu. Soo Te Pabe'e ka pu-baa ka gi tubooetaboosedu natzaka petuse meeoo oo tubenga, ⁴¹ "Hownnekoo natummatzi u sookwina?" mee. Soo gi tubootabuedu yise meeoo oo netamma, "Nu gi tubootabuena yaatu soopoonne." ⁴² Soo Te Pabe'e yise meeoo ka gi tubootabuedu netamma, "Mow u ka besa tunaka'oedyukuna, meno'o yise u yaatu poonnekwu." ⁴³ Yabesoo yise soo gi tubootabuedu besa manise yaatu besa poonnena ka Te Pabe'e nakwi ka podo meadabekoo. Mu numu ka gi tubootabuedu nana namabesakuse oo poonnese yise ka Te Pabe'e nesookwugi.

19 ¹ Soo Te Pabe'e ka Jericho mee naneadu-too meana.

² Sumu'yoo nana besa manepunnedu Zacchaeus mee naneadu ka tumasumudoose nemadunagadu oonow. ³ Ka Te Pabe'e soopoonne pana gi oo poonne. Nagutza ewatseoo mu numu ka meetze'e oo wunu.

⁴ Ka sunngabe-ma tuboyahoo ka Te Pabe'e tu kumi meakwuse. ⁵ Soo Te Pabe'e ka sunngabe-toohakwi meana anguse ka Zacchaeus poonnese mee

oo netamma, “Yabeupu wueke nu u-baa'yookwu yaa tabeno.” ⁶ Zacchaeus besa soonammese wuekese ka Te Pabe'e tu nobe-kwitoo bika. ⁷ Mu numu ka Te Pabe'e nesootzemakoooha mee oo netamma, “Soo Jesus ka tuma'emukwadu-baa'yookwu.” ⁸ Soo Zacchaeus ka Te Pabe'e mee netamma, “Nu naamookwitu ka e hee-ga-matu mu tutuha manedu numu namadeakwu. Nu ka mu numu e tutuhana watsu oo-koobakwi nu oo makodyukudooa.”

⁹ Soo Te Pabe'e yise meeoo, “Yaa tabeno-manakwana u ka u dooamu-no namagwetzoikwu. Yaa tabeno u Te Naa tooa manekwu. ¹⁰ Nu yaa teepu-koobatoon nataya tuma'emukwadu magwetzoikwuse.”

¹¹ Mu numu ka Te Pabe'e nakapunnena, “Soo Te Pabe'e moasoo ka Jerusalem tzage'e oosoo ka o petugase soo Te Naa mu numu-kooba katuna mu moohekwudu ka Te Pabe'e mayugwekwu,” mee mu numu sokwamapunne. Soo Te Pabe'e mu sokwamana sopedakwadoo yise mee mu netamma, “O'no umu oo nakasopedakwadookwu gi meno'oosoo namanikwudu nu saa'a numu moohekwudu.”

¹²⁻¹³ Soo Te Pabe'e meeoo mu natugwe'nga, “Soo sumu'yoo nana ka numu-kooba katudu nanumu ka mu numu-kooba pumme tu neyugwese oosoo ka umu sumumano (10) pumme tummatzidu mee netamma, ‘Nu nanasusu'muhoo oa tupe mu hemegakwu. Mu saa'a mu ma'ewadoo. Nu kwinga'a meakwu ka no'oko tamme-kooba katudu-matoo oosoo mu-kooba katudu e nemayugwekwu. Nu yise nanemamakwutooase yise saa'a yowsoo kodyu petukwu, mu ka oa tupe ma'ewase saa'a nu-matoosoo oo makodyukudooa.’

¹⁴ Soo numu-kooba katudu yise mea susumudu mu numu otuoo ka nana gi petzabena sumuoo numu taya ka no'oko numu-kooba katudu-matoo mee oo tunetammakute, ‘Gi ookow nana ka numme-kooba katukwudu nemayugwepana, numme gi oo petzape.’ ¹⁵ Pana oosoo numu-kooba katudu naneyugwese yise punowsoo kodyukakwu. Ka petugase, ka umu pumme tummatzidu nabatoo bi. ‘Howgena umu e tuma'ewaku?’ mee soonammena. ¹⁶ Soo mooe'ugasoo oa tupe nageadu oo-baa petuse ¹⁷ mee oo netamma, ‘U sumuoo oa tupe e gea nu oo ma'ewase meno'o yise nu sumumano (10) u makodyukukwu.’ Soo numu-kooba katudu yise mee oo netamma, ‘U tubetse besa manepu-ga'yoo. U besa e tumatugukupu ka sumuooosoo ume e gease. Meno'o yise nu besa u sootunagakwu, nu sumumano (10) nanakumma'akoosoo numu-kooba u nemadabuekwu.’

¹⁸ Soo penakwatu oo-baa petuse, punno'o meeoo, ‘U sumuooosoo oa tupe e gease, nu yise punno'o oo ma'ewase meno'o mangeoo oa tupe nu u makodyukudooa.’ ¹⁹ Soo numu-kooba katudu meeoo oo netamma, ‘U punno'o besa manepu-ga'yoo u manegeoo nanakumma'akoosoo numu-kooba nemadabuekwu.’

²⁰ Kumma'yoosoo yise oo-baa petuhoose, mee oo netamma, ‘Yaa soo oa tupe nuka u geapu nu a makodyukukwusoo. Nu wanapu-naga a watzetugu. ²¹ Nu oo watzetugu ka u-ma suina, u nenadu'ya. U oosapa numu-makoo tusoogwipunnedu.’ ²²⁻²³ Soo numu-kooba katudu yise meeoo oo netamma, ‘Nu ka nenaduyana oosapa numu-makoo tusoogwipunnedu, u sakwa uga

ka ume e geana tooe how tooe sootunagase uga punno'o oo ma'ewa.' ²⁴ Soo numu-kooba katudu yise ka mu numu oo konnodu mee netamma, 'Ka oa tupe oo-makoo gwuuse ka nana sumumanoko (10) e makodyukudooadu saa'a gea.' ²⁵ Mu numu yise meeoo netamma, 'Mooasoo oosoo besa manepunne ewow oa tupe-ga'yoo. Ha'oo yise u oo-koobakwisoo oo tugeakwu?' ²⁶ Pana soo numu-kooba katudu mu nanekwegea, 'Soo numu ka pumme tu tugeana besa matuguna, oosoo ewasoo nageakwu. Soo numu yise ka gi toge tumatuguwunudu gi besa oo tzasooana umu-makoo nahanekwu. ²⁷ Meno'o yise ka umu nuka wohonedu ka numu-kooba e katukwu-kwi gi e petzabedu yaatoo masumudoose yaa e poonnena'yoo kadoo mu mayugwe.' "

²⁸ Soo Te Pabe'e ka meeoo unnemakwuse ka umu pumme nakatzimodu-no Jerusalem-kwitoo mea'a. ²⁹ Bethpage noko Bethany mee nananeadu-kumi meana ka po'woadu Olive mee naneadu tzage'e petuga. O'no yise soo Te Pabe'e waahoo pumme nakatzimodu-matu taya, meeoo mu netamma, ³⁰ "Ka Bethpage-witoo memeakwate. Onoko mu sumuoo tzagaze gisoo namadusoo'yookudu mayukwu, oo tsadopase nu-matoo oo wetzakake. ³¹ Ka numu mumme tubenga, 'How mannena mu oo tzadoopa?' mee mu nekwegea, 'Ne Pabe'e oo soogwa'e.' " ³² Mu waha'yoo naana yise memease pumme tu tuukwe-kwa'nesoo oo mayu petuga. ³³ Ka tzagaze mu tzadoopawunu, mu numu mu tubenga, "How manena mu a tzadoopa?" ³⁴ Umu yise mu nekwegea, "Soo Ne Pabe'e a nekwa'e." O'no mu numu yise gi hayoo mu netamma.

³⁵ Mu waha'yoo naana yise ka tzagaze ka Te Pabe'e-baatoo tzakakase, wega oo-kooba hanese, soo Te Pabe'e ka mu wega-kooba katuno'o.

³⁶ Ewa'yoo numu wega ka po-kooba wupatzeta. ³⁷ Oosoo yise ka tuupetukana ka po'woadu Olive petakwana mea mu Te Pabe'e nakatzimodu yise papaba apegeana oo nesookwuga'e ka oo manena poonnena.

³⁸ Umu papaba apegeana, "U yow, Ne Tubetse Pabe'e ne magwetzoidu." ³⁹ Ewa'yoo mu Pharisee-matu yise meeow ka Te Pabe'e netamma, "Mu ume nakatzimodu nesagwiku." ⁴⁰ Soo Te Pabe'e yise mu nekwegea, "Ka umuoo gi unakwe, kukumma'yoosoo e nesookwigikwu."

⁴¹ Ka Jerusalem mee naneadu tzage'e soo Te Pabe'e manegana ka Jerusalem poonnese mu numu tutuha soonammeguna mu yagakute ⁴² mee unakwe, "Tooe meno'o pana mu sakwa oo soopedakwadoo, ka mumme e soomagwetzoikwuse pana mu gi e nakaheesoobedya. ⁴³ Saa'a umu mu wokwohomu mu na'oonakwi mani petuse mu takone petukwu, mu gi hownnekoo oo namatzatsebooe-wa'ne'yoo. Umu paa'a teepu tapo'wogese ka mu tupe koodeadoo-koobakwi mu-baa tsonooahookwu.

⁴⁴ Umu mu numu kadoo'oo ma'ese mu nobe wunabetahookwu ka yow Jerusalem-witu. Gi sumu'yoo sapa natapo'wogedu tupe namayukwu. Sukwe puuwapudooahookwu. Soo Te Naa meno'osoo mu mabetseana mu magwetzoikwu mee tooe soonammepana mu gi ka Te Naa nakaheesoobedya."



Soo gi tubootubuedu nana nasootuhi (Luke 19.42)

45-46 Soo Te Pabe'e yise ka hemma-ma tumudu-matoo meahoo. Soo Te Pabe'e ka mu numu oe'yoona hemma-ma tumudu tayapebu'ahoo oosoo ka mu manena gi toge'yookuna. Ka mu tayana soo Te Pabe'e mee mu netamma, "Soo Te Naa ka umu o'nosoo tu yadooawabe ekow po tugupu, 'Soo e nobe pukwi'yoona no'obatusoo numu nanesootuhikwu.' Mu ka e nobe-kwi'yoo gi besa manakwe ka mi'yoona nanatuduhana."

47-48 Nonotsa tabeno soo Te Pabe'e mu numu tunedyoee ka nanesootuhipe-kwi'yoona. Mu Jew numu tutunehanebabe ka Te Pabe'e batsakwu mee unnena oo hoawi pana gi hownnekoo oo batsa-wa'ne'yoo ka mu numu ewa oo na'oonnakwi mamananpunne numu yise mu Jew numu tutunehanebabe tu'epunnena o'no umu gi hownnekoo how Te Pabe'e yugwe.

20 ¹Sumu ka Te Pabe'e mu numu tunedyoodyakwe ka Pabow Nanesootuhi Nobe-kobena'yoonu umu Jew numu tutunehanedu-nagatu oo-baa petuse, ²mee oo tubenga. "Haga meeoo u netammama u ka Pabow Nanesootuhi Nobe-kwi u tooe namabedakwabawunu?" Soo Te Pabe'e yise punno'o mee mu nanekwegea, "Nu punno'o ka John-witu mu tubengakwu. ³Mu ka e nanekwegease nu punno'o ka nuga pooha-witu mu tuukwekwu. ⁴Haga ka John meeoo netammama oosoo numu baa-wi matzaka soo Te Naa pute oosoo puusoo oo sukwe manakwe?" ⁵⁻⁶Umu yise puusoo mee nananetamma, "Tamme ka meeoo oo nanekwegease, 'Soo Te Naa ka John mu numu baa-wi matzaka tuungu,' meeoo oo netamma. Esoo meeoo te netammakwu, 'How yise mu ka John gi naka'oedyukute?' Tamme meeoo ka Jesus netammase, puusoo oo manakwe, mu ewow numu punno'o te kusedyakwu umu ka oo naka'oedyukuna soo John Te Naa yadooawabe."

⁷Umu yise mee ka Te Pabe'e nanekwegea, "Numme gi oo sopedakwatoo." ⁸Soo Te Pabe'e yise mee mu netamma, "Nu punno'o gi hemma mu tuukwe-wa'ne'yoo."

⁹Soo Te Pabe'e Jesus yise mu numu meeoo natugwenga, "Sumu'yoo nana tumasu'ana yise mu numu ooka mabetsea tuunguse, yise mea. ¹⁰Ka oo kwasuse, soo tumasuadu ka sumuoo tu tummatziwabe umu-matu taya. Oo naamookwitu a tupooe oo hane tuunguna. Mu numu yise ka pumatoos natayadu petugase oo wupagetahoose gi a tupooe-matu oo hanekupana oo tayakwunihoo. ¹¹Soo tumasuadu yise tuwazoo kumma'akoosoo pumme tummatzi oetusoo taya. Mu numu yise tubetse suda manena oo wupagetana punowsoo oo ta'ya gi hemma oo geapana. ¹²O'no yise soo tumasuadu ka kumma'akoosoo tuwazoo taya, ookow yise manayahoose punowsoo taya. ¹³Soo tumasuadu yise meeoo tusooyugwe, 'Howga yise nu manekwu? Nu ka e besaa tooa tayakwu. Umu sakwa sumuna ookow e besaa tooa naka'oedyuku.' ¹⁴Pana mu numu ka oo poonnese meeoo nana'unakwe, 'Yow esoo ka tumasuadu besaa doo. Tamme a batsowse, ka oo tubewabe manekwu,' mee unnena. ¹⁵Umu yise ka tumasuape-wikoo oo matzatzepoogese oo batsa.

¹⁶Soo tumusuadu ka oo nakahoose ka tu tooa'a nabatsahoose unu suta'a, oosoo yise mu tumahese mu goe. O'no yise oosoo tumasuape hee-ga'yoo kumma'akoosoo numu hane tuungukwu." Mu numu ka Te Pabe'e nakapunne oo unnena nakasopedakwadoose mee unne, "Suda hayoo." ¹⁷Soo Te Pabe'e yise mee mu netamma, "Ka o'nosoo Te Naa nayadooawabe mee'e nu-kwitu botugupu-ga'yoo,

'Mu tupe nobe-toodu puu ka sumuoo tupe moodyise. Soo mu tumoodyina tookwa gi pumme wuni-wa'ne'yoo o ka nobe madipunnedu.'

Nu yaahoo oosoo nanetammadu tupe Te Naa nobe madipunnedu.

¹⁸Nu yow tupe-kwa'ne'yoo. O'no mu gi nuka naka'oedyukudu kadoo namayugwekoo. Ka numu nanemadabuekwu-kwi oo manepetuse umu gi e nakaheesoobedyadu kadoo namayugwekwu."

¹⁹Mu Jew numu tutunehanedu ka Te Pabe'e umu pukwitu netammama nakasopedakwatoona oo wutumahookwu mee unnegonno pana mu ewahoo

Jew numu-ma sui. ²⁰Umu tutunehanedu-matu ka Te Pabe'e oo-matoo taya mu tutubenga tuunguna ka Te Pabe'e nehoawipunnena oo tunedyooepu-kwitu oo hooawipunne yise ka wakwawa'a numu moohedu-tamme oo tzamunahookwu. ²¹Umu oo-matoo natayadu yise mee oo netamma, "Numme kaaheno numu u tunedyooena sopedakwatoo. U oosapa Te Naa kaaheno unnepu numu tuukweno'o. U gi numu tuutzeadu, mu numu u-nakwana sumu'yoooso. ²²U ka mu wakwawa'a-tamme mu teepu-kooba natunekwiyi-kwitu ha'yoo sooyugwe'e?" ²³Soo Te Pabe'e ka pumme mu nanekwegekwi-kwitoo pumme mu hoawipunnena sopedakwadoona, mee mu netamma, ²⁴"Mu tumanagana e tzapoonneku." Umu yise sumuoo oo tzapoonnekute. "Haga namanagana ma-ma?" mee'e mu tubenga. Umu yise meeoo oo nanekwegea, "Ka mu Tibo-kooba katudu namanagana ma-ma." ²⁵Soo Te Pabe'e yise mee mu netamma, "Tamme sakwa mu Tibo'o numu pabe'e geasoo umuoo nanumu tumadabuena. Tamme puu Te Naa tumadabuena Te Naa yise te hee-ga'yoo." ²⁶Umu tutunehanedu-matu natayadu gi ha'yoo unni-kwa'ne'yoo ka ewow numu ka pumme nakapunne.

²⁷Mu Jew numu nananesootuhidu Sadducee mee nananeadu oo naka'oedyukute soo numu gi hownnekoosoo ka ya'eyina soo oo moogooa ka Te Naa-baatoo me'a, gi too gwetzoi-wa'ne'yoo mee oo sooyugwedu. Susumudu umu-matu ka Te Pabe'e-baa petuse nanatugwe'nga. ²⁸Mee yise umu oo netamma, "Ka o'nosoo soo Te Naa yadooawabe Moses mee naneadu mee tunetammapu, 'Soo nana ka ya'ese soo oo wannga'a sakwa ka oo nodukwa nodukwadoose ka tu Pabe'e dooamu-dookukwu.' ²⁹Umu natakwatsukwu'yoo (7) nanakwannga'amuwitu. Soo mu pabe'e nodukwadoose, gisoo dooamu-gana ya'e.

³⁰⁻³¹Umu oo wanga'amu nanasu'mu nanapenakwa ookowsoo nodukwadoose sapa punno'o gisoo oo-makoo dooamu-doona tuipetuga. ³²Saa'a soo mogo'ne punno'o ya'e. ³³U meeoo unnena, 'Soo numu tu ya'ekwikoo natzadyodase,' ka ume unne-kwa'ne mane haga yise umu-matu ka mogo'ne nodukwa-gakwu, umu ka no'yooona oo nodukwa-gapana?" ³⁴Soo Te Pabe'e yise mee mu netamma, "Mu numu meno'o ka yaa teepu-kooba mommodu oosapa nananodukwadooyikwu. ³⁵Soo numu ka tuiise namayodase gi nananodukwamu-gakwu, umu ka umu Te Naa tutummatziwabe, mu toha kakasa-ga-kwa'ne'yookwu.

³⁶Umuoo Te Naa besa dooamu ka oo tummatzidu mu toha kakasa-ga-kwa'ne'yoo umuoo oosapa gwetzoibu nasootuhipu. ³⁷Tubetse togesapa soo Te Naa numu tu tui-kwikoo mayodakwu soo Moses pana meeoo te netamma ka numu tu tui-kwikoo namayodase. O'nosoo soo Moses ka niwunudu sawabe-kobena wunupunnena soo Te Naa mee oo netamma,

'Nu yow mu Naa. Umu u nanamooatupu mee nananeadu Abraham, Isaac yise Jacob nu-matoo togesoo nanesootuhi.'

Mu Abraham, Isaac-no Jacob tookwa togesoo gwetzoimo'o umu ka Te Naa-matoo togesoo nanesootuhimona tooe o'nosoo tuipupana. ³⁸Soo Te Naa no'oko mu numu moogooa gi watzekute."

³⁹Susumudu mu nanesootuhibu numu tunedyooedu-matu o konnopunnena ka Te Pabe'e mee netamma, “U besakoo mu tuukwe'e.”

⁴⁰Umu yise gi hemmasoo oo tubenga-wa'ne mane.

⁴¹Soo Te Pabe'e yise mee mu netamma, “Umu nanesootuhibu numu tunedyooedu meeoo numu tunedyooe,” soo Te Pabe'e yise ka David-ma'yoona suaketu. Hownnekoo yise soo David ka Te Pabe'e natubangakwu?

⁴²Tooe soo David puusoo ka tu hoobeadoo-kwi mee tubotugupana, ‘Soo Te Naa ka Te Pabe'e mee netammapu, “U sakwa oosapa e tumadinakwa katu, ⁴³ka umu ume wohonedu e matzoekuno'otoo tooe.”’

⁴⁴Nu ka David kobenatusoo, soo Te Naa ka yaa teepu-koobattoo e taya. Nu ka David-ma'yoona kemmadu, ooone'yoona soo David, ‘E Pabe'e,’ natubanga,” mee'e soo Te Pabe'e.

⁴⁵Soo Te Pabe'e ka umu pumme nakatizmodu mee mu netammadyakwe ewa'yoo mu numu oo nakapunne, ⁴⁶“Mu sakwa gi mu Jew numu nanesootuhibu numu tunedyooedu-kwa'ne manepana. Umu puu besa-kwi tu namasooa-ma nasootza'mepunne numu pumme besa neyugwena petukudu. Umuoo ka tu na'ewa tuka numu-koobatu naneyugwena soobedyadu punno'o, o'no mu numu besa mu sooyugwekwu mee'e nasooyugwedu. ⁴⁷Nanesootuha'e mee naneyugwe pana ka mu pepeawabe nobe umu-makoo tuduha tuwazoo. Umuoo tuma'emukwana umu-matoosoo kodyukwu ka suda mu tumatugu-kwi.”

21 ¹Soo Te Pabe'e ka umu ewow unu nanenagadu hee-gakoo numu tubebuamena mu poonnepunne. ²Sumu'yoo tutuha manedu peawabe tu penebetu oe tuoonahoo. ³Soo Te Pabe'e yise ka pumme nakatzimodu meeoo netamma, “Yow esoo besow mogo'ne. Esoo tu penebetu oe tuoo'na. ⁴Yise mu naana gi ewa oe tuoonana, ka a namasumutoo-kwi tooe ewa hee-gapana. Esoo mogo'ne tu penebetu oe tuoo'na. Gi haa'nokoo oe tuoo'na,” mee soo Te Pabe'e.

⁵Susumudu mu Te Pabe'e nakatzimodu yise ka nanesootuhi nobe-kwitu, ka mu nanenagadu besow tupe namadabuena oo poonnena oo nesookwuga'e. Soo Te Pabe'e yise meeoo mu netamma, ⁶“Esoo yow meno'o mu poonnena esoo besa tabuadu yaanona nobe te wokwohomu saa'a no'oko a wudyoomedakwunidooa.” ⁷Mu Te Pabe'e nakatzimodu yise meeoo oo tubenga, “Hannano yise oo mani petukwu how saa'a numme oo sopedakwadoo tabuakwu?” ⁸Soo Te Pabe'e yise meeoo mu nanekwegea, “Gi kumma'akoosoo numu mumme nemooaga oo naka'oedyukupana. Ewa'yooosoo numu mee mu netammakwu, ‘Nu yow mu Pabe'e,’ mee mu nemooagana gi umu-ma naka'emukwapana. ⁹Mu tuwazoo ka tu nana'akwe-kwitu nakakwu, tooetoo nana'akwekwu pana gi oo-ma nakasuipana. Tooe yoo sumuna mooe namanekekwi sapa pana gisoo soo yaatu teepu atasoo e yugwekwuna oe manakwe. ¹⁰Tooe hanotu tooe saa'a soo te teepu suyugadoo. Ewa-baatu numu

kukumma'yoosoo nanagoena, ¹¹ tukapu natugena natseagoena soo teepu yise yutsungayikwu. Tooe hemma tooe mu komeba-nagakoo poonnekwu.”

¹² Soo Te Pabe'e yise meeo tuwazoo mu netamma, “Gisoo hemma 'yoo manakwe umu gi nananesootuhidu gi mu petzabena mu-ma tzakaduse mu wupagetana mu wutumetakwu. O'no yise mu numu-kooba katudukobena'yoona mu nanehankwu nu-koobato. ¹³ O'no sakwa yise mu nukwitu mu tuukwe. ¹⁴ Ka pumme mu nehankwuse nakwutumase saa'a mu unnekwu-kwitu gi sohanepana. ¹⁵ Nu saa'a ka mu nanehane nuusoo mu unnekwuna mu nemadabuekudooa, o'no saa'a soo mumme tumoo'oodu gi hanotu ha'yoo unnetooa.

¹⁶⁻¹⁹ Ewa'yoo mu numu gi e petzabedooa u nananumudooe suda u matugudooa yise mu goedooa saa'a. Tooe umu gi e soo'oedyukudu gi mumme numu petzabekwuse sapa, mu e naka'oedyukudu gi e ma'wukadu, nu mu magwetzoikwu.

²⁰ Mu ka te wokwohomu ka Jerusalem-na'oonnakwi manise mu poonnena mu oo sopedakwadookwu, pudusoo mu wokwohomu ka Jerusalem kadoo'oo ma'ekwuse. ²¹ Mu numu Jerusalem-witu sakwa ka giba-matoo namamea'a umu oo tzaage-kwitu sakwa punno'o mu-nosoo, gi sakwa haga Jerusalem-witoo namameapana. ²² Soo Te Naa ka o'nosoo ka mumme too'e nemanana'wipu mu-matu gi oo nakahoyase meno'o yise mu-koobadoe. ²³ Mu momoko'ne kokoheadu yise mu nunupetzekudu tutuha namanatzayakwe ka numu tuyagoese. ²⁴ Susumudu numu nagoehookwu, susumudu punno'o ona tooe hano tooe kwinga'atoo nawetzakakwunihookwu. Tubetse wuna'metoo mu wakwawa'a ka Jerusalem-wi nonobe-gakwu. Saa'a ka Te Naa tunetamma namamakwuse, soo Te Naa ka mu Jew numu punowsoo Jerusalem-witoo nemakodyukukwu.

²⁵ Togesapa soo Te Naa ka yaatu tamme-koobatu atasoo yugwekwu. Ka tubetse baa unu bayutsungadyakwe mu numu oo-ma nakasui.

²⁶ Mu numu tubetse suikwu ka gi oo sopedakwadoona ka hemma yoo manakwe. ²⁷⁻²⁸ Mu e naka'oedyukudu saa'a gi nasootookepana ka yoo hemma manekwu, nu mu magwetzoikwu. Ka yaa teepu-koobato mu numu e poonnekwu ka e pooha patakwetseana tubongo ka koommeba naga-kwi e wuegena.”

²⁹⁻³⁰ Soo Te Pabe'e yise ka umu pumme nakatzimodu mee netamma, “Ka sunngabe pooedooageese mu puu oo sopedakwadoo ka pudusoo tatza manepetukwu. ³¹ Oonekoosoo mu ka yoo hemma suda manegenaa poonnekwu, mu oo soo'oedyukukwu pudusoo kodyu petukwuna. ³² Mu numu meno'o yaa teepu-koobatu gisoo tuina ka Jerusalem kadoo nuugwekwuna poonnekwu. ³³ Esoo nuga unnepu besa na'unnedu gi hee atasoo a yugwe-wa'ne'yoo. ³⁴⁻³⁵ Mu gi tunaka'oedyukudu yaa teepu-koobatu gi ka e kodyu petukwuna sooma'yu. Ka tu manegonna suu'mu sooma'yuna suda oo sokwamakute

ka tooe how tooe manena. Nu gi nuka mu soogwino'o umu-baa petukwu. Mu sakwa nuka naka'oedyukudu gi hemma tu hee-gakwitu soohanekupana, gi suda oo sokwamakupana. Mu moosoo namamakwupunne. ³⁶Tamme sakwa yise Te Naa-matoo nanesootuhi oosoo ka suda ka mu gi naka'oedyukudu-tamme kemmadu-makoo te magwetzoikwu. O'no yise e petuse mu e dooamu nasootuhikwu.” ³⁷Soo Te Pabe'e ka tuutsekoo po'woadu Olive mee naneaduma tooa'e. Nonotsa tabeno ka nanesootuhi nobe-kumabattoo meayina ka mu numu Te Naa besa unnepu tunedyoobodotu. ³⁸Nonotsa awamooa mu numu awamooasoo sumuhooyakwe ka oo nakabodona.

22 ¹Mooa dyongona oetu, o'nosoo te manena te natzamawukwuna soomayuna, yise ewa tuka, Gi Namayuadu Tukaba tukakwu.

²Mu Jew numu tutunehanedu ka Te Pabe'e watze batsakwu mee'e sokwama pana ka mu numu-ma suipunne. ³Ka sumuoo Te Pabe'e nakatzimodu-matu, Judas mee naneadu soo suta'yoo ookow ma'emukwa.

⁴Soo suta'yoo ka mu tutunehanedu-matoo ka Judas taya mu tuukwe tuunguna oosoo mu tzapoonnekukwu ka Te Pabe'e pukwi'yoona, o'no mu oo watze tzakadukwu. ⁵Mu Jew numu tutunehanedu besa sokwamana, “Numme u tumanagakukwu,” mee'e ka Judas netamma.

⁶Soo Judas, “Nu ka Te Pabe'e-matoo mu bikakwu, gi numu poonnena,” mee tusooyugwe.

⁷Yaa tabenoo numme ka seepu tooa'a batsakwu, ka gi namayuadu tukaba noko ne ewa tuka-kwi manepetu. ⁸Soo Te Pabe'e yise ka Peter noko John meeoo netamma, “Mu sakwa mooe memeakwatese ka te nanesootuhi yongo tukakwuna mabetsabega.” ⁹Umu yise meeoo tubenga, “Hano'yoo yise numme tugoomahanegakwu?”

¹⁰Soo Te Pabe'e yise mee mu nanekwegea, “Ka Jerusalem-wi mu pepetugase mu sumuoo nana bano'osa tu tsoabu-kooba tokwuhudu wegeakwu. Mu saa'a ookow nagekadoo. Ka nobe-kwi oo egeakase oo-nosoo saa'a tzoonoohoo kwatese ¹¹ka nana oo nobe-gakoo mee saa'a netamma, ‘Soo Te Pabe'e umu pumme nakatzimodu-no yaa u-baa'yoona nanesootuhi yongo tukakwu.’ ¹²Esoo nana nobe-ga'yoo yise mu tzapoonnekukwu ka pa'atu nobe-kwi'yoona ka tukapu mu yongo tukakwuna mu saadoo.”

¹³Umu yise mooe memeow tu tukakwuna mahaneookwuse.

¹⁴Ka tu yongose, soo Te Pabe'e ka umu nakatzimodu-no tukana ¹⁵mee mu netamma, “Nu tubetse unu mu-no e nanesootuhi yongo tukakwuna petzape gisoo nabatzana. ¹⁶Esoo te nanesootuhi yongo tukana ka numu-koobatu e nabatsakwuna oo wahadu ka seepu dooa nabatsa-kwa'ne. Yow nakwitu umu nanesootuhi tukakwuna e nabatsana-kobena.”

¹⁷Soo Te Pabe'e yise ka tseda gwuu'hoose atsa baa oekoo oo-koobattoo nanesootuhihoose umu pumme nakatzimodu mee netamma, “No'yoona sakwa mu ma-matu hebe. ¹⁸Nu mu tuukwe'e nu ekow atsa baa ka

yaa teepu-koobatu tubetse gi hebekwusoo, saa'a Te Naa ka te teepu mapudutupudoose o'no yise nu tubetse pudutupusoo hebekwu.”

¹⁹Soo Te Pabe'e ka tukaba gwuu'hoose ka Te Naa-matoo nanesootuhihoose oo tزابokase yise mee mu netamma, “Yoonnekoo soo e tookoo mu-koobatoo natزابokakwu eka tukaba-wa'ne. E soomayu saa'a ka a tukana.” ²⁰Ka mu tukamakwuse oosoo ka tseda-witu yukwe soo Te Pabe'e meeoo unnena, “Nu sakwa mu-koobatoo nabatsa. Soo atsa baa e puupe-wa'ne'yooosoo.

²¹Soo sumu'yoo numu ka umu nuka batsakwadu-tamme e tzaamahookwudu tamme-baa tuka. ²²Mooasoo soo Te Naa meeoo tunetamma, nu oonnekoo nabatsakwu. Pana saa'a oosoo umu wohomu nu-matoo bikepu tuma'emukwana oo-matooosoo kodyukwu.” ²³Umu oo nakatzimodu yise mee nanatubenga, “Hanotugina tamme-matu yoo manekwu?”

²⁴Umu Te Pabe'e nakatzimodu puusoo nanano nananepetukute. “Ka puusoo nana su'summe ka Te Pabe'e nakwasoo manepunnekwu,” mee'e nanatusooyugwena. ²⁵⁻²⁷Soo Te Pabe'e ka mu nakana yise mee mu netamma, “Gi mu wakwawa'a numu-kooba katudu-kwa'ne, paba nasooyugwepana. Soo sumu'yoo mu-nagatu mooe natatsungadu sakwa mu tummatzi. Gi paba nananeyugwepana mu numu tummatzi, tooe nu mu Pabe'e pana nu oosapa mu-kwitu poohigena. Mu sakwa e manena tuusoodyahana nu-kwa'nesoo. Soo sumu'yoo mu-nagatu mu mooe tatsungadu sakwa mu tummatzi. Mu ka numu tummatzidu gi heesoobedya. Pana nu mu Pabe'e, yise mu tummatza'e, mu sakwa nanatummatzi punno'o.

²⁸⁻³⁰Mu nu-no tukakwu ka saa'a Te Naa-baa mu petukase. Mu yise nu-nosoo ka mu Jew numu nemadabuekwu mu ka oosapa e naka'oedyukuna tooe mu numu nuka wohone sapa.

³¹E besa pua'a Simon Peter, soo suta'yoo mu tapokakwu te manena gi petzabena. ³²Pana nu u nanesootuhikute u sakwa gi e naka'oedyukumakwupana. Ka u unnekwuna saa'a nemakodyuse u sakwa umu ta pupua'amu besa mu nanesootuhi meakwuna mu nemayugwekwu.” ³³Soo Simon Peter yise mee ka Te Pabe'e netamma, “Nu oosapa u-no'yookwu tooe taka mu wutuma toetoo taka mu goekwuse sapa.” ³⁴Soo Te Pabe'e yise ka Simon Peter meeoo netamma, “Awamooasoo gisoo ka tsekuna kwu'a yaka, u saa'a pahe mu numu mee netammapunnedoo, ‘Nu maka Jesus gi sopedakwatoow.’”

³⁵Soo Te Pabe'e yise ka umu pumme nakatzimodu meeoo tubenga, “Nu ka o'nosoo ka besa e unnepu mu numu mu tuukwe tuunguna ka mu tayase tooe gi mu hee-gakoo sapa, gi tuwow mu mago'o-gana, gi tuwazoo kumma'akoosoo mu moko-ga'yoo sapa. Mu puu uga hemma tuuke haa'a?” Umu mee oo nanekwegea, “Numme u unne-kwa'nesoo gi hemma tuuke.” ³⁶Soo Te Pabe'e yise meeoo mu netamma, “Ka yaa manakwana ka mease ka mu hemma mago'o noko hanega ka ooone-gana. Mu ka gi segesa-gana ka mu wegabedo tutsanabedu. ³⁷Soo nu-kwitu nanemamakwudu nabotugudu oo-toogoo manipetukwu. Mee oosoo na'unakwe, ‘Nu ka mu nanasuda tumatugudu-kwa'nesoo namatugukwu.’”

³⁸Umu oo nakatzimodu mee oo netamma, “Mooasoo numme waahoo segesa-ga'yoo.” “Gi nu mownneko segesa netamma,” mee'e soo Te Pabe'e mu netamma.

³⁹Soo Te Pabe'e yise ka umu pumme nakatzimodu-no ka nobe-kwi'yoona mea'ase ka po'woadu Olive mee naneadu-matoo petuga, oosoo ka uga oosapa maneyina. ⁴⁰Soo Te Pabe'e yise mee mu netamma, “Mu sakwa nanesootuhi. O'no mu ka sutakoo mumme nemooaka mu gi oo-ma nakatzabedooa.”

⁴¹Soo Te Pabe'e yise gi haa'no umu kwinga'atoo mease meatzedose mee nanesootuha'e, ⁴²“E Naa, soo tubetse suda nuka tu yugwekwuna nu-tamme kemmana nu gi oo nasoomanekena. Ka ume nuka tunetammapu nu oo mayohokwu.” ⁴³O'no yise sumu'yoo soo Te Naa tummatziwabe soo toha kasa-ga'yoo oo-baa tabua petuse ka Te Pabe'e besakoosoo sootuhidooa. ⁴⁴Togesoo ka pumme tu yugwekwuna oo soonammetugupunne soo oo nanekoonana ka teepu-koobato puupe pasawedu-kwa'ne manewunu.

⁴⁵Soo Te Pabe'e ka nanesootuhimakwuse yotsese ka umu pumme nakatzimodu-baa petuhooga ka suda sokwamana mu utua'e mu mayu petuse, ⁴⁶mee mu netamma, “Mu sakwa gi utu'ipana. Yosuhoose nanesootuhigonno, o'no mu ka Sutakoo mumme nemooaga mu gi oo-ma nakatzabe-wa'ne'yoo.”

⁴⁷Ka Te Pabe'e togesoo yadooawunu soo nana Judas mee naneadu mu tukwutumadu-no ewow numu oo-baa moohe petu. Oosoo ka Te Pabe'e-baa petuse oo mitzadya'me. O'no umu oo sopedakwatoohoo. ⁴⁸Pana soo Te Pabe'e yise meeoo o netamma, “Judas how u suda e matugukwuse sapa e mitzadya'me?” ⁴⁹Mu Te Pabe'e-no tunakatzimodu ka tukwutumadu poonnese meeoo ka Te Pabe'e tubenga, “Tamme haa'a umu-no nagoekwu?” ⁵⁰Sumu'yoo mu Te Pabe'e nakatzimodu yise sumuoo mu Jew pabe'e tummatziwabe naka tseka'akwunihoo. ⁵¹Soo Te Pabe'e yise meeoo oo netamma, “Mow sapa.” Ka meeoo oo netammase ka nana naka pukwikoo oo nakwuga'ahoo-kooba matuguse soo oo naka besa mani. ⁵²Soo Te Pabe'e yise ka mu Jew pabe'e tukwutumadu meeoo netamma, “Nu gi suda tumatugudu, gi naduyadu, gi tuduhadu tuwazoo. Gi sakwa mu koodoo'oo-ma e tumahepana, wobe-ma, tsegese-ma tuwazoo.

⁵³Tooe mu ka e nanesootuhi nobe-kwikoo sapa gi nu-ma tzakadupu-ga'yoo. Muusoo too'e. Mooasoo soo tubepe ebeoo nabotuku o'nosoo Te Naa tamme tuukwe-kwa'nesoo.

⁵⁴Mu tukwutumadu yise ka Te Pabe'e-ma tzakaduse oo bika ka mu Jew-numu tutunehanedu naa-matoo. Soo Peter kwinga'a mu-nakwi meadabe. ⁵⁵Ka mu numu yise ka tuneane nobe-kobenakoo pedahoose soo Peter yise ka mu numu-naga katu. ⁵⁶Sumu'yoo tseadumu yise ka Peter poonnese ka oo tsetsoogase yise meeoo unakwe, “Esoo nana ka Jesus-matu.” ⁵⁷Pana soo Peter yise meeoo unakwe, “Nu gi ma-notu.”

⁵⁸Ka mu numu togesoo aata'a, kumma'yoosoo numu ka Peter poonnese punno'o meeosoo, “U punno'o umu-notu.” Pana soo Peter yise meeoo ka nana netamma, “Nu gi.”

⁵⁹Togesoo mu tuutooe kumma'yoosoo numu punno'o ka Peter meeoo netamma. "U tubetse yow ka Jesus nakatzimodu-matu. U Galilee-witu." ⁶⁰Soo Peter meeoo mu netamma, "Nu gi mu numu nemooaga, nu gi umu-notu." Togesoo ka Peter ookow nemayuyakwe soo tsekana kwu'a yagakooha. ⁶¹Soo Te Pabe'e yise ka Peter poonnega'a. Soo Peter yise oo soomayuhoo ka Te Pabe'e pumme netammapu. "Gisoo ka tsekana yaka pahe tooe u gi e nanenama'yoodooa." ⁶²Soo Peter pumme unnepu soomayuse yagakooha.

⁶³Mu tutukwutumadu ka Te Pabe'e nasootzamekuna oo poee wutumase yise oo wupageta. ⁶⁴Yise meeoo oo tubenga, "U too'e no'okosoo gi hemma watzekudu, haga meno'o u wupageta?" ⁶⁵Mu ewa'yoo tutukwutumadu ha'yoo tooe oo netamma oo-ma'yoona naneko'e. ⁶⁶Ka tu tabuakese mu tutukwutumadu ka Te Pabe'e mu tunehanedu-koobenatoo hane petuga yise mu tutunehanedu meeoo oo tubenga. ⁶⁷⁻⁶⁸"U haa'a yow soo nanetammadu Ne Pabe'e?" Soo Te Pabe'e mu nanekwegea, "Tooe mu mumme e tuukwe sapa gi mu e oedyuku-wa'ne'yoo. ⁶⁹Saa'a mu e poonnekwu Te Naa toogoopatu-kumaba e katu numme mu tunemadabuekukwu." ⁷⁰Mu tutunehanedu yise meeoo oo tubenga, "U haa'a Te Naa Tooa?" Te Pabe'e yise meeoo, "Aha, nu yow soo Te Naa Tooa'a." ⁷¹"Oosoo ka meeoo naneyugwena puusoo gi toge-tamme kemmowgena," mee mu tutunehanedu nana'unakwe.

23 ¹Mu numu tutunehanedu ka Te Pabe'e tzakunana ka tibo'o numu nehanedu Pilate mee naneadu-kobena oo bi petuga. ²Umu ka Te Pabe'e nemooyugwena ka Pilate mee netamma, "Numme eka nana mayu esoo ewa ka mu numu suda neyugwe. Gi ka mu Roman numu-kooba katudu ka mu tumasumudooyina hemepana, mee mu netamma, 'Nu yow Mu Pabe'e ka mu Jew numu-kooba katukwudu,' mee unakwe."

³Soo Pilate yise ka Te Pabe'e tubenga, "U haa'a mu Jew numu-kooba katukwudu?" Soo Te Pabe'e meeoo, "Aha, o umesoo unnena."

⁴Soo Pilate yise ka mu Jew numu tutunehanedu no'oko meeoo netamma, "Nu ka ma-no yadooase, yise esoo ka oo manepunne e tuukwe mu unnena tubetse oo ata'yoosoo. Esoo nana gi suda manakwe."

⁵Pana mu tutunehanedu oosapa mee unnegonno, "Esoo ka mu numu suda neyugwewunu, mana ka teepu Galilee mee naneadu-toogoo suda tuneyugwedu."

⁶Soo Pilate ka meeoo mu unnegonno mu nakase mee mu tubenga, "Oosoo haa'a Galilee-wi'yoona kemmapu?" ⁷Umu mee oo nanekwegea, "Aha." Soo Galilee numu-kooba katudu Herod mee naneadu punno'o Jerusalem-wi. Soo Pilate yise ka Te Pabe'e ka Herod-matoo nemawuni. Soo Te Pabe'e yise ka Herod pukwi'yoo-kwitoo tzakaka.

⁸Soo Herod besa soonamme ka Te Pabe'e puu-baa natzaka petugase. "Soo Jesus sumuna umu besa tu tumadipu-matu e tzapoonnekukwu. Wuna'me nu oetu nakakena besa oo poonne soonamme," mee soo Herod soonammekatu. ⁹Ewa ka Te Pabe'e tubenga pana soo Te Pabe'e gi oo nanekwegea. ¹⁰Mu Jew numu tutunehanedu osoo konnopunnena no'obasoo nanasuda oo

netammagonno. ¹¹ Soo Herod yise ka umu tutukwutumadu-no ka Te Pabe'e suda matuguna oo-ma'yoona nanekoena oo nasootzamekugonno. Umu unu nanenagadu-kwi oo kwaseakute mu Jew numu-kooba katudu mee oo netamma yise ka Pilate-matoosoo oo taya. ¹² Wuna'me mu ka Pilate-no Herod gi natoke'yookute pana ka yoo hemma manepetuse umu napua'ahoo.

¹³ Ka Te Pabe'e-baa punowse petugase soo Pilate ka mu Jew numu tutunehanedu nesumuhoo. ¹⁴ Yise mee mu netamma, "Mu ekow nana nu-baa bi petu. Esoo nana ka mu numu suda neyugwe gi ka numme-kooba katudu nakabetsea mu mee'e e tuukwena. Nu oetu soohanese masoo gi ka mu unnekwasoo manakwe. ¹⁵ Nu tuwazoo ka Herod-matoo a too'e taya. Soo Herod punno'o gi how a yugwe ka gi how a manakwe. ¹⁶ Masoo sakwa sukwe nuupageta yise natzama'wu mee nu mesoo unakwe."

¹⁷⁻¹⁸ No'yoona mu numu ewa unnegonno, "Ka Barabbas ne tzama'wukuse ka Jesus batsa." ¹⁹ Soo Barabbas nakwutuma oosoo ka mu wakwawa'a tamme-kooba aatadu wohonekese numu goese ooetoo nakwutumadu. Soo mu wakwawa'a tumatuguna ka tabeba oe maneyakwe sumuoo nakwutumadu natzama'wuyakwe mu numu oo netutzeayina. ²⁰ Soo Pilate ka Te Pabe'e too'e netzama'wusoo pana ²¹ mu numu ewa unnegonno, "Oo tzakwenne, oo batsa." ²² Soo Pilate mee mu numu tubenga, "How manena mu ooka e batsa tuungu? Oosoo gi suda tumatugu. Nu oo wupagetase oo tzama'wukwu." ²³ Pana mu numu papabatesoo mee nana'unnegonno, "Oo batsa." Soo Pilate yise mu nakabetsea. ²⁴ Soo Pilate yise ka mu tutukwutumadu ka Te Pabe'e batsa tuungu ka mu numu meeo unakwe. ²⁵ Soo Pilate yise ka Barabbas tzama'wu tooe mu wakwawa'a numu-kooba aatadu oo wohonekese numu oo goese sapa.

²⁶ Sumu'yoo nana Simon mee naneadu ka Cyrene mee naneadu-wi'yoona kemmadu ka Jerusalem-witoo kemmadape. Mu tutukwutumadu Te Pabe'e tzmahudu oo wegeagena. Oo-ma tzakaduse ka Te Pabe'e puma nataposakwuna oo tokwu tuungu ka Te Pabe'e-nakwisoo. ²⁷ Ewa'yoo momoko'ne mu-nakwisoo punno'o meadape sakwina. ²⁸ Soo Te Pabe'e umu-tamme nakwumunase ka mu momoko'ne mee netamma, "Mu sakwa gi nu-koobato sagwipana. Mu sakwa muusoo yise ka mu doodoamu-koobato sakwi. ²⁹ Pudusoo Jerusalem-witu suda namanekwu mu doodoamu-makoo suda namanatzayakwe mu yise mee unakwe, 'Mu numu gi doodoamu-ga'yoo tookwa besa namanatzi.' ³⁰ Umu yise ka giba-matoo nanesootuhikoo mee unnena, 'U sakwa numme-koobato aanooakase mee wumabema.'" Pana soo giba gi oo manakwe. ³¹ Togesoo e gwetzo sapa umu suda e yugwe tooe gi suda e manakwe sapa. Umu ka saa'a e batsase umu mumme numu Jerusalem-witu unu suda yugwekwu mu ka suda tumatuguse."

³² Mu waha'yoo tuduhadu punno'o ka Te Pabe'e-no natzakase nataposa. ³³ Mu tutukwutumadu yise ka Numu Tzonoho mee naneadu-kwi petugase ka sunngabe nuummadabue-ma oo taposa wahoo tuduhadu naana naamookwi. ³⁴ Soo Te Pabe'e mee nanesootuhikooha, "E Naa u sakwa mu numu yaa

manepunnedu ma'emukwana soomu'wa, umu gi oo nakasopedakwadoona yoo e yugwe.” Mu tutukwutumadu yise ka oo kwasu natotsakwate.

³⁵Mu numu oona konnona Te Pabe'e tupoonnepunne mu Jew numu tutunehanedu oo-ma'yoona naneko'e. Mu Jew numu tutunehanedu ka Te Pabe'e mee netamma, “U puu kukumma'akoosoo magwetzo'i mee unnepana meno'o sakwa yise u uusoo namagwetzo'i u ka Te Pabe'e mee nane'yugwena.”

³⁶Mu tutukwutumadu punno'o ka Te Pabe'e-ma'yoona naneko'ena. Umu yise ka suda kammadu baa suda manena ka Te Pabe'e too'e mapoonneku pana oosoo ³⁷yise gi oo hepe. Umu mee oo netamma, “U sakwa uusoo namagwetzo'i, u ka pooha-gana mu Jew numu-kooba katudu mee naneyugwena.”

³⁸Ka Te Pabe'e tzopa ka sunngabe-ma soo wobe nataposa mee oo-ma natubo'o, “Yow soo Jew numu-kooba katudu.”

³⁹Sumu'yoo mu tutuduhadu-matu ka Te Pabe'e-kumaba nataposadu mee oo netamma, “U ne Pabe'e mee naneyugwepana gi hownnekoo te magwetzoa'e.” ⁴⁰Soo sumu'yoo tutuhadu punno'o ka Te Pabe'e-ma'yoona sooiwunudu mee netamma, “Gi meeo unnepana. U sakwa ka Te Naa-wi tunaka'oedyuku ta punno'o nagoekwu. ⁴¹Ta ka tuma'emukwase sakwa oe tumanaga pana esoo nana puu gi tuma'emukwa.” ⁴²Oosooosoo tuduhadu yise ka Te Pabe'e mee netamma, “Ka u pooha-toohakwi kodyu petuse, saa'a e sootuhi.” ⁴³Soo Te Pabe'e mee oo netamma, “U sakwa oo nakasopedakwatoo yaa tabeno soo Te Naa ta sootuhikwu ka pu-baa ta pepetugase.”

⁴⁴Tabeno manakwana oona ka taba pahe-kwitoo oo katu-kwikoo tooe, no'oko teepu-koobakwitu toganopunne. ⁴⁵Soo taba koomeba-ma natzadoboyahoo. Soo wunapu ka Te Naa pooha pukwi'yoona mu pooha maneyina naamootoo natzakwenedu pa'anakwana tubongo oo naamootoo natzagebu'ehoo.


⁴⁶Soo Te Pabe'e ka Te Naa mee nanetzakwiya'e, “E Naa meno'o u-matoo e moogooa meahookwu.” Yise soo Te Pabe'e ya'ehoo.

⁴⁷Soo tueya'edu pabe'e ka a namanina poonnese mee unakwe, “Esoo nana tookwa togesapa besa'yoo.” ⁴⁸Ewa'yoo numu ka Te Pabe'e ya'ehoose oo poonne suda sokwamana ka suda oo matuguse yise nobe-kwitoo kodyu mee nana'unnena, “Tamme suda manakwe, tamme tuma'emukwa.”

⁴⁹Umu Te Pabe'e soobedyadu umu momoko'ne Galilee-wi'yoona ka Te Pabe'e-no kemmapu oona kwinga'yoona oo poonne ka suda oo nuugwe.

⁵⁰Sumu'yoo nana Joseph mee nane'a^o ka mu Jew numu tutunehanedu-matu, besa'yoo nana, kaaheno tumatugudu. ⁵¹Soo Joseph gi ka Jew numu tunehanedu nakabetzape ka Te Pabe'e mu nebatsa. Soo Joseph ka Te Naa tu nakabetseana sookwina.

⁵²Soo Joseph ka Pilate-baa petugase ka Te Pabe'e tookoo oo natuungu. ⁵³Soo Joseph ka oo tookoo hanehoose wunapu-wi oo mabutooe. Gisoo ka taba egea, ka tupe-naga natudotawaga gisoo numu pukwi nanomatuguna,



Soo Te Pabe'e wa'agesoo ya'ehoo (Luke 23.43)

ooweoo soo Joseph ka Te Pabe'e tookoo nanomatugu. ⁵⁴Esoo ka nanesootuhi tabeno-kobenasoo namanena.

⁵⁵Umu momoko'ne ka Te Pabe'e-no Galilee-wi'yoona kemma'adu ka Joseph nagegase ka Te Pabe'e nanomatuguna poonne. ⁵⁶Umu nobe-kwitoo kodyukase nakwana'a matabue oo tookoo-kooba nahanekwudu. Umu ka Jew tumayohope mayohona gi kodyu ka nanesootuhi tabeno oo manese.

24 ¹Ookow mooa'awamooasoo tu pudutabuagena mu momoko'ne Te Pabe'e tookoo pukwi nanomatugupu-wi petugonnohoo ka nakwana'a tu tumadabuepu hanena. ²Soo tseketadyadu tupe oo-kobena nahanepu puma oo namatumana namagonnonoekwunipu-ga'yoo. ³Umu oe tzoonoohookase sapa gi ka Te Pabe'e tookoo oekoo ma'yu. ⁴"Hano soo Te Pabe'e tookoo?" mee umu nananetammadyakwe. Waha'yoo toha kakasa-ga'yoo umu-baa tapua petu besa patakwetseadu-kwi nanamasooana. ⁵Mu momoko'ne umu-ma nasoosuahoo.

⁶Mu toha kakasa-ga'yoo mee mu momoko'ne netamma, "Mu sakwa gi suipana. Gi ka togesoo nummenummedu numu ka numu tuiipu-nagatu watepana. Te Pabe'e gwetzo. ⁷Mu sakwa oo soomayu ka gisoo nabatsana oosoo mu tuukwe, 'Pudusoo mu suta'yoo numu e batsakwu yise waha tabe mease nu namayodakwusoo.'" ⁸Mu momoko'ne yise ka Te Pabe'e unnepu sooma'yu,

9-10 ka oo nanomatugupu-wi'yoona mea'ase ka Te Pabe'e nakatzimodu no'oko tuukwe. 11 Mu Te Pabe'e nanayadooawabe gi ka pumme mu tuukwepu naka'oedyukute sukwe meeoo tooe unakwe mee mu soobedyana.

12 Soo Peter yotseoose ka Te Pabe'e uga nanomatugu-kwitoo tanomanega. Ka oe petuoogase, oetu tomooe'ma pukwi oo namasooapu suu'mu oe kwakwape oosoo yise nobe-kwitoosoo mea mee soonamme, "Mu momoko'ne tookwa togesapa tuukwe ha'oogena yise mani?"

13 O'no tabenosoo waha'yoo nanana Te Pabe'e-wi tunaka'oedyukudu Emmaus mee naneadu-witoo memea kwinga nasogomea ka Jerusalem-wi'yoona. 14 Umu ka memeadabena ka namani-kwitu nanatugwe'nga. 15 Te Pabe'e mu hatsuhookase sapa 16 umu gi oo posopedakwadoo. 17 Soo Te Pabe'e yise mee mu tubenga, "Hekwitu mu netamma?" Umu ka suda sokwamana wamepetu. 18 Sumu'yoo umu-matu Cleopas mee naneadu mee oo netamma, "U suu'mu ka sumuna ka umu Jerusalem-witu-matu gi ka a namane-kwitu naka." 19 Soo Te Pabe'e yise oo tubenga, "Ha'oo tu namanise?" Umu yise meeoo, "Jesus-witu, oosoo unu pooha-ga'yoo ka Nazareth-witu kemmana. Ka Te Naa Besa Pooha-ma soo Jesus unu pooha-ga'yoo oosoo ka ewow numu mabesakuse yise Te Naa besa unnepu numu tuukwepu. 20-21 'Soo Jesus tookwa Te Pabe'e. Oosoo ka mu Tibo'o tayakwuni,' mee numme oosapa sokwamadu. Pana umu tutunehanedu ka mu Tibo'o ooka batsa tuunguna. Etze'e tabe mea ka oo tu namanise. 22 Yaa awamooa mu momoko'ne numme-matu besow ne tuukwe gi ne nakasopedakwadoona. Umu meeoo, 'Awamooasoo numme mea'a ka pukwi Te Pabe'e nanomatugu-kwitoo, 23 pana Te Pabe'e kadoo'yoo. Numme ne tuusoobedya-kwikoo umu Te Naa tummatzidu mu toha kakasa-gakoo poonne umu mee ne tuukwe'e, "Te Pabe'e gwetzoi."'

24 Mu numme-nagatu-matu mu naana ka oo nanomatugu-kwitoo mea'a. Umu oo poonne petuga oosoo ka mu momoko'ne umu tuukwe-kwa'nesoo. Pana umu gi Te Pabe'e poonne." 25 Soo Te Pabe'e yise mee mu netamma, "Mu gisoo e nakasopedakwadoo. Mu gisoo oo naka'oedyukute ka o'nosoo Te Naa yadooawabe tamme tuukwena.

26 O'nosoo umu meeoo tubotugu, 'Soo Te Pabe'e mooe nabatsase saa'a yise no'oko mu numu nemadabuekwu.' " 27 Soo Te Pabe'e yise besasoo mu tuukwe'e ka o'nosoo Te Naa nanayadooawabe Te Pabe'e-witu mu numu tuukwekepu. Mooe'ugasoo soo Te Pabe'e ka Moses unnepu mu tuukwe'e penakwa yise umu susumudu Te Naa nanayadooawabe unnepu waha. 28 Umu yise ka umu waahoo naana pukwitoo mea tzage'e manepetu. Pana soo Te Pabe'e oo-kwingadusoo meadu. 29 Umu yise meeoo oo netamma, "Mooasoo yongoho pudusoo taba egeahookwu, u sakwa numme-baasoo tooi."

30 Ka mu tukakwuse, soo Te Pabe'e ka tukaba gwuuhoose oetu mu nanesootuhikukooaha. Ka tunemamakwuse oo tzabokase umu-matoo oo mameaku. 31 O'no umu o posopedakwatoosoo oosoo yise gi tapu'aka. 32 Umu yise mee u'unekwate, "Ka te sogo kemmadape, soo Te Pabe'e ka a nabotuguna besasoo ta tuukwe, ta yise besa oo nakasobedya." Umu yise



Te Naa nayadooawabe besasoo ka Te Pabe'e-witu ne tuukwe (Luke 24.30)

yosuhoose ka Jerusalem-witoosoo kokodyuhooka, okow yongonasoo. ³³Ka mu pepetugase no'yoona Te Pabe'e yadooawabe nanano o, ewa'yoo numu punno'o mu-kumisoo. ³⁴Umu ka mu waahoo mee netamma, “Soo Te Pabe'e togesapa tu ya'e-kwikoo namayodu, Simon Peter ka Te Pabe'e poonne.”

³⁵Umu waha'yoo yise mee mu netamma, “Soo Te Pabe'e numme-no sogomea. Ka o'nosoo Te Naa nanayadooawabe tubotuguna ka Te Pabe'e-witu besasoo ne tuukwe'e. Numme ka mooe'ugasoo gi oo posopedakwato. Saa'a ka oo nanesootuhise ka tukaba oo tzabokase, numme oo pudu posopedakwato.”

³⁶Togesoo mu apegeagonno soo Te Pabe'e umu-baa tapu'a petuse mu yadoo'e. ³⁷Umu nasoosuihoo, “Uda tsoapa,” mee sokwamahoo. ³⁸Soo Te Pabe'e yise mee mu netamma, “Mu sakwa gi nu-ma suipana. Gi nu tsoapa. ³⁹⁻⁴⁰Nu nuusoo yow ka e mi noko e kuku pumakoo e natzeptzetapu poonne. Mu e mesoo tzama. Soo tsoapa gi tookoope-ga'yoo.”

⁴¹Ka besa sokwamahoose umu gisoo oo soo'oedyukupana ka tsoapa mee oo sooyugwepunnena. Soo Te Pabe'e yise mee mu tubenga, “Mu haa'a hemma nadukadu hane?” ⁴²Umu yise pakwe nano'hona oo magahoo ⁴³oosoo yise mu-kobena'yoosoo tukakooha umu yise oo sopedakwato soo Te Pabe'e tookwa togesapa nummenumme.

⁴⁴Soo Te Pabe'e yise mee mu netamma, “Mooasoo nu ka mu-baa'yoona mu tuukwe'e no'oko ka Te Naa yadooawabe tubotuguna togesapa oo-toogoo namanekwu.” ⁴⁵Soo Te Pabe'e yise ka Te Naa nanayadooawabe tu tubotugupu nanakasopedekwadoo oo mayugwe. ⁴⁶Mee mu netamma, “Mooasoo o'nosoo e manekwuna nanemamakwu. Nu nabatsase pahe tabe mease nu e ya'ekwikoo namayoda. ⁴⁷Soo nu-kwitu besa na'unnedu no'obatusoo numu oo natuukwekwu, mooe'ugasoo yaa Jerusalem-wi'yoona

yise mana kwinga'a-kwi. Mu numu yise tu tuma'emukwana nanekwahase mu tuma'emukwana nasoomu'wase mu nasootuhikwu ka nuka naka'oedyukuna.

⁴⁸Mu ka nu-kwitu mu numu tuukwekwu ka e manena poonnena yise ka e unnepu nakana. ⁴⁹Pudusoo nu mu poohamakakwu ka Te Naa unne-kwa'ne. Mu sakwa yaa Jerusalem-wisoo ka mumme e pooha-makanano'oto.”

⁵⁰Saa'a yise Bethany-tamme meana soo Te Pabe'e mayodase mu nanesootuhikute. ⁵¹Toesoo mu nanesootuhikuwununa umu-baa'yoona toogooptoo tsebooegea. ⁵²Umu Te Pabe'e tuukwewabe yise besa sokwamana ka Jerusalem-witoosoo kodyuka. ⁵³Umu oosapa ka pabatsekoo nanesootuhi nobe-kwi'yoona nanesootuhiyakwe, “U, Ne Naa tubetse besa'yoo,” mee unneyakwe.